

ПЕТӖ 1926 ВОСЯНЬ
ЛЭДЗӖНЫ: КОМИ ГИЖЫСЬ КОТЫР, ПЕЧАТЬ ДА ЮӖР СЕТАН КОМИ
РЕСПУБЛИКАСА АГЕНТСТВО

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

9 КӖЧ (СЕНТЯБРЬ) 2007

ТАЙӖ НОМЕРЫН:

Николай МАЛЫЦЕВ. Парч вад дорын. Висьт	3
Любовь АНУФРИЕВА. Ловным визувтӖ орчӖн...	
Кывбурьяс	16
Василий ЛОДЫГИН. Киль. Висьт	19
Надежда ПАВЛОВА. Морт олӖм. Кывбурьяс	24

ГОЖСЯ УНИВЕРСИТЕТ

Медводдза воськовьяс. Кывбурьяс, висьтъяс	26
---	----

ЛИТЕРАТУРА ИСТОРИЯЫСЬ

Василий ЮХНИН. ШувгӖны пожӖмьяс. Роман	40
--	----

Александр ПАНЮКОВ. Джуджыд керӖсын, гажа нӖрысын. Очерк	63
--	----

СЕРАМБАНА ГИЖӖД

Иван НОГИЕВ. Командировкаын. Висьт	75
Выль небӖг	80

Обложка вылын снимокыс ФӖдор МакаровлӖн.

© «Войвыв кодзув» («Северная звезда»), 2007 г.

СЫКТЫВКАР

СЕВЕРНАЯ ЗВЕЗДА



***Ежемесячный
литературно-художественный
журнал***



Учредители:

СОЮЗ ПИСАТЕЛЕЙ РЕСПУБЛИКИ КОМИ

**АГЕНТСТВО РЕСПУБЛИКИ КОМИ ПО ПЕЧАТИ
И МАССОВЫМ КОММУНИКАЦИЯМ**



РЕДАКЦИОННАЯ КОЛЛЕГИЯ:

Главный редактор

Михаил
ЕЛЬКИН

Геннадий
БЕЛЯЕВ

Зам. гл. редактора

Евгений
КОЗЛОВ

Ответственный
секретарь

Алексей
ПОЛУГРУДОВ

Владимир
ТИМИН

Александр
УЛЬЯНОВ



Николай МАЛЫЦЕВ



Парч вад дорын

В И С Ъ Т

1

Ошйысьлёны чери кыйысь-вөралысьяс: ёна пö и шойччим-красуйтчим Парч вад дорын, ёна пö и чöсмасим утка шыдөн да куим пöвста юкваён. Ме и ачым ошйысянаа сөрлывлі сэнитані кыйсывлөмөн. Ю либö ты дорад войколалігөн юкванад быд пöрйö жö нуръясьлім. Сэтöра чайтö пöттöдз юлывлім и. Вөр-валөн мыччасян-шыалан серпаснас унаысь лои нимкодясёлöма. Но мыйлакö быдөн ошйысьёны сöмын медся мойвиана кыйсьöмнас, некод некор оз шулыв, ме пö абу нин и сэтшöм морттуя кыйсьысь, гожöмбыдөн пö дас вит кельчи и вугравла, а нопйын ни öти жыдач гортö эг вайлы. Либö вөр-валысь мичлунсö зэв скупа, пырмунігмоз быттö донъялыштасны: «Мича-мича места-ысыс...» А мыйöн мича, висьтавыны оз сяммыны.

Меным «быдөн» нимыс лöсяліс ли эз ли, ставыс — висьталöм-ошйысьöмыс — артмыліс пöпуттьö. Кельчиыд шедліс этшаджыкыс и унджыкыс. Жыдачтö эг уна, но коръяскö гоз-мöдтö вайлывлі жö. А вөр-валөн мичлун вылö менам аслыспöлöс видзöдлас: сійö некор абу öткодь. Öг нин шу, мый и вöрас пуясыс абу öткодьöсь. А вөр-ваыд луннас да войнас, арын либö тулысын, поводдя вежласигөн, весиг öнтай да öні — пыр аслыспöлöс. И ваыд сэтшöма жö рöмпöштаналö енэжсö и му эжсö. Но и тайö на абу ставыс. Вөр-ва сэтчöс олысьяснас, кор оз узь, шувгö, шпоргö, тивзö, дзользьö, кравзö... Ваыс эськö кывтöм, но черияснад сьялкнитö, больснитö, сёльгö вильыш шорлөн помтöм сыланкывйөн.

Ставсö тайöс позьö шуны вөр-ваён уна сюрс воясөн лöсьöдöм симфонияён. А ми некымын дас воён сяммим лöсьöдны аслыным кокньöд вылö эргысь, тракйысьысь, вөр-васö дойдалысь машинаяс.

...Пукалам «Казанка» пыжын витөн: шурин, сылөн пиыс — Шурик да Тимушев вокъяс — Юрий-Сашка. Витöдыс ме. «Ве-

терок» пельтö сьöдмöдö эргöмнас, но терпита, медтыкö öдйö-джык локтiм Смолянка берегöдзыс-а. Сентябрь тöлысся асылыс сiдз на ыркыд, а ва вылад да öда моторнад мунiгөн и зэв тöла, йирмöгалыштö весиг, кöть эськö и пасьтасьöмaсь: купайкаяс, пеля шапкаяс, весиг чуня кепысясь. Йöрыша нопьяс пыж пыдöсын — лöсьöдчим кык войкола кыйсьöм-вотчöм вылö Парч вадйö. Менам да шуринлөн пидзöсьяс вылын кык ствола ружье-шойяс. Кöть эськö неокота сйöс кыскавны: вадйыс кызь кымын километр сайын, дай сэн на, сэтчöдз воёдчынысö — колö болс-кыны-вуджны километр кык пасьта нюр. Но тöдсаяс ышöдiсны: Парч вад пö зэв чериа дай уткаяс пö ёна пуксьöны сэтчö. Со и босьтi гормöдчанöс. Патронташсö эг и босьт, сöмын зепьясö дас патрон. Суворов на шулöма: походад пö и ем сьöктöдö.

Вит бөлбан каям ылі Парч вадлань. Вöралан билетыд эм менам и шуринлөн: ружьеясным регистрируйтöма, инспекторьясыс ог полöй. Куим том мортыс ружьетöмöсь, öружиеныс — вугыр шатиньяс да вотчан дозьяс.

Тимушевьяс мырдөн вöзйысьöмны турипув вотны да вуграсьыштны, шурин и сетчöма найö няргöм вылö, и писö босьтöма. Важысянь нин дольöмны: «Парч вад да Парч вад». Ог пö пайкöй, тшöтш кö кайлам вотчыштны да чери вугралыштны.

Дас öти километрсö мотовозөн лэччыны колö — шурин векни кöлеяа кöрт туй вылас машинистөн уджалö; мöд дас öтисö — коляскаа мотоциклөн пиыс нуöдас, а бöрья кык километрсö, нюр вомöнсö,— келöмөн вуджам.

Но и треситыштiс мотовозас вужынь-вежыня туйöдыс! Став дас öти километрыс тöдчис лысьöманым. Воим, да шурин сувтöдiс мотовозсö бокиса дженьыдик ус вылö — тупикö. Диспетчерыс сетöма мотовозсö аскомыс водз асылöдз, удж вылö мунавтöдз.

Мотовозыс чеччöм бöрын пырыштлим важ вагонö. Сйöс вайöмaсь йöз чеччанiнас, медем удж бöрас вöрысь петöм рабочöйяс, кöть и вотчысь-кыйсысьяс, вермисны дзедьсыны зэрысь мотовозсö виччигмоз. Шурик ёртьясыскöд мунiс петкöдны батыслысь томана будкаын видзан коляскаа мотоциклсö.

Тайö местаылөн нимыс — «Дас öтиöд километр». Сталин кадö на вайлöмны немечьясöс, найö и нюжöдлöмны векныд колея кöрт туй, пöрöдöм вöрсö петкöдны. Посёлокыслы экьяслы моз жö и нимьяссö сеталöмны: Смолянкаясь ыла сертиыс лыд-пасьясөн. Воддза дас öти километрыс кö мунö нюрьяс пыр, сысянь водзöджык вöрыс быдмö гулыд яг вылын, быттö еджыд дöраа пызан вылын сисьяс. Том пожöмьясыс яла нитшка яг вылас бура вужьясьöмны, вель кузьöсь нин, а кутшöм вöлöма вöрыс водзтi, кор Поволжьеыс да Крымысь вайöм немечьяс панiсны вөр пöрöдöмсö, позяс ылöсавны сэн-тан кольöм багатыр пожöмьяс, сисьмöм нин сывтырья керьяс да мырьяс серти. Тöдöмысь, сйö кадся «КТ-12» трелёвочнöй тракторыс весиг абу вермöма вöрзöдны найös, кöть пуяссö и пöрöдöмaсь-чинталöмaсь. Сулавны кольöм öтка пожöмьясыс, быттö былинаса витязьяс, нэмсö коллялöны ылі ягас, шапкаа туганьяснас пыкöны енэжсö. Найö и шойччан пукöсьяс тарьяслы, дозмöрьяслы. Налөн öд тайö гора вöрас и койташьясыс овлöны.

Пуксялим-тöрöдчим коляскаа «ИЖ» вылö витнанным. Шурин фара бердас ладитiс да злöдiс кулöмьяс тыра мешöксö. Шурик

көть и рулитіс, но и сылы вичмис морөс вылас ыджыд зоб: көр-талім сёян тыра топыдкодь салдатскöй «сидөр», и мөдөдчим «куим көчөс кыйны»: утка, чери дай вотөс.

— Мөдім Парч вад рөзөритны,— серөктіс шурин.

— Рөзөритсьөма,— нюмуніс да меланьö бергөдчылігмоз го-раа шуис Шурик.— Сы мында черисö да лэбалысь пөткасö öнiя кадö некутшөм тыысь он аддзыв.— Парч вад дорас сійö унаысь нин ёртъясыскөд ветлывлөма. Туйсö төдө, бура нуөдө.

Тэрыб вөвным миян регыд и кутіс несъявны, а сэсся и кусі: оз заводитчы, сөмын чисъялө.

— Мотоциклöй төдө, кытчö мен окота сувтлыны,— серам со-рөн шуö шурин.— Тані матын эм ты. Сэтчö уткаяс пыр пуксьы-лөны. Зять, босытлы ружйөтö, кежавлам. Юрик да Сашка, пы-рыштлөй жö. Удайтчас кө лыйны, вартчыланныд, тані пыжыс некодлөн абу. Ваыс абу на көдзыд, прамöя эз на весиг пужъявлы да. А тэ, Шурик, видзөдлы карбюраторсö, весав. Чайта, сэнi помкаыс.

Тимушевъяс эз и пыксьыны, төдісны өд, мыйла босытлөны ружьетөмъяссö утка кыянінас: удайтчас кө, пон пыдди служитны ковмас. Дерт, пон службатö кодкө чайтö сөмын увтчөмөн, но ут-ка кыйигад «ув-авыд» нинөмла: колö кужөмөн чеччөдны лэбачсö туруна берегсьыс, да кор ружье вөчас ассьыс делөсö, вартчывны да вайны пөткасö көзяиныслы. Öти кывйөн кө, кык кока понйөн нель кокаыс пыдди лоан. Дөсаднө эськө, но өд босытисны чери кыйны, вотчыны, ковмас и служитыштны, а кыкөннад да, öта-мөд водзад ошйысьөмөн на вартчыласны.

«Второй километрса» ты и збыльысь козыналіс шуриным дай меным морт öти сьовчөжөн. Сашка да Юрик вартчылісны сэсся.

— А ваыс и збыль абу на ёна көдзалөма,— пасьтасигмозыс висьтасьö Юрик.— Дзик пыригас сьөлөмыд ёкнитлө, а сэсся вартчигад ничево.

— Бур пловечьяс, молодечьяс,— ошкыштіс шурин.

Дөвөленөсь вөлім ставным. И мотоцикл ладмөма.

«ИЖ» сьөкыда эргөмөн нуис миянөс ичөт өдөн, көть кос яг-вывса туйыс топыд, некутшөм чукуль ни мукуль. Сөмын öтила-ын шор визь вуджим бонаа поскөд, ковмис на ставнымлы чеч-чывны да йөткавны көрт вөвнымөс.

2

Со и вөр керка. Сөмын сійö абу важся öтка вөралысьяслөн кодь. Тайö — вель ыджыд стрөйба, морт кызьөдз позяс төрөдчы-ны. Паськыд öшина, бөчкаыс вөчөм ыджыд көрт пача. Гөгөрсö, шоныд кутөм вылө, тэчөма кирпичөн. Стенъясас,— дерт, том йөз,— лясйөдлөмаөсь журналъясысь пасьтөм нывбабаясöс, сер-пасьяс.

Керка бердас сулаліс нин кодлөнкө коляскаа жö «ИЖ» мото-цикл, но некод матын эз тыдав. Коляскаас вевсясөн куйліс тыртөм нель пестер.

— Володя Жилин тай вайөдөма та ылнаö баба позтырсö. Ту-рипувйыс быттö матынджыксö абу,— мотоцикл сертиыс төдіс вотчыны воөмаясöс Шурик.

— Матісьыс вотісны нин, кодлы абу дыш,— дорйис татчö локтысьяссö шурин.

Манитчыны пач ломтёмён да посьодчёмъясён эг и кутёй. Тюп-тяп мыйсюрёён нурийштчигмоз шурин, миян юрнуодысь, индаліс быдёнлы мог.

— Паськөдчыны, турипувъя места видзөдлөм могысь, ог кутёй, өти кок туйөд и вуджам нюрсө. Шурик, тэ кузь кока, мун водзас өдйөджык да матыст Поповлысь пыжсө. Висьталіс, вөйтөма пө «пристансянныс» веськыдвылас дас сизим воськов сайө, сутугасө көрталөма берег дор нюйтас сатшкөм кыз пу бедьторйө. Юрик да Сашка, верманныд вуграсьыштны. Вад дорас матыст-чанінсянныс шуйгавылын эм эновтөм пур, сы вывсянь и кыйсьөй. А ми зятькөд вөйталам кулөмъяснымөс. Некод эн петөй ты дорас пестөг, көсянныд кө вой кежлас өзтывны бипур. Сэтысь став лөпсө нин сотісны. Нетшкөй мыръяс, кос пуяс, мый нунытө вын сертиныд.

Быдөн нопъяөсь, и водзвыв юклөма, кодлы мый ковмас вуджөдны нюр вомён. Но быдөнлөн нөшта аслас нянь запас, истөг, пурт. Вөліны и ыджыд целлофан сепысьяс, кыйөм черисө меститны.

Ме да шурин ружьяснымөс некодлы эг дөверитөй, пельпомъяс сайө накосалім. Кулөмъяс тыра ноп өшөдім Шуриклөн мышы вылө: зонмыс сөнөда. Сашка да Юрик «сидөръясаныс» кыскисны прөдукта, вуграсян көлуй. Чер да сямөд пластъяс на вичмис налы. Вад дорын кыз пуясыс оз быдмыны, джынвийө косъмөм кондаяссө өд мыйөнкө ковмас ломзөдны.

Мөдөдчим кыпыда, быттө партизанъяс бура дасьтысьөм рейдө.

Горалөмөн варовитісны и зонъяс, но гажныс надзөникөн лаймис. Нюр эм нюр, нөшта и нопъясным сьөкыдөсь. Кузь гөленя сапөгнад, оз лючки куснясь да, мортыд быттө пу кока. Ставыс тайө ёна эбөссыд уськөдө. Восьлалам эськө, а водзөсө пучей моз воам. Но нюръяс йылысь некор эг кывлыв увтыртана, лөкөдана кыв. Коми морт век төдіс, кызди видзны асьсө нюръясті келалігөныс. Нэмъяс чөж нюрыд козынавліс мортлы турипув и мырпом. Тайөнтө абу и яндзим пыдди пуктана мортөс гөститөдны.

Шондіөн да Енмөн быдтөм-лелькуйтөм нюр выв вотөсыд важысянь вөлі медбур чөсмасянтөйөн, сэсся вежліс-озырмөдліс пызан выв сорва и прөстуда пөрөсьяс бурдөдліс. Важ йөз шулөмны: мырпом кисьмө Прокопейөдз, турипув — Семен лунөдз. Но өд оз на и быдлаын быдмыны тайө вотөсьясыс, абу жө быд во өтмында и урожайыс. Сөмын зіль вотчысьяслөн көзөдас сулавлісны во гөгөр чөж, вөрса выль урожайөдз тырмана турипув тыра пельса да мырпом тыра туисьяс. Тадзи вөлі вөйдөр, а бөръя кадө казялан: горш йөз вотөссө кутісны нетшкыны варышъяс моз, кисьмытөдзыс на. Вузөс вылө...

Зонъяс өдаджыкөсь да Парч вад дорас миысь водз воөмаөсь. Кор ме да шурин матыстчим вад дорас, сэні найө көзяйствуитісны нин. Жебиник пожөм дорө сувтөдөмаөсь кык пелыс, ув вылас өшөдөмаөсь саөссьөм ведра.

Воддза волысьяс пас кольөмны: чулля-пелля вожъяса майөг йылын дзирвидзисны жөч да стеклө банкаяс. Сэн жө кодлөнкө важ куртка, важ улөс. Кодкө абу тай дышөдчөма, кыскөма нюр вомөныс.

Тыяс, вадъяс аддзылі уналаысь, но та ыжда дінас вои медводдзаысь на. Парч вад пөшти гөгрөс, пасьяыс метр витсө, кузь-

таыс неуна унджык. Чипан кольк балаа. Но эз сөмын тайо шензёд мено. Вадйыс — быттьо ыджыдсыс-ыджыд рөмпөштан жмутвидзө. Веркөсыс пөшти өтвийын и вөртасыскөд, и нюрыскөд. Весиг мылькъяджыкөн на вад веркөсыс кажитчө модар бергланьыс.

— Этатшөм ляпкыд берегыс, весиг быттьо ньоти сийо абу, борйыскөд со өтвесьт ваыслөн отыс. Оз-ө ытваавлы сідз, мый этайо ыджыд нюрсө тулыснас ойдөдлө?

— Некор оз. Зэра көть кос поводдя, ар көть гожом, ваыслөн веркөсыс век өтрөвнө.

— Кыдз нө сідз?

— А вадсыс петө кык метр пасьта вис. Сийо быттьо гудөкасьо өтарө и модарө: кор вадйыс ямө, ваыс сэт пырө, а кор ойдө, лишнойыс бөр петө. Кыдзи тшөктас вадйыс, сідзи и уджалө вискыс.

— Но өд эта ыджда вадъяд ваыс помтөм. Кык метр пасьта вискөдыс уна-ө удитас пырны-петнысө?

— Тайо и мено пыр шензөдліс... А өні тэ шензы да мөвпав, мыйла тадз,— нюмъялөмөн вочавидзис шурин.— Но тайо мый на. Овлө, вадйыс рөмпөштан кодь веркөса лөнь луннад, весиг пипу кор люньмунөма, и друг кутшөмкө визув чужлас шөрланыс да весиг лөнь кадө кыптылас гы. Сэки вадйыс быттьо чукъя лоө да ваыс ылькйө-петө вискөдыс, а гыыс лөняс — ваыс бөр локтө вадъяс пыр овлана мындаөдзыс.

— Збыльысь?— шензя ме.

— Збыль. Кадысь кадө вадйыс быттьо чужъясьо өтмөдарө.

Шуринлөн тайо висьталөмыс кажитчис небыличаөн, көть и шемөсмөданаөн да весиг повзөдлана шуштөмөн. Кывлі: тайо вадйыс пө пыдөстөм. Мужикъяс пө коркө дзумгылөмаось кузь-кузь зіб, но абу и подйылөма.

«Оз-ө кутшөмкө гуңдыр ов пыдөстөм йирас да ва улөдыс ветлігөн вад веркөссө гызьөд?»— воө юрө мөвп. Но өд сийөс некод на абу аддзывлөма.

Кыйлывлөмаось кодсюрө пуд кыка сиръяс. Чери юрсө пө кый-сысыс пельпом вылас пешкыльтөма, а чери бөжыс муас инмө. Но өд тайо чери, көть и нитшка чери-пөль. Сирыд абу вакуль либө мойдыввса гуңдыр.

Оз, шуам эскыссы, но татшөм сөрни-баснияссө кывлөм бөрын ветки пыжнад полан петны вад шөрас: путкыльтчан, виччысьтөг кө гыясыс петасны — сэні и пом. Ме вакульяс йылысь мойдьясад ог эскы, но шуринлөн висьтасьөм бөрын мыйкө падмөдіс, кусөдіс повтөмлунөс, ты шөрас петавны көсийөмс.

Регыд Шурик вайөдіс Поповлысь көрт лист пыдөса, куим мегыра ичөтик пыжсө. Морт куимтө бура лыбөдас лөнь ва вылад. Поповыс пө оз скупитчы, босьтласны кө пыжсө кыйсьысыс, но бөръя кадас кутөма сайөдны пасйөм местаө вөйтөмөн.

Кодсюрөыс кытчөсюрө эновтө пыжтө либө ылө кольө. Уна кад вошө корсигад.

Вөйтлөм пыжыд туктөма, абу дзик кокныд, но өд оз ковмы сийөс гөрб вылад кыскавны, ва вывтіыд сийө өткодь өда. Дерт, косьтивлытөгыд пу набойясыс абу жө кузь нэмаось-а.

Шуринлөн тан жө аслас пыжыс, но сийө пө дзоляджык дайылынкөдь тайо «өзынсянныс». Шуис сыла ветлыны бөрынджык, но пемдытөдзыс: пыжыс зэв ойма кустъяс пиын, йөз син улысь дзебөма. Пемыдөн кө, и аслыс на корсьмөн.

Перйим мешöкысь кыкнан кулöмсö, йитим öтпомсяö. Изъястö-мöсь, улыс сюрöсьясыс кыз капрон көвйысь, медым кокныдика вöйтасны кулöмсö сувтсаногсö, но и оз зэлöдны: топыд, стен кодь, гыдтöм кулöмад чериыд оз пыр. Пöруясыс* сямöдысь, кызди важысянь вöчлисны комияс — тайö тöлкаджык öнiя пенопласт таб дорысь: оз дзугсы, а ковмас кө, позяс кокниа разны да вежны.

— Шурик, пестыв бипур, тшай пузьöдышт. Пачкөвöй роктö пуышт и. Эстөн, дзик берегдорса кыз пуас, öшöдöма «всенароднöй» тшайник, неыджыд пöрт сэнi жö. Да сöстöмджыкинысь васö гумовт, мед нюйтыс оз веськав,— тшöктö-велöдö писö шурин.— Көнöсь нö Тимушевъясыс?— юалис сэсся.

— Важ пур вывсяныс, кытчö ачыл индылiн, вуграсьöны. Куш пö ёкышгяс шедалöны, вугырсö чöвтны муртса удитан. Васаыс аслас матросьяслы «Полундра!» командуйтöма,— сералöмөн во-чавидзö Шурик.

Тöда: ёкышлөн нимыс — матрос, йöршлөн — боцман, налим-лөн — тойöсь, сирлөн — көзяин, да тшöтш серала.

Вöйталим кулöмъяснымöс берег пöлöныс, метр-мöд ылнаö эжöра берегсяныс шöрлань сетчыштöмөн. Вадйыд оз визувт, да кулöмсö помгясöдыс эг и көртавлöй.

— Эз-ö ло вывтi матын берег дiнас? Кулöмъясным кө мукокаласны, кутшöм чери сэк шедас? Лягуша, буди?— юала шури-нысь.

— Мукокалас? Видзöдлы,— и шурин сюйис пелыссö ваас. Сiйö эз и подйив.— Чериыс вой кежлас берегас матыстчö шойччыны. Оз и ков бурскöм: асья войнас берегöдыс прöйдитны кок ув му-сö лайкйöдiгтырйи, сэк чериыс чепöсьяс кулöмгясланьö дай гыдгя-сяс, вот и бурскöм.

Меным татшöм ногөн кыйсьöмыс вöли выльторйөн.

Быд кулöмасьысь дась югыдөн вöйтасьлö ватурун пöлöныс вель ыджыд костөн, медым кулöмгяссö эз ло чöвталöма турун вы-лас либö сибдöггясö. Но Парч вад миян тыяс серти аслыснога-джык: вöйтась кызд көсьян; чериыс ветлö вöльнöя, вад пасьта-лаыс, ва веркöсöдыс мича лунгясö весиг тöдчö ва нырөн визг-ялöмыс, кор кельчи-ёкыша пöрöддьöйс вердчö-ворсöдчö.

Парч вадйын ваыс сöдз-сöдз, но уна рöма: веркöсыс, весът-мöд джудждаö, сöдз югыд; мöд слöйыс турунвиж тюль рöма; пыдынджык — лöз, а сы бöрын пемдö и пемдö — сьöдöдтöдз. Сэтчöдз шондi югöрыс оз нин вермы пискöдчынысö.

Вад берег дорыс эжöра, а сэсся, воськов куим-нель, шöрлань-ыс, ватуруна. Бобувгяс, лöдз-гут турун вывсьыс, гашкö, сёян жö корсьöны. Найö жö и кельчияслы сёяныс. Сиргяс оз радейтны ва веркöстид шывгьявны, пыдынöсьджык либö берегдорса эжöр пöвстö дзевсьöмаöсь, налөн сёяныс кельчи-ёкыш. Ватуруна-эжö-раинсьыд чериыс калялы ни варышлы оз сюр.

Кулöмгяс миян вöйтавис нин, кор Шурик Соловей-рöз-бойник моз шутёвтiс да горöдiс, быттьö пöжар вылö:

— Öбе-ед!— весиг ыласа эжöраинысь уткаяс борд выланыс кыпöдчисны.

Ружьясыным бипур дорас, матын быдмысь пуяс бокын сула-

* Пöру — сямöдысь тубыртöм таб.

лісны, но томъясös өлөдiм, мед эз лысьтны босьтны. Уткаяс вö-чисны некымын кытш, бөр пуксисны неылö да саймовтчисны берегдорса эжөр пövстас.

Шурик пусьöма. Пачкаа шыдтö пуны да тшайтö пузьöдны, кыдз шуласны, абу мыр бертöм.

Сейсис-юсис, и шурин бара висьталіс водзö кежлö могъясны-мös:

— Том йöзыслы, чайта, матросьястö дышöдiс нин лэптавны. Ветлөдлыштöй нюрöдыс, турипувсö гөгöртлöй, корсьлöй вотöсa-джыкин. Но, Шурик, на бöрся тэ дыр эн вöтлысь. Тэныд и мöд удж на лоö — ужын дасьтыны. Ми зятькöд рытъявылыс лок-там,— нарадитчö пиыслы да Тимушев вокъяслы шурин.— Сэсса, би дорын кө көсьянныд узыны, пестö унджык дасьтöй. Черныд эм.

— Наряд вне очереди?— сералігтыр вомаліс батьсö Шурик.

— Öчереднöй, öчереднöй,— шмонялö жö батьыс.— Тэ моз чöскыдасö сэсса некод оз сяммы пусьыны. Пачкөвöй шыдтö рушку зэлавтöдз панялі.

— А мый нö пуам? Матросьяссö? Туис тыр со Тимушев вокъяс кыйöмны.

— Керöй-вöчöй да юквасö и пуöй, сідзкö. Мöздас на кулöма-сьöмөн ставнымлы. Гортö татшöм чери ог лэччöдöй. Тимушев вокъясös мамныс янöдас. Сідз öд? Тайö лы чукöрысла пö и кай-лінныд Парч вадйöдзыс? А турипувсö кө лэччöданныд, сьölöмыс на бурмас...

3

Коркö ёна нин важөн, кор медводдзаысь на кывлі «сьöд ут-ка лэбö» шусьöг, чайтлі, мый лунвылö лэбöны сьöд гöна уткаяс. Вölөмкö, тадзи шуöны сьöд войнас лунвылö лэбысь быд сикас уткасö. Арнас лун и вой найö лэбöны ыджыд чукöръясөн, сöмын коръяскö пуксьылöны шойччыны паськыд ота тыяс либö юяс былö. Сэтшöм кадыс овлö ылöсас вежон дыра сентябр помлань-ын. И сэк войяснас дай асывьяснас гөгөр кылö, война вылын моз, гыпкөм-луйсьöм. И оз сöмын билета вöралысь, но и сэтшöм-та-тшöм шландайтысьясыс пищалёсь. Кытысь-мый аддзасны, сэтчö и камöдöны. Охотинспекция эськö и кыйöдчö, но öд быдлаö оз на тырмы. Парч вадйöдз охотнадзорлөн оз жö судз кокыс ни дö-зьöрыс.

Шуринлөн и менам вöралан билет сьöрсьыным, да инспек-торъясысь эг полöй.

Сёрнитчим рөмдытöдзыс бөрйыны места да саймовтчыны бе-регдорса кустьясö. Шурин меным вöзйис Поповлысь пыжсö, а ачыс лöсьöдчис мöдарлань петавны аслас пыжөн. Ылөсалим, ме-дым дрöбъя зарадөн эг судзöй öта-мöднымös.

Ме йöткыштчи пыжнас веськыдыв да выныштчалöмөн мöдi сынны. Но мый нö тайö? Видзöднысö ваыс синва кодь югыд, а пелысьясөн сынöм артмö — быттö рок вештала. Вölөмкö, ва веркөссьыс весьтөн пыдынджык тюль моз плавъялö ватурун слöй. Сэтшöминтiыс сынiгөн пелыстö оз вölөм ков пыдö тшуклав-ны. Сэсса веркöса, видзчысьöмөн сынiгас и шумыс этшаджык. Бузöдчынысö нинöмла дай тэрмасыны некытчö.

Уткаяс эськö лунтыр на ты вылас тыдалісны то öтилаын, то

мөдлаын, но миянөс казяласны да матө оз пуксыны. Лэбалысь-ясыс ыліті жө кытшлалісны дай.

Матыстчи сыланьө, кытысь шурин висьталіс тыысь пыран-петан виссө. Но сійө дзик абу вис кодь: сідз, кустьяс костөд курья кодь лайкөсаин. Кыті баддьөн вискыс тырөма, а кыті и лөпьясөн. Пыжөс кыскышті да сайөді лөзь эжөра вутшьяс костө, мед пемдас да аслым оз ковмы корсьысьны дай уткаяслысь синсө кежөдны аслам «караб» вылысь.

Кыйөдчыны петі берег вылас да пукси бадь куст улө. Медым гач пыдөс оз көтась, кусынтьі баддьыслысь некымын вож да сы былө и меститчи. Пружинаяса небыд креслө дай сөмын!

Ёна дыр эз и ковмы виччысьны, шутялялан борд шыён юр весьтті сынөдсө юковтіс вель ыджыд кельөб да ылокөдь пуксис. Сы бөрын недыр мысти — мөд чукөр, пөтка даса. На пиысь кыкөн шлювкнитісны пөшти пыж дорөдз. Видзөда, нимкодьяся: сэтшөм найө мичаөсь, шаньөсь! Гашкө, чоя-вока, а гашкө, и жөника-невестаа? Кыдзи кийд лыбас ловьяснысө босьтны? Мед нө красуйтчасны, шойччыштасны да водзө лэбасны. Шоньд мек-таясө. Отка кө вөлі, гашкө, нинөм сэтшөмторйыс юрө эз воы, но өд тайө — гозья!

Рытыс напасьөн* шебрөдіс тысө. Кельыдлөз енэжыс регыдөн рудмис, сэсся и вад веркөсыс пырис юрвесьтса сьөдов рөма шебрас улас. Мыччысисны лыдтөм-тшөттөм кодзувьяс. Налөн кө-зайкаыслы, төлысьлы, абу на, тыдалө, кад садьмөдчыны.

Сынөдын өддзисны шутялялана бордья шыяс, сэні и тані кыліс пуксысь пөткалөн ваө шлапкысьөм. Лыя кө та мында чукө-рас, дерт, мыйкө усяс, но сэки уткаяс вешьясны ты мөдар пом-ланыс, а сэсся войбыд өтнады гажтөмтчы, куткырвидз пемыдас...

«Ог повзьөд, мед концертасьоны. Сюрлас-ө нөшта коркө нимкодьясьны этатшөм симфониянас?»

А ты мөдар помланыс, кылө, шурин гыпкө и гыпкө. Быд лы-йөмө кө уськөдө өти уткаөн, пөди, ноп тырыс нин лоас. Но лый-сьөм шы сертиыс куті гөгөрвоны: оз өтнаслөн шуринлөн ружьеыс шковгы. Тыдалө, кодьяскө нөшта воөмаөсь.

Ты весьтын уткаяс весьөпөрөмаөсь, оз төдны, кытчө дзебсьы-ны. Юр весьтті шпорьялісны кельөбөн-кельөбөн отарладорсянь и мөдарладорсянь. Менам вуніс өнтая утка параыс, наөн ним-кодьясьөмыс. Пөткаясыс ыззьөдісны вирөс, быттө чуксалісны герчкөмнас:

«Лыйлы, лыйлы! Тэ нө, пищальяс, мый могөн дзебасас пука-лан? Гортад өд дзик кө кыйдөстөг воан, серавны кутасны», — быттө мутиыс тойліс.

Веськала — ог веськав, куті камөдны борд шыясланыыс. Кутшөмкө зарадыс и аддзөмаөсь пөтка-мөдөс. Кывсьыліс жө «штөп-штөп», ва вылас усьөмыс.

Палялі, кор зептын коли медбөрья патрон. Юрө воис батылөн коркөя шулөмыс:

«Некор эн сот медбөрья патронтө. Сійө патроннас тэ этшсьыс петтөдз дөзмөдан Вөрсасө. Сійө юөртас вына зверьяслы, мөдө-дас-усьөдас тэ былө. Верман ыджыд неминучаө веськавны зарад-төм пищальнад. Ёти помка дырйи Вөрсаыс оз скөрмы да мед-

* Напасьөн — өдйө, дугөдны позьтөма.

бөръя патронто позьо сотны, аддзан кө ёна ранитчём зверос либё пёткаос, мед мездыны сійос дыр мучитчөмысь. Вөрса сэк лёксö оз вöч».

Тайö важөн кывлөмторсö казътыштсьомсьыс кодзавліс мышкуй. Пукті ружьеос бокö, лосьодчыштөмөн нёрвччи мышвывлань да вöйтчи шог мөвпъясö.

Пемыдас ясыда дзирдалісны кодзувъяс. Аддзи и сьöрсьөн-бöрсьөн кодзувъяса «Утка туй». Сы серти пö лунвылö лэбысь став пёткаыс и лэбачыс сорсьытöг вооны колана местаöдз.

«Но кутшөм мути индіс этайö коньöр уткаысылы шойччанінсö Парч вадсьыс, көні со войбыд, дугдывтöг виöны? Кымын лов быри канонада восьтөмсяньыс? И век на со гыпкөны! Мый кольö югдытöдзыс? И ме тшöтш пукті ассьым грека пай»,— майшöдліс менö татшөм мөвпсьыс, и водзö вежöрысь петісны коркö важөн аддзывлөмторъяс.

Дум вылö воис «Огонёк» журналысь репродукция. Художникыс серпасалöма нель вöралысьöс. Восьлалöны сьöкыда. Пельпом выланыс кык ствола ружьеяс, кос гөгөрныс уна-уна лыйöм пётка. Вöралысьяс нюмыд чужöмаось, быттö тöдчөдöны: «Со ми кутшөм удалось, со ми кутшөм сяма кыйсьысьяс».

Серпассьыс вирыд кодзалö — браконьёрскöй натюрморт дай сöмын, а абу «Вöралысьяслөн группөвöй портрет», кыдзи пасйöма серпас улас.

Сідзи и дзенгö вежөртö гудыртысь мөвп: «Лөсялö öмöй ошйысьны öтка-өтка йöзлөн неморт нога этшнас?»

Но мый вöчан, кор вөр-ва да сэтчөс ловъя лов вылас быдөнлөн аслас видзöдлас? Уси дум вылö и коркö лыддьывлөм «Охотничьи просторы» альманах. Мыйта сэнi ошйысьöмыс: сы мындатö пö лыйлі...

Войыс кузь. Унмöй бырöма. Йöзöс дивитөмсянь думъяс бергöдчисны аслань: «А ме нö мыйөн бурджык? Пызан вылам нö бөръя шөрөм али мый? И со, пёткаяссö öтикөдз бырөдöма лоис. Рочөн кө — массөвöй истребление. Менам батъ, пöль да и сиктса мукöд вöралысьяс эз тöдлыны, кыдзи коминас шусьö татшөм ыкпашасьöмыс. Тыдалö, этшнас вöліны видзчысьысьöсьджык».

Ты весьтын лыйсьөм шы то дугдылас, то öддзылас. Но куръялань некод эз матыстчыв, да ме дорын вöлі лөнъ. Эг и тöдлы, ойбыртсьöма. А кор босьтіс йирмөг, восьті синъясöс. Асьявылыслөн рöмыс кутöма нин небзыны-кельдыны. Видзöдлі часі вылö — коймөд час. Недыр нөрöвитыштөм бöрын пыри пыжö да видзчысигтырйи торйөдчи эжöраинсьыс. Сына, пелыс лоптъяс муртса көтöдалігмоз. Кокни пыжыдлы ёна выныштчалөм оз ков.

Синъясöй велалісны пемыдас, да быд ёкмыль ва вывсьыс тыдалö. Öкті ассьым «жертваясöс» — куим лов.

«Но и но!»— быд виöм пётка кыпöдалі мыжапырысь, некутшөм радлунтöг. Абу, тыдалö, мортыд нэм чөжыс öткодь. Помнита, во кызь сайын Гудыр ты бокын жыдачөс лыйи лэбигас. Веськалі öд, изйөн шпаткысис ва вылас. Юр чашкаыс пазалöма. Гортö вайöм бöрын ачым и кушті, а жугалөм юрсö каньлы сеті. Сы бöрын дыр эг лыйлы некутшөм пёткаос. Быттö дзоя жыдачыд öлөдіс менö. Дерт, кулөмö гартчывлісны жö утка-мөд, но кызкö эзджык песны сьölөмөс: найос öд эг ме начкы.

Гөвкъяла вад вывті веткйөн, кыйкъяла, эз-ö нöшта кытчөкө коль виöм уткаыс. И эг весьшөрö гөграв: метр кызь ылнаын кы-

мын, видзёда, ва вылас съод шмак, вөрөшитчө, көсйө кыпөдчыны, но оз вермы.

Мый вөчан? Кутны да песовтны сьылісö — лов эз лэпты. Ылыстчи да медбөръя патронөн и... Ловъяыввсьыс кө кинад ловсö босьтан — неморт. Та бөрын пө, шуломәось, чорыд сьолөма мортыслөн киыс вермас косьмыны.

Матыстчи аслам ёртъяс дорө, кор найө чукөртчөмаось нин да гизьёны, нимкодьясьёны шуринолог бура кыйсьомөн: кызь кымын утка, дерт, сепыс кодъ ыджыд нопъяс эм, өдва и көртавысö вермөма юрийылөдыс.

4

Сэк кості мичаа нин югдіс.

— Но, зять, виддалам куломъясьномөс,— нуөдчө шурин.— А тэ, Шурик, мун берегөдыс да чеччалөмөн лайкйөдлышт кок увтө: гырысь ёкышъясыс, гашкө, эжөр шапка улас вугралөны. Садьмөд, вөтлы найөс.

Шурик муніс берег дорө, эжөр пөвстсьыс гырысь ёкышъясöс куломө вөтлө. Воськовтас кыкысь-куимысь, места вылас чеччыштлас... А ми шуринкөд петім ва вылө.

— Куломсö тай нө визув нуөма. Дзик берег дорас, эжөр бердас, лясөма,— шензьө шурин.

«Збыль, некытчө петысь-пырысь, сулалан ваа вад и — визув?»— чуйми и ме. Метр куим ылнаө өд берегсянныс вөйтлім. Кодкө мөд кө татшөмторсö висьталіс, шуи эськө, мися, коз пу йылысь тури эн висьтав. Но өд өтлаын вөйтасим.

Шурин кутіс лэптавыны куломсö, а ме ньөжйөник сына пелыс помөн бокныд, медым пыжным бокавыв жө и муніс. Чериыс пырөма куломас муртса абу быд синмө. Да кутшөм! Пөтшваннөй кельчи: видзөдлас серти, унджыкыс кило джын сьокта, вель уна и «пася» ёкыш, сой кузя сиръяс. Шурин первойсö мездасис, но сэсса, тыдалө, мудзис да шуө:

— Черинас и лэпталам куломъяссö, мездасям берегас.

Та мында гырысь кельчиыс меным эськө эз нин шедлы, но и йөзсянь эг кывлы. Мездасим ставным. Шурин да ме зіля керим ассьыным кыйөм ёкышъяс, солалыштім — шуринолог гөтырыс, тыдалө, төдөма ыджыд прөмыссö, абу жалитөма совсö.

Мездасьом помалөм бөрын шурин тшөктіс зонъяслы лөсьөдчыны петкөдны кыйдөссö мотовозөдз да бура меститны дзебасö.

— Уткаяссö тэчөй «КТ-12»-ыслөн бункерас, медым шыръяс эз чөсмасьны,— велөдө писö шурин.— Восьсаладорсö тупкөй көрт листөн, пыкөй звёздочканас. Сэн неылын туплясьö.

— Төдам,— спокоитө батсьö Шурик.

Зэв важ, нинөм вылө нин туйтөм да ковтөм трактор колясьяссö перъялөмны и пыр на шедөдлөны, коды мый вылө ковмөшогмө кө.

— Меститны прөмыстө, дерт, төдам кытчө, сөмын вот та мындасö кыдзи нюрөдыс петкөдам?

— Шойччышталігсор. Кокъясныд томөсь на и вынныд тырма на нин. Тіян локтөдз зять шыд пуас, а ме вуджавла ты мөдарас, сэтчө, тыдалө, некод на эз матыстчыв,— и шурин меным нин индасьö:— Став пөварскөй добраыс нопйын, тонө, пожөм ув вылас өшалө.

— Зэв нин уна пётка лои кыйома да кытчö нöштасö?

— Вывті гежöда лоö татчö воливлöмыс, а сэсся öд, юксям да, унаöн-ö воас.

Шурин босьтіс ружьесö, пуксис пыжас да тэрмасьтöг мөдöд-чис ты шөрлань. «Ноп тырыс нин пёткаыс, а этша на кажитчö»,— мөвпышті, но аслыс немтор эг шу.

Нюрсыс и чукөрті кос лөпсö. Уна ковмис келавны, öд и метöг тані бергавлөмны бипур пестысьясыд. Матігөгöрсьыс став кос пусö ломтöмны. Но коркө тай и би ломзьöді, и куим литра төрмөна пöрт öшöді мөтыр вылö. Көсийи пуыштны чери юква, но шурин став асья кыйöмсö мөдöдöма зоньяскöд. Помнита, дивитліс сэтшöм кыйсьысьяссö, кодьяс бипур дорын чöсмасясны пöттöдзныс: быттьö пö удзöдöны гортсасö. Ставсö пö колö вайны гортад, а вöрад и консервыс кылалас. Дерт, ме ськөд эг вöv сөглас: вөр-ваад гежöда петавлам, кыдз нö юкватöг либö пётка шыдтöгыс. Сэсся öд бипур дорын чöсмасьöмтö воясөн тай казътылан. Кыйдөссьыд пайкыштан кө, гортсаястö удзöдöмыд, гашкө, оз на и ло.

Мый тшөктіс, перйи нопсьыс: картофель, кык тубрас пачкаа шыд («брежнев шыдөн» шулісны), сов да лук на и. Вальыс пузьöм эз и ков дыр виччысьны: картофель весалігкості и кутіс дзулькйыны. Шыри вит-ö-кwait картофель, солалі поводнöя дай «брежневскöй супсö», кыкнан пачкасö, бузги пöртйö — мед, колөкө, пуас. Лөсьöдышті сэрапомьяссö, ветлі вад дор борйöдыс, чегьялышті сьöд сэтöр вожьяс, а сэсся лэччылі тшайникөн вала. Сэк кості шыд пузьöма, вылысас сурлөн кодь быг ворсö, пöйм на плавьялö и. Шыд пыдди рок сяма мыйкө артмөма. Мед нö, думайта, сук шыдыд пөтөсаджык. Шапка пельөн босьті пöсь пöртсö вугйöдыс, пункті нитш вылö, мед көдзальштас. Öшöді сэсся тшайник.

Том йöз эз на тыдавны, а шурин воис нин.

— Уткаясыс ыліті лэбалöны, казялöны менö да кытшовтöны... Пусин?

— Пуси.

— Артмис?

— Кывтö нъылыштан!

Видліс шурин рок кодь шыдтö да чукыртчис сідз, мый нырыс и вомыс öтлаасьліс.

— Солалін?

— Солалі.

— Но тай, скупитчыштöмыд жö!

Ме чайті, мися, шыдсö эз ло тырмымөн солалöма, да жмутки сэтчö нöшта пань джын.

— Öні, тыдалö, буретш,— шурин семдіс сералöмысла,— видлы ачыд.

Паньышті и ме.

«Аттö, сё дявöl, мый нö менам артмөма? Солыс горшö сатшис, нъылыштны ог вермы. Вөлөмкө, пачкөвöй шыдас эм нин солыс, а гижöдсö эг и лыдды. Гортын тьöща да гөтыр пусьöны, ме сöмын дасьсö сөйысь. Ог öд кут коймөд мортөн плита дорас бергавны.

— Шыд — шыд и эм!— синмөн эг лапнитлы.

— Со-ола!

— Ва содтыштам.

Мыжа да, кыдзкө колө мездысьны. Содті пөрт чукойоныс пуан тшайникысь ва — век на загыр сола. Кыськө кывлі ли лыддылі: позьё пö содтыштны сакар пызь... Кык пань тыр мында кымын кысты песоксö шыдö: век на соласыс-сола да нöшта и юмов.

— Öнi, колö лоны — буретш. Сöмын тай суқджык. Но да — пötöсджык.

Коркö локтісны и зонъяс. Мудзöсь, кынöмъясныс сямалö. Пуксим сёйны. Ме азыма паняся. Тимушев вокъяс кык-куимысь паньыштисны шыдтö, но нинöм эз шуны, уськөдчисны тшай вылö. Горшныс ёна косьмөм вылö ыстысисны. Паньыштис и Шурик. Писка мортыд öти пань тырсö эз вермы нылыштны, бергөдчис мөдарö, тыдалö, гусьон, мед оз ло янөдöма менö, сьöлыштис, да чай вылö жö вуджис. А ме син куньмөн вит-ö-квайтысь на паньышти.

— Неуна солакодь, но мужикыдлы сідзи и пöлагайтчö,— веськодпырысь шуи да нюлі паньöс.— Рушкуой воддза сёйомсьыс на тыр, да меным оз жö ков. Но чай кружкаыд төрас на.

Ёртъяс эз и пойгыны, сэтöра тшайсö сэсся нянь сорөн юисны сьöлөм бурмытöдзныс.

Луннас недыр шойччыштім да пырим нюрас турипув вотыштны. Эмаинысь вотчигад, да нöшта гырысь кө, сьöлөмнад кыпалан. Дерт, лунтыр кө «кокасян», коскыд ёна жö мудзас. Но кор гырысь молля сикөтшыс чукойон тыртас дозтö, мудзыд вунö. А гортад вайөм вотöсыслөн и доныс абу. Со тай нюр пасьталаыс, сэнi и танi, «Г» букваяс моз тыдалöны вотчысьяс. Медым оз ылавны, кодарын нюрсьыс петаніныс, кодарын асланыс нопъясныс, гежөдик ляк кыз пуяс да пожөм увъяс вылö öшлөмны ылөдз тыдалана пасьяс: газет лист либö еджыд дөратор.

Рытланьыс шурин чукөстіс ставнымöс нюрысь петаніно. Бипур öзтöма, мөтыр вылö ва тыра пөрт öшөдöма чай вылö. Матыстчим. Шурин перйис нопсьыс тшынөдөм гөс тшытш, тупöс джын нянь, вундаліс-шөраліс, юкліс быдөнлы öтмындаөн. Мөдысь пажнайтім, чай юим.

— Аттьö шуой нюрыслы да петамой сэсся Парч вад дорас. Миянөс и сэнi на кыйдöс виччысьö.

— А дышөдіс нин и эм нюрсö лойны,— шыясис Шурик.— Дозъяс тырисны и. Бур эськө, нöшта кө пув вотыштны яг вывсьыс, дона гөбъяс гөгөртлыны да. Эз на кынтавлы да, арыс, колөкө, и тшакөн на козыналас. Ми, зонъяс, петам мотоцикл дорö яг вылас да вотчыштам, сэнi кутам виччысьны тіянöс.

— Петой, инö. Но вотчиганыд ылö эн разөдчöй, мед оз ковмы корсьысьны да дыр чуксавны. А ми зятькөд Парч вад дорас войковтам, кулөмъяс на вой улас вöйтавам. Водз асывнас, югдөм бөрас, воам ті дорö.

Вад дінö воим, да шурин кутіс бара на вөршасьны ружьенас.

— Уна нин кыйим, да тырмас, буди?

— Войсö петалам на утка вылас. Зэв гежөда артмө татчö во-лывлөмыс.

— Ружьенад ме сэсся ог пукав. Патронъяс бырины.

— Но, сідзкө, биась да би дорас и пукав. Меным сійö маяк пыдди лоö. И бокөвöйяслы пас: «Татчань лыйлыны оз позь. Пукалоны чери кыйысьяс».

Шурин мунтөдз төрытъя моз жö эжөр пөлоныс вöйталім ку-

лөмъяс. А сэсса, өтнам коли да, вужля выlö вольсали кос нитшсö да эжöрсö — лоис небыд пуклöс. Майбыр, пукав да мөвпав, мый йылысь кöсьян. Пемдiс, да öзтi бипур. Узьöм, дерт, эз артмы. Сöмын на вугырта — ныр выlö, чужöм выlö тiньгигтыр пуксяс арся номйыс да чурмунтöдз на курччас. Вöтла — мöд нин зыньгö, пуксыыны места корсьö. И лыйсьöм шы дiнас велавны ог вермы. Ойбырта на сöмын, камöбтасны да, садьма, а сэсса бара вель дыр син оз куньсы. И бипурсö колö кадысь кадö лöдсавны.

«Абу тшыгöсь, а мый понда горшасьöны, сы мында пöткасö лыйлöны?— шензьöдö тайö.— Черисö мед нин, та ыджа вадсьыд оз быр, а пöткаыс öд лыда».

Асъявывсö мöдöдчылис шарöдчыны бус кодь дышиник зэр. Кötöдны эз көтöд, но вылыс паськөм лапыд лоис, ичöt би дорад ёна он шонав, йирмөг босьтö.

Асывнас, лöз югыдөн на, вад шöрланьсянь кутiс кывны пелысөн сьякөдчан шы, а сэсса и шуринлөн пыжыс тыдовтчис, беррег дорö сибöдчис.

— Бипурыд, зятё, бур ориентир. Вад мöдарсяньыс кытшлавтöг вуджи веськыда би вылад.

— Пыж тырыд, көнкö, шковöдiн?— юала серам сорөн. Тöдi, нинöм эз шед, лыйсьöмъяс вад мöдарсяньыс, буди, эг и кывлы да.

— Эз кыйсьöд тавой...

— А эстöнгъяс тай ёна гымöдчисны.

— Том йöзыд дуригмоз нем вöчöмысь на гымгöны, мед сöмын лыйöма, патронташсö куштöма. Дрöб-порок уна-ö кöсьян, сы мында и ньöб. Со и лышкыдасьöны, ошйысьöны удалуннас.

Көть тöрыгъяысь и этшаджык, вель прамöя на чериалöма Парч вадйыд. Пöтшваннöй кельчияс, кык весът кузьта ёкышгъяс. Кодлы эз мойвилы кыйны татшöм гырысь ловъяссö, сийö оз и тöд татшöм чериыслысь мичсö ни донсö. Парч вадйын сёяныс налы выlö тырмö, со и быдмöмаöсь, госсялöмаöсь. Киад босьтан, да йöрышаöсь, госаöсь — нилькъялöны. Сьöмныс эзысьөн дзирдалö, бордъясыс чим гөрдöсь, быттьö вымпелъяс, сингъясыс — зарни кытш пиын рубингъяс.

Шурин мездалiс черисö, кулöмсö пыжас вочасөн лэпталiгмоз, а сэсса и нопгъяс тэчис. Джын мындаыс кымын лои. Кыйсьöм бöрын кулöмгъяс öшлим вожкаа майöггъяс йылö: рудзöдыштны, косьтыштны. А сэк костi чай юыштiм, нурьясьыштiм мый колыштöманас, сэсса дасьтiм нопгъяс, вайлöм став көлуйсö сэтчö идралiм-меститiм. Медбöрын — пöшти косьмыны нин удитöм кулöмгъяс, да муртса югдiс — петiм туйö.

— Видза колян, чериөн озыр Парч вад,— бергöдчылöмөн öвтыштi киөн.— Коркö лоö-ö нöшта татчö волöмыс. Вола кө, ружьетöг нин. Вöралан путёвка да милициясянь разрешение — помассян выйын, а выльсö ог нин босьт. А черисö эськö кыйыштi на...



Любовь АНУФРИЕВА



Ловным визувтö орччөн...

* * *

Менам муза — ичöтик лэбач —
асъя кыакöд таркöдчис öшиньö...
Ми синмасим,
и доршасис синваным...
Ме сійöс лэдзи жугыль олöмам,
Зарни синва войтөн
Енмыс пернапасалис,
йитіс миянös...
Слабог, му вылын ме абу нин
ötнам...

* * *

Бötъяс — дженъыдик письмöяс...
Коді найös ыстö?..
Тайö коляс нöдкывйөн.
Мукöдлы сійö ковтöм юөр,
кыдзи кагалы
эновтöм чача...
А меным тайö письмöясыс вежаöсь,
ме виччыся найös,
синваöдз виччыся...
Корся сынöд водзö овны.

* * *

Кор шума карын
паныдася
Изъваса морткöд,
век вашка
изъва кывйөн.

И сәки быттö
зарни ваö
сунлö лолöй!..
И бара ловзя...

* * *

Мишалы

Сöстöм вöттö ог торк,
Узь, шондi кöчöй, узь...
А ме — кыйöда войыслысь
мунöм,
И садьмöда тәнö
шоныда окыштöмөн,
И выль лунлысь небöг
восьтам кыкөн...
А öнi, жалюкöй, узь...
лöня узь...
...Ме гөгөрвоа,
луныс вöли
сьöкыд
и кузь...

* * *

Хризантемаяс...
Тэнад хризантемаяс
бордъявлісны менö!
Лолöй тэрмасьö
помтöм-дортöм енэжлань,
и, чайта, ньöти лэбач
менö оз вид,—
найö гөгөрвоасны,—
талун ме збыльысь
шуда.

* * *

Юмов чöв-лөнъын
кылö
сöмын карандашлөн
кокньыдик воськолыс...
Татшöм здукас полан
весиг лолыштны,
полан торкны
серпасалысьлысь
югыд енбисö,—
сiйö чужтö портрет
мена́м радейтана
мортлысь...

* * *

Тэын — эм менам юкөнтор,
Меын — эм тэнад юкөнтор...
Олөм-ю кузя ловным
визувтө орччөн,
И өтчюд ми лэптам
шудысь керка,
көні олысьөн лоёны
миян дзоридзьяс — кагукъяс...
Налы ми мыччам
став шоныдсө,
став сьёлөм юмовсө...
И налөн кө нюмыс
дзордзавны кутас
да вежөдны...
шуам:
«Олөмсө эгө олөй
весьшөрө...»

❖ ❖ ❖

Дона лыддысьысь !

*Эн вунөд судзөдны «Войвыв кодзув» журналтө
локтан во воддза джын вылө.*

Доныс:

Редакция пыр

1 төлысь кежлө — 10 шайт.

3 төлысь кежлө — 30 шайт.

6 төлысь кежлө — 60 шайт.

Пошта пыр

1 төлысь кежлө — 22 шайт 51 ур.

3 төлысь кежлө — 67 шайт 53 ур.

6 төлысь кежлө — 135 шайт 06 ур.

Киль

В И С Ъ Т

Петыр Микол, сиктса юралысь, муртса на лэдзис гырк пытш-кас бипур вылын пузьёдом чай да мөвпаліс. Тані, Көч ёльпөлөн-са ягас, шуасны кө ныйыд кыв сиктсаяс, регыд кутасны зынь-гыны бензопилаяс, рутшка-ратшка пөрны пуяс, эргыны тракторъяс. Сійө мөдысь нин татчө локтіс, бара на лун пуктіс, медем нөшта видзөдлыны пөрөдом вылө урчитөмасө, да кывкөрталіс: мича вөрыс — кызвыннас пожом да коз, сор вылас сөмын кызъяс да пипуяс. Непөштө гид ли пывсян вылө — керка вылө на шогмана. Сэтчө жө и сикткөд орччөн: куим верстыд нө петкө-дантор?

Со и ыштіс ёльпөлөнса бура ыджыд вөр ді вылас вөр помысь бура дыр нин сьом дорысь «Еврос» фирма. Лесничөй Тима Педөркөд фирмасынь воысьясөс эськө кесйөдлісны ылөджык да егыраджыкинө, но, йөзыс тай шулоны, төвйылөм көчъяс нин фирмасыс — он ылөд. Ыліад, да нөшта кизьөрінъясад, туй вөчөм вылө сьом ковмас вичмөдны, дай шляпкун кызъяссьыд кубатураыд оз чукөрмы. Сідз тай и шуисны: он кө пө сетөй тайө вөрсө, ог и локтөй, водзө виньгыртөй.

Жаль, но быть сет, некытчө воштысьны. Сідзсө быттө бөръя кывйыс сиктсаяс сайын, кызди шуасны, сідзи и лоас, но сы ылө өд и юралысь, мед кызд тай меж бөрся ыжъяс котралөны, сідз жө и йөзыс сы бөрся вөтчисны. Петыр Микол төдө: өткымынъяс тшетшйысьыштасны да сы вылын и помасяс, кинысө лэптасны, мед локтас «Евросыс». Локтас кө сійө, кер дор удж да нажөтка сетас, а оз кө — и водзө лоө скөт да град йөр помысь гөлиника овны, судзсяна олөмсө сөмын киноысь видзөдны.

Фирмасө вайөдомнас Петыр Микол ачыс, кыз шуласны, водз-мөстчис. Öти-кө, юралысьө пуктөм бөрас көсйысьліс, мый кутас зільны сиктсалысь олөмсө бурмөдны. Мөд-кө, чутлісны бокас районсянь: мый нин Николай Петровичыс вөчө, мед бюджетө унджык сьом воис?

Деньгаа мешөк вайтөг да йөзлы удж сеттөг сиктныс абу морт ногөн олысь. Совхоз киссьөм бөрас, кор йөвтө керка помысь кутісны примитны, эськө уськөдчылісны йөзыс весиг куим мөс-көн видзны, но йөвсьыс зэв омөлика мынтысисны да, бөр эновт-чалісны. Ю кывтыдын и катыдын видзъяс рос йылө кайөны. Кар-тупельөн оз жө озырмыны. Ас районын ньөбысьыс абу, а кыськө волосны да, медся ыджыд доныс — килоысь куим шайт. Тешит-чөмөн тешитчөм артмө сиктса йөз вылад тадзтө, некутшөм яндзим оз төдны.

Тшак-вотөсыд эськө донаджык, да абу вогөгөрся удж дай оз

на быд во артмы. Уна выло кык төлысьнад во чөж судзсымөныд он нажөвит. Сэсся өд матігөгөрө ставөн уськөдчылөны да регыдөн и куштөны чөд-пувтө, а ыліас уналы нинөмөн мунны: пыж ни мотор, мотоцикл ни машина.

Пөгибө воштіс йөзсө и вина юөм. Оз тай быдөн сяммы кодлөнкө кесйөдтөг бергөдчыны. Урөсмыны кутіс сиктныс. Уджыд кө вөлі, эськө таdzi эз лэдзчысьны. Водзті өд юлісны жө, да эз татшөма, уджтө век төдісны.

Воддзасө и колис сөмын казтывны. Вель өд озыр совхоз вөлі. Мөс лысьтысьяс, кукань видзысьяс да механизаторъяс нимавлісны район пасьта. Вась Иванлы, кор на машинаяс вылад өчередын сулавлісны да өчередыс эз воы, картофелысь ыджыд урожайяс быдтөмысь ВДНХ-сянь «Москвич» вичмөдлісны, век на ловья мортыслөн. Мыйта трактор вөлі, скөт видзан гідьяс выльөсь сулавлісны! Асланыс киясөн өд и чашйисны пасаыслөн да чуньтөмыслөн кикимеритчөм бөрын. Коді мый дорө матө веськаліс, сійөс и кыкис гортас. Вежөрныс пемдыліс али мукөдсьыс сюсьджыкөсь вөліны? Некод жө и шуысьыс да өлөдысьыс эз лө: вай пө, ёртьяс, бур мортьяс, ог кисьтөй асланым киөн вөчөмасө, а водзө өтув олам ас выло лачаөн да, гашкө, мыйкө и артмас.

Петыр Микол том на сэки вөлі. Муртса помаліс техникум да бригадир-механикөн индісны. Дыр уджалысь трактористъяс совхозлысь эмбурсө юкытөдз на босьтчисны гаражнысө куштыны. Лун шөра лунө гортаныс новлісны эз сөмын болт ли гайка, а дзик на выль запаснөй часьтыяс. Ньоти эз вежавидзны Миколысь. Вомсө кө восьтіс, «мун татысь!» шулісны: эн пө кок улын бергав.

Өтувья овмөс киссьөм бөрас нин адззыліс Микол, кыдзи Кывтыдын ферма пасьвартісны. Мыйкө, буракө, эз юкны да өта-мөд вылас кулакъясөн (бур, мый эз черьясөн) уськөдчисны Ласей Вань да Öртем Петыр. Шапкаяс лэбзисны, кизьяс гылавлісны, вывкыш чуж-чажмуніс. Юж выло пув ваныс киссис. Мужикъяс өдва торйөдісны.

— Тэ, урөд, меным сюрлан на!— нетшкысис крепыд киясысь өтиыс.

— Юртө адлысь керала!— нетшкысис и мөдыс.

Висьтавлісны, мый и нывбабаяс пачесайтчөмаось, весиг өта-мөднысө лэзьясөдныс кыскалөмаось. Эм на татшөм модаыс таладорын. Прамөя велөдчытөм йөзыслысь нө кутшөм бур босьтан? Тангысясны кө, заторө веськалөм керьяс моз өта-мөднысө чегьялөны. Эн лөсьөдчы — и тэныд вермас веськавны. Шуөны, мый татчө, кор некод на олысьыс абу вөлөма, сэтшөм морт овмөснас да йылөмнас катлөма, коді йөзыскөд абу кужлөма овны. Код төдас, збыль абу тайө, но со тай мый вөчсьө.

Митрей помнитө чожыслысь висьталөмсө. Колхоз дырйи на Зосимлы да Прокөлы, өшинь уланыс дзоля град йөрныс вөлөма да, вадорысь му юкасны. Потшсьыны мужикъясыд босьтчасны. Зосим водзджык пажнайтны каяс. Прокө и ки вомлөс пасьта Зосимланьджык майөгсө сатшкас. Муртса удитас вешйыны — кыз тай колснитас майөгад. «Мелкашкаысь» Зосимыд стынсяныс лыяс, мед Прокө сыланьө эз кеж. Вот сэсся ов пө да и лөсьав татшөм йөзыдкөд.

Асьнысө төдөмыс жө и петкөдчис яг сетөм кузя чукөртчылігөн.

— Тэ нё, Николай Петрович, ачыд али абу? Мыйла нё йёз юрөн олан?— чеччис Миколлөн юёртём бёрын шөрвылын кымын пукалысь Кондрат Иван. Сійё ачыс коркё вёвліс сиктсөветса юралысьён. Татшём сяма чукёртчылёмъяс вылад пырджык медводдзаён кыв босьтліс, мед колана туйёд водзё сёрниыс муніс.— Көч ёль ягсё кө нё вундасны, көні вотчыны кутам, кытысь керка кер шедас? Дай чөс туйсё Онтөн Гришалысь торкан, мортыслысь олан гажсё мырдян. Сёрнитлін көть?

— Көч ёль ягён ог на помасьёй,— эз тшөтысь паныд сувтысь былё, а лөсьыда босьтчис висьтавын Микол.— Еремейысь на кызвынсё вотчанныд. А керка керйыд Джуджыд нёрысысь сюрё.

— Сы ыласьыд ачыд пөрөд да ваяв,— эз сетчы Кондрат Иван.— Дай нюр визяс сісь лежнёвкаыс вёйёма, трактор весиг оз өшйы.

— Век тіянлы дядьё колё. Посйёй, дай өшгяс,— дözмыштіс Микол.— Жель он бергөдөй да мед мыйкё лоас.

Тайёс эськё эз ков шуны. Кондрат Иван нэмсё зіль вөлі да омөльтөмтө эз лэпты, чушкисны сійёс тайё кывъясыс. Сійөн и водзёс босьтіс:

— Төд, мый шуан. Бус пиын на пуркөдчан вөлі, кор ме кер дорын нин зульски.

Кондрат Иван дор сувтіс Епим Ёгор, коді водзті вөлі лесникөн да бура төдіс, кутшём вөр мый дон сулалё.

— Көч ёль бөрад локтысьясыдлөн синныс Мегыра мыльк былё чашкалас. Мый кольыштліс, өстаткисё гуръясны. Помнитлөй менсьым кывъясёс,— өлөдіс сійё пукалысьясёс.— Мед туй вөчөны да Конда куш сайё пармаас пырөны.

— Сэтчө ми ог мунёй. Туй вөчөмнад зэв дона вёрыс сувтас да некод миянлысь оз ньөб,— пыр и вочавидзис «Евросса» мортис, коді висьтасьліс Руслан Владимировичён да пукаліс пызан сайын лесхозса директоркөд орччөн, йөзлы воча.

— Зэв тай кокниа овны көсьянныд. Код нё тіянөс тадзсё велөдіс?— чеччыліс пуклөс вывсьыс вёвлөм велөдысь Александр Михайлович.— Грөш ни көпейка он көсийёй пуктыны, а курыштын көсьянныд ставсё?

— Ми өд мырдөн ог вөзйысьёй. Асьныд шыөдчинныд: удж пө йөзлы колё,— бара на шыасьліс «Евросса» морт.

— Дерт, колё, вотчөм помысь и олыштам да,— гөлөс сетіс Опөнась Толя.

— Мөссьыд мед эн лэдзчысь дай,— вомаліс сійёс Петыр Пиля.

— Дугөдіс тай: ытшкөмысь вештысь, турун вайөмысь вештысь, комбикормыд зарни дона.

— Некод оз тшөкты тракторён ытшкыны да вайны. Йөзыс со век на гөрбуш косаён өвтөны да вөлөн ваялөны. Дыштө эн пес дай,— асланыс синіс Петыр Пиля.

— Дугдылөй асланыд турунөн,— өлөдіс өддзысьясёс Микол.— Тані мөдтор йылысьджык сёрниыс мунё.

— Комын мортлы, шуанныд, уджыс вичмас? И ставыс миян сиктса?— юаліс нисьё аслыс шуис магазин кутысь Олёш Веня.— Нинөм тані и думайтнысё: сетны колё Көч ёль ягсё, мед йөзыс көть денгя серсё аддзыласны.

Сійё и гөгөрвоана: Олёш Веня төждысис ас вөснаыс. Йөз

ки вылын кө лоо сьом, то ёнджыка ньобасыны кутасны да унджык барыш аслыс лоо. Кык лавка од сылон, Кывтыдын и Кавтыдын. Тайос тай и пасйис школаса директор Валерий Павлович:

— Тэ эськө, Вениамин Алексеевич, аслад зеп вöсна висян, да прав: йöзыслы нажöтка колö, мед эз коньöрөн овны. Уджтöгыд, кодлөн кутöдыс абу, дзикöдз юсисны. Челядьныс тшыг нисьö пöтöсь, коньöрьяс ритки-ротки паськöмөн ветлöны, водзö велöдчыны оз вермыны. Мича, нинöм ог шу, Кöч ёль ягыд, но йöзыслөн синва дон оз сулав. Колö сетны, но стрöга видзöдны, мед эз пасьвартны, а лöсьыда босьтисны вöрсö, мыйкö на и колисны.

Директор бöрын тувсовъя шорөн письтисны и мукöдъяс. Бура дыр на сёрнитисны, öти пельöсöджык мачсö суйисны. Гölösуйтисны да, вөр сетöм вöсна ки лэптысьыс унджык лоис морт комыньсыс. Этшаөн тай öнi воывлöны сёрни вылад. Нинöмлы нин оз эскыны йöзыс.

— Но и юр жö тiян,— дивитис сиктсаös Кондрат Иван.— Эта мындатö од колыштö жö гөгöрвоны: кодкö, дерт, нажövитас, а ми прöживитам, потöм вор дорö колям!

Но сылон броткöм кодь нин артмис, йöзыслөн мышкö висьталöм. Быдөн тэрмасис петны, быттьö дзик ковтöм сёрни вылö веськавлis, изки костö сюрлis.

Гöсьтъясös — «Евроссьыс» мортсö да лесхозса директорös — Микол нуöдлis гортöдзыс. Кыдз нö он, татшöм бура вöчисны да?

— Тi, Николай Петрович, видзöдöм серти, збыльысь йöзлөн тöждъясөн оланнyд,— румка-мöд пöрöдöм бöрын ньылыдалis Руслан Владимирович, кодi юансö и закускасö лэптis ассъыс, стöчджыка кө шуны, картон көрöбын пыртis шоперыс. Видлis эськö бöрынтьны быдсяма чöскыдторсö Микол, но фирмач эз сетчы. Со и юисны коньяк да пинь улö йöткышталisны топöдöм яй да чими чиг.— Уджтöгыд да сьöмтöгыд налы зэв сьöкыда овсьö. Ми бура мынтам, мед сöмын уджалöны. Бурджыкъясös отсалöй бöрйыны, вина юысьысыд миянлы оз ковны.

— Зиль йöзыд эмöсь, аддзам,— воча мунis Микол, кодi, дерт жö, вöли рад, мый ставыс татшöм бура помасис.— Пескөн отсыштöй. Сись вöрсö да йывъяссö од он, көнкö, нуöй.

— Кутшöм сёрни! Сидз сетам, некутшöм дон оз ков. И сьöмнад «социалкаыдлы» отсыштам.

— Договор од кырымаланнyд, ставсö инданнyд,— быттьö ставсьыс унджык тöдis лесхозса директор.

— Öбязательнö! Печать пуктöмөн, ки кутöмөн,— шмонитis ли збыль шуис банйыштöм нин чужöмбана Руслан Владимирович.

Банйыштis, буракö, и ачыс Микол да сидзжö бура уна ньылыд кыв аддзис гöсьтъяслы налөн мунтöдз. А мунöм бöраныс ас вылас дöзмис да гöтырыслы кывмөн шуис:

— Гашкö, и прав Кондрат Иваныс. Бöбйöдласны, збыльысь потöм вор дорö колям. Вывтi нин мавтисны, муртса мылöд эз босьт.

Сийö арнас ёна на вотчисны Кöч ёль ягсьыс, пув зэв бура артмылis да. Горулысь матыстчылöм коммерсантъяс йöзсö машинасыс новлöдлöмөн быдсөн вотчöдисны. Асывнас нуасны ягöдзыс, сэнi и примитасны вотмасö, мынтысясны да бөр сиктöдз ваясны.

Микол öтьведайтlis да, Öнтөн Гриша, Кöч ёль яг кытшовтысь,

Семен лун бõрын, кор лõньштис пув вотысьяслõн ува-авакылõ-мыс, сиалис чõс туйсõ. Тõдтõг, дерт, эз ов, мый фирмасаяс матыстисны нин ягас вõр лэдзысьяслы юр сюянин, кутшõмсюрõ кõр-та кõлуй, бура ыджыд бõчкаын ломтас да весиг трактор, индисны став тайõ эмбурсõ видзысьõс. Эз на, кõнкõ, чайт, мый кынмытõдз да лым усьтõдз босьтчасны уджõ.

А кык вежон весиг эз коль пелысьысь гõрд розъяссõ Гришалõн кõртавлõм бõрын, Кõч ёль яг воддза моз мичаа шыалõм пыдди кутис эргыны да таргыны. Некымынысь и удитис, кõнкõ, кыйны кõзяиныс кытшовсõ. Дерт, эз мича кывъясõн казътыв ягсõ йирысьясõс да сийõс, Миколõс, налы вõля сетысьõс.

Паныдасисны сæssя Гришаыскõд. Эз сиктын, а сийõ жõ Кõч ёль ягас, стõчджыка кõ, бура паськыд нюр визьõн торйõдõм дй вылын. Йõзыс, буракõ, чайтисны, мый гõгõр нюр, да тайõ дзояник, õтилы сõмын вотчымõн дй вылас эз вуджавлыны, а гырыськодъ нин тилляс дзик быд во пувйыс артмылис. Лым улõ сюртõдзыс дзикõдз нин сьõдõдõмсõ да юммõмсõ Микол вотлис, ноп тыр лэччõдлис.

Таво сзтысь жõ кõсйис тепйыны, но кодкõ копрасис нин. Тайõ вõли õнтõн Гриша. Ружьесõ пу бокысь казалис да весиг повзъыштис Микол, но Гриша сийõн вõлтõшитчыны эз кут, матыстчис сёрниõн.

— Кытысь локтін, бõр мун, пиõ. Бур мортлы эз вõв жаль, а омõлыды нинõм тані вõчны. Батьыд тусь вõли, а тз — сõмын киль,— быттõ важõн нин мõвпыштлõма, шуис Гриша. Микол эськõ мыйкõ шуалис жõ, но асьõ кылис вõсни ньõрйõн швичõдõм зонкаõн, кодõс кутшõмкõ мыж вõчõмысь, гачсõ лэдзõмõн, дорын узьны велõдõ пõчыс ли ыджыд мамыс. А Гриша содтис на:

— Кыкõнõсь ми тані да веськыда висьтала: дзенгыны эськõ кõсийи морõсад да гыбадас и сюйны, да шонъянõй батьыдлы аттõ висьтав: другасьлим ми ськõд.

Кõдзыд ваõ быттõ дзумгисны Миколõс тайõ кывъяс бõрас да гортас воõм мысти бура дыр на эз шонав.

Олõма йõз водзас бõрынджык яндзим лоис. Кõч ёль ягсõ вурварвõчисны, да некод сы помысь ыджыд бур эз аддзы. Удждоныс йõзлы сюрс шайтысь вылõджык эз кайлы. Отчыд ли кыкысь школалы дзояника сьõм сетыштисны, сийõ и отсõгыс лоис. Шогмытõм песнысõ, дзик нин чукыль-мукуль йывъяссõ, весиг дон вештытõг некод эз окотит босьтны.

Сийõ на бур, мый Микол суд улõ эз сюр. Ягсьыс позьõ вõлõм пõрõдны сõмын косьмõм да мисьтõм пуяссõ. Лесхозса директорлы фирмасаясыс, буракõ, лапа вылас бара уна пунктõмаõсь, да торкõма законсõ. Эз пуксьõдны, но чина улõссõ воштис.

Микол вõзйысис петны удж вывсьыс, да эз лэдзны, сõмын бон-бус пинялисны. Эз и õддзы сæssя: кытысь нõшта татшõм удждоныс сюрас?



Морт олөм

* * *

Му вылын чужöмьд — медводдза дой,
Джынъя дой... Юксьö öд кык вылö.
Медматыс войтырлы лун шör көть вой,
Шуд войтөн, радлунөн югзывлö.

Окма да эхмаьд — збыльысь кык чой,
Мöвпыштчан — весигас повзылан,
Кымынысь олігад кувсьылан, ой!
Кымынысь мöд мортөн ловзылан.

Му вылысь мунöмьд — медбөръя дой.
Юкысьыд эм, да оз юксьывлы.
Медматыс войтырлы луныс — сьöd вой,
Шогөн да синваён пуксьывлö.

* * *

Олөм чужтысь-кисьтысь,
Лов пыдзралан кадöй,
Пелысь розйөн муслун
Кисьмö тэнад садьын.
Юмов тусьөн тöлын
Видзöдластö кыскö,
Аддзылан-ö, видлан
Мöдладорысь кыскö
Сылысь воём мичсö,
Курыд-юмов көрсö,
Кусысь шондібанөн
Пöжөм биа гөрдсö?

* * *

Ыджыда лолыштан,
Сьöd уджö босьтчан.
Лов петтöдз мудзан да
Бара на шойччан.

Мортыдлөн олөмыс,—
Шулывліс пöчö,—
Удж да гаж, нянь да сов,
Лов шедöдөм-лэдзөм.

* * *

Гашкӧ, збыль нин вывті ӧдйӧ мудза,
Весиг ун оз содты мич да вын.
Веравлӧ на ловби — зарни рудзӧг,
Сӧмын кӧні биыд, сэн и тшын.

Янӧд, кыв кывзытӧм сьӧлӧм, менӧ,
Кодыр колӧ кынмывны, тэ — сыв.
Та вӧсна, дерт, тэнӧ дойыс венлӧ,
Топӧдлас, да вошлӧ веськыд кыв.

Кадыс сывны-овны пыр оз тырмы,
Лолӧн век на челядь руа ныв.
Чайта, вынӧй-бордӧй кутас бырны,
Аддзыяс на кодлӧнкӧ пӧсь сыв.

Олӧм кринча пыдӧсын ме сукта
Нӧк моз ассьым лача, мый кӧть шу,
Вый тупыльӧй шондіӧн кор югдас,
Мыччысьлас на олӧм гаж и шуд.

* * *

Ог нин сыв ме тэнад сывйын,
Сотчывлі нин лежнӧг биын.
Сола ва пыдӧсын пӧдлі,
Шома кӧр,
Юм,
Курыд тӧдлі,
Тӧвся пелысь розкӧд рӧдми.
Ассьым шог ог кӧвъяв тэд ме.
Менсьым кок туй эн и таляв,
Эн и видзӧд мелань жалӧн.

* * *

Збыль тай нӧ — велавсис тэ дінӧ,
Ветлысьӧ-мунысьӧ,
Важӧн ог виччысь нин локтӧмтӧ
Войясӧн, лун-лунӧн.
Петігад пернапас чӧвта да
Нюмвежа: «Мун, инӧ...»
...Ӧтисянь мӧд дінӧ ветлӧдлысь,
Чиган кодь муслунӧй.

❖ ❖ ❖

Медводдза воськовъяс

Гожся университеткӧд лыддьысьысьяс тӧдсайсь нин, весиг, чайтам да, торъя паськыдасӧ висътавны оз ков. Быд гожӧм енбиа челядь волывлӧны Сыктывкарӧ велӧдчыны гижны литература да журналистика юкӧнъясын. Дерт, оз на ставлӧн артмы сідзи, кыдзи окота аслыныс. Ӧд тайӧ сӧмын на медводдза воськовъяс. Тӧдчана сійӧ, мый быдӧнлӧн тыдалӧ нин биторйыс, кодӧс ӧзтіс Енмыс гижан сямас. Журнал редакция чайтӧ коланаӧн йӧзӧдны литература юкӧнын зільысь том войтырлысь ӧткымын гижӧд. Гашкӧ, и мукӧдыс, на вылӧ видзӧдӧмӧн, тиӧтчи ыштасны гижны да вӧчасны жӧ медводдза воськовъяссӧ. Бур туй, том ӧртъяс!

Ольга БАЖЕНОВА,
Кӧжмудор сикт, Емдін район

* * *

Пасьтавны, гашкӧ, мен шонділысь югӧрсӧ,
Петавны ывлаӧ, дзоридзсӧ садъмӧдны?
Тӧвруыс лэбӧдас налысь сӧзь вугырсӧ,
Палялӧм вӧр-васӧ выльысь мед падмӧдны.

Котӧрта ва дорӧ черисӧ пальӧдны,
«Видзӧдлӧй, шондіыс важӧн нин чеччӧма!»
Горӧдны радпырысь, пыр жӧ мед садъмӧдны.
Черияс ме бӧрся ю вывті вӧтчасны.

Любуйтча чеччысь да палялысь ю дорӧн,
Кылала тӧ дорӧ, вугралысь мортанӧй.
Котшкӧдча меліа нюмъялысь югӧрӧн.
Талунсянь, мусай, тӧ дорын — гортын ме.

* * *

Пӧттӧдз ме окала мулысь пӧсь чужӧмсӧ,
Содз тырйӧн гумовта синвасӧ-юяссӧ,
Восьтышта кыалысь, шонділысь чужӧмсӧ:
«Выльысь тай воин нин?» — меліа юасӧ.

Мырпомӧн чӧсмася — сотыштас мичлуннас,
Кельчисӧ кыя кӧ — жбырнитас эзысьнас.
Ки пыдӧс шонтышта шондіа лунъясас,
Лунъясысь шондіыс лысвасӧ сӧдзтыштас.

Ышловзяс нораа арыслөн съөлөмыс.
Мыйла нө вошөма гажаа сьылөмыс?—
Вотөссө өктігмоз юала колиплысь.—
Чөв олө вөр-валысь съөлөмсө мольөдысь.

Пужъялас горт дорын быдмысь том льөм пуыс,
Лызь туйөн вевттыяс едждөдөм вөр туйыс.
«Бара нин унмовсин?» — «Бара нин кад»,—
Сёрнитам вөр-вакөд, корсьыям лад.

Лымйыс нин визувтө юясө шоръясөн.
Воисны дзодзөгъяс. Веж мича коръясөн
Вевттысис льөм пуным. Шондіыс рад —
Гажаа вочалө тулыслысь кад.

* * *

Көсьян, судзөда тэн шонді?
Медым югөръяснас шонтө.
Көсьян, вольсала тэн войсө,
Медым мойдас мелі мойдсө?

Көсьян, козьнала тэн сьылан,
Медым вөлі сөстөм, мыла?
Медым съөлөмтө эз шогөд,
Медым радлунтө эз орөд?

Көсьян, петкөдла тэн кья,
Медым окыштас пось киад?
Көсьян, кодзув тэныд сета?
Пукты сійөс морөс зептад.

Көсьян, Эжва юсө вая,
Лыдтөм чери өти сайө?
Көсьян, сета съөлөм ассьым...
Гашкө, тэкөд өтлаасям?

Педөр Иван ылаліс...

Педөр Иван ылаліс. Чөд вотіс-вотіс дай ылаліс. Чатөртліс пемьд енэжлань юрсө — шондіыс вошөма, гудыр кымөр сайө дзебсьөма, оз на регыд пет, гортлань туй оз петкөдлы.

Уськөдчыліс Иван сэтчө-татчө — оз аддзы туйсө. «Час, кызь-ясланьыс ветла — сэн быттьө югыдыс тыдалө»,— чайтө. Мөдөдчис сэтчө. Увьяс кок улас трачкөны, чальяс чужөмсө сарпалөны. Муніс-муніс, да видзөдө, воліс нин татчө, аддзыліс тайө вужляяссө, тайө мисьтөм козсө. «Вөрсаыс ышмө, ворсөдчө мекөд, оз көйы гортө лэдзны. Мый ме сылы лөксө вөчи?»— бөрддзис Иван. Пук-сис мыр вылө, оз вермы водзө мунны, сьөкыда лолалө. Друг быттьө мыш саяс воськовъяс кылісны. Иван песовтчис бөрлань, видзөдө — некод абу. Казьтыштіс зон, мый мамыс вөлі висьталө: «Пиук, нечистөйыс кө повзьөдас тэнө, молитватө лыдды да пасъ-

ясь. Господь батюшкоыд мед видзас тэнö». Иван лыддис «Отче наш» да куимысь пасъясис. Эз отсав. Полö Иван, пиньыс зябакылö, кийс дзөрö. Оз отсав роч Енмыд коми пармаын, вöрыдлөн аслас көзяин эм.

Друг мыр дорын сулалысь ведра вöйыштис нитшкас, лямунис. Видзöдö Иван — гырысь розьяс ведраас артмалöны, бытьö кодкö пуртөн бытшлалö көртас. Повзис зон, мый вынсьыс горöдны көсйö — оз артмы кылыс. Чеччыштны көсйö — оз кывзысь кокыс, кисö оз кыв. «Но и пöгибö ковмас вошны татчö. Мый лоö — ло!» — эновтчис Иван, виччысьö, мый лоас. Друг пельпомас кодлөнкö кийс инмöдчис. Зонлөн сувтис сёлöмыс, синмас ставыс кылаліс, оз лысьт бергöдчыны. Кыліс ас дорсьыс воськовъяс, зэлаліс, виччысьö вачкөм. Но некод зонмös эз варт, а син водзас сувтис еджыд паськөма, ыджыд туша, югыд нывбаба. Сійö кутис киöдыс ичöt зонкаös, коді вöлі коми вöралысьлөн паськөма, киас пурт. «Тэ нин сійös прöстит, зонмö, ведрасьыд — ышмыштис неуна», — нывбаба шуö, зон вылас индö. «Коді ті, кытысь?» — Иван чуймöмысла öдва кывнас легöдö. «Ми чудъяс. Важөн, кор Перымса Степан локтис татчö, эг сетчöй сылы, эг вежöй енъясös, гуалім асьнымös чужан муö. Ми тöдам, мый тэ вөр-васö радейтан, сійөн петкöдчим тэныд, эг лэдзöй гортад, мед тöдмалан ми йылысь да висьталан ставныслы, мед оз вунöдны миянös, мед видзасны чужан кывнымös, эн сетчöй бокöвöй войтырлы, увтыртöны кө найö кывнымös — эн сетчöй. Эг öд прöстаысь ми кольöй тайö мусö — эг сетчöй ми некодлы. Но эновтчыны — тайö зэв кокни. Тіянлы колö лоны ёнөн, зэв вынаөн, мед венны став сьöкыдсö, мед рочъяс пöвстын эн вунöдö рöдвуж да пöль-пöч йывсьыд. Мун гортад да казътыв миянös, да менсьым висьталöмсö». Нывбаба клопнитис кинас да вошис пиыскöд сынöдас... Кодлыкö, гашкö, петкöдчас на.

Наталья ВАНЕЕВА,

Черныб сикт, Удора район

Черныб сикт

Медся дона меным
Аслам чужанін.
Черныб сикт дорö
Муслунö оз чин.
Тані тшак и вотös
Керка сайын дзик.
Сöмын мыйкö том йöз
Эновтöны сикт.
Сиктын миян шлывгö
Мича, сöстөм ю,
Нимсö пуктылöмны
Сылы Мозын ю.
Кöсъя налы шуны,
Муртса нин ог бöрд:
«Коді сиктысь мунліс,
Öдйö воёй бөр».

* * *

Синтö ёрö эзысь тола,
Войпöль бушковъясыс волас.
Ошлы майбыр — узь да узь,
Тöлыд бара на зэв кузь.
Сьöлöм вылын кыпыд лоис,
Дерт нин, тайö тулыс воис.
Дзоридзалö льöм пу сад,
Быдöн тулысыслы рад.
Гожся кадö медся бур
Зонпоснилы гажа лун,
Югыз шондi небесаын,
Челядь уялöны ваын.
Зарни платтьöаöсь пуяс,
Со нин кушмöмаöсь муяс.
Бөрö колис гожся жар,
Воис уна рöма ар.

Ирина КРУТОГОЛОВА,
Щельябöж сикт, Усинск район

* * *

Тэ вöлiн меным муса,
Но сьöлöм тэнад кусi,
Öд пörъялiн тэ менö,
И йöртчи керка стенö.

Тэ сьöлöм менсьым косьтiн,
А сэсся тадз жö восьтiн
Мöд коньöр нывлысь сьöлöм,
Тэ зывöк руа вöлöм.

Ме радейта зэв тэнö,
И медбур кывъяс дасьтi...
Тэ пörъялiн эн менö,
А пörъялiн тэ асьтö.

Войвыв вөр-ва

Меным войвыв вөр-ва медся муса,
Сöмын сийö висьталас пыр мен:
«Тэ эн бöрд, öд ставыс коркö кусö»,
Бытьтö кöсйö отсавны и тэн.

Кызд пу меным ассъыс корсö мыччö,
Вöрын талун абу шы ни тöv.
Зарни шондi талун мекöд йитчö,
Медым козьнавны мен ассъыс мича кöv.

Аттьö тэныд, мича, шабді шонді,
Кужин юрын вежны менсьым мөвп,
Талун лёксö вунöдны ме понді...
Думышті, мый овны — колö, дерт.

Еджыд морт

Водз асыв. Шонді сöмын на заводитö кавшасьны лөзов енэжö. Став йöзыс сиктын узыöны. Сöмын Öнöсь баб думыштіс ветлыны талун вөрö мырпом ватыштны дона нучкаыслы. И гусьон асывводз, чай юигөн кайис вöрад. Мунö вөрті сьылгмоз, чöскыд сынöдсö апалö, и шонді ворсö бабкөд зарни югөръяснас.

Ставыс лөсьыд, сьölöм йöктö, Öнöсь баб вотö мырпом.

И друг... шонді саяліс, төвзысис сэтшöм ёна, мый весиг юрсиныд сувтса сувтлас. Син ни пель. Öнöсь баблөн сьölöм усис кок пыдöсöдзыс, вомыс восьса, быттö дзоляник лэбачлөн моз, сöмын нинöм оз шу, сэтшöма повзьöма, но сьölöм кык пöv öдйö кавшасис бөр ас местаас, кор сійö аддзис ыджыд, еджыд, зэв гөна мортöс. Еджыд морт сылы шуалö: «Тарука, мый эськö шутлялан менам поз дорті, вай дзимлясь менам вöрысь!» И Öнöсь баб, көть нин, дерт, вöлі пöрысь, лэбзис туй кузя еджыд юсь моз. Котöртö, но сöмын некыдз оз во гортöдзыс...

— ...Бабук!— шыасис Аннуш нучкаыс...— Вай паляв, мый нö сэтшöмсö вöтасин? Мыйкö тай беда ёна кокъяснад чужъясян. Кодыськö пышйин али мый?..

Öнöсь баб восьтіс синсö и нинöм эз гөгөрво. Мыйла нучкалөн кылö мелі гөлөс, а син водзас пыр на ставыс еджыдкодь?

...Сійö, вөлөмкö, некутшöм вөрö абу на и кайлöма, пыр на куйлö небыд вольпасын. Со мый овлö мортыдкөд, кор сёр рытöдз мөвпалан, мый кутан вöчны аски. Сійöс сэсса и вöтасян.

Евгения ЛЮТОЕВА,

Вылыс Воч сикт, Кулөмдин район

Юсьяс

Тыысь аддза, кыдз пуксьö гөрдов шонді
И ватурункөд ворсö ышмысь гыа.
Ме быттö сыкөд öттшöтш ворсны понді,
Кор куни синмөс гылөн дурөм шыас.

Друг пельөдз воис бордлөн кышакылөм.
Да тайö юсьяс пуксялісны тыö!
Со öти юкис мөдкөд сьölöм кылөм...
И ты нин гыысь мича көса кыö...

Но лыйöм шы со другысь кыськö кыліс.
И öти юсьлөн ньöжйö уси юр...

Ӧд татшӧм этша сійӧ оліс-выліс!
А сэтшӧм сылӧн олӧм вӧлі бур.

А мӧдыс, нора бӧрдӧм сорӧн, лэбис,
Но колис виӧм юськӧд асьыс лов.
Ӧд сійӧ, кызди некод, бура тӧдіс,
Мый тайӧ юсьтӧг оз нин нинӧм ков.

* * *

Тэ мен век на медся дона, муса.
Оз вун тэнад югъялана син.
Радейтчӧмьд тэнад, аддза, кусӧ.
Сӧмын менам радейтчӧм оз чин.

Тӧда: мӧд нин тэнсьыд сьӧлӧм шонтӧ,
Он нин меным мича кывъяс мойд.
Сылы, муса зонмӧй, тӧд, он ков тэ...
Жугыль синмысь бара усьӧ войт.

Копырӧн

Шаня, меліа и чӧла
Меным сӧдзтін асьыд сям.
Кодлӧн тэнад кодъ жӧ сьӧлӧм
Му вылас эм, дона мам?

Пусян, пӧжасян и вурсян,
Дзик став уджсӧ вӧчан пыр.
Аттӧала тӧлксьыс, бурсьыс,
Сиа овны дырсьыс-дыр.

Копыртчывла муыс дорӧдз,
Авъя мамукӧй, ме тэд.
Ӧкта сывтыр видз выв дзоридз,
Козин пыдди вайны мед.

Муса челядьдыр

Муса челядьдырыд
Некор тай оз вун.
Казытылана сэтысь
Дзик быд югыд лун.
Кӧть и тулыс-арыс
Ывла вылын няйт,
Брӧд ва локтан гортад,
Висьмыны он чайт.
Тӧлын тола пиын
Собалан рытбыд.
Гожӧмбыдӧн воштан
Купайтчӧмлысь лыд.
Мамным кӧть и видліс,

Дурёмысь эз кут.
Төдіс: таысь миян
Челядьдырся шуд.
Ворсөмөн да гажөн
Кылөдім нянь-сов.
Ыджыдось көть важён,
Сэні век на лов.

Чужан му

Чужан муыд мортыдлы век дона.
Мунан ылө — бөр нин кыскö ёна.
Тані ставыс ичөтдырсянь ас:
Сөстөм нюръяс, югыд кыддза рас.

Радейта ме ассыйм Чужан муёс,
Лунысь лунö тайö муслун туö.
Бөр-ва тані быттьö мелі ань,
Быдөн дорö сійö лышкыд, шань.

Тан коми йөзлөн медся мича кыв,
И юргö, быттьö мелі сыланкыв.
Коми кывтö сьölөмсяньыд видз,
Сійö миян медся югыд мич.

Коді медся ён

Өтчыд Олюк муніс вотны чөскыд вотöс. Пырис вөрö, өктысьö. А вотöсыс сэтшөм чөскыд да юм! Сярвидзö вөр пасьтала. Олюк-лөн чуманыс тыр нин, а сійö пыр на водзö вотчö. Эз и казяв, кызди пырис пыді вөрö. Друг став вотöсыс воши, быттьö эз и вöвлы. Ёна повзис нывка. Сöмын сэки казяліс, мый сылөн вывті ылö мунсьöма. Горзö Олюк, отсөг корö. Сэки пуяс сайысь петіс Вöрса. Матыстчис сійö нывка дорö, мырддис чумансö да шуис: «Ме тэнö аслам оланінö вайöді. Öні тэ татысь он пет». Олюк, дерт, медводз повзыштліс, но сэсся збоя вочавидзис: «А менö бабö велöдіс, кызди колö Вöрсасыд мынтöдчыны. Сылөн шуöm серти вöча да и аддза гортö мунан туйтö». Скöрмис сэтчö Вöр-саыд: «Ак, тэ сідз! Чайтан асьтö медся збойөн да ёнөн?! Часлы, ме тэд петкöдла!» Пöльыштіс Вöрса Олюк ылө, и сійö син водзас дзоляммис. «Но,— шуö Вöрса,— көні нö öні тэнад смеллуныд? Мун öні гортад, гашкö, ичөт акань пыдди керка пельöсад пук-тасны». А аслас серамыс петö. Бөрддзис сэтчö Олюк. Синваыс киссьö, бөрдөмсьыс дугдыны оз вермы. А Вöрсаыдлы нö мый — пыр серам. «Ми тэкöд со кызди сёрнитчам,— шуö сійö.— Аддзан кө тэ сійöс, коді ставсьыс медьён, ме тэнö бөр ыдждöда да инда гортад мунан туй. Но тэныд кө медьёныс оз сюр, кольчан тэ татчö да кутан став олөм чöжыд ветлöдлыны вөр кузя. Сöглас?» Олюк чышкыштіс синвасö да вочавидзис: «Сöглас». Вöрса серöктіс да вошис пуяс пöвстö.

Ветлöдлö Олюк вөр кузя, корсьысьö медьёнöс, а ачыс думай-тö: «Кытысь нö ме сійöс аддза? Ковмас нэм чöж тадзи ветлöд-

лыны». Лэптіс нывка шонділань юр да юаліс: «Шондіой, гашкө, тэ медъёныс?» «Абу ме,— вочавидзис шонді.— Кымөр меысь ёнджык. Локтас, тупкас менё, а ме немтор вöчны ог вермы. Сылысь тэ юав». И збыль, матыстчис шонділань кымөр да и тупкис сійöс. Сэки Олюк юаліс кымөрлысь: «Шонді шуис, мый тэ медся ённас лоан. Сідзи абу?» Вочавидзис кымөр: «Меысь ёнджык төв. Пöльыштас сійö, да и ме лэба кытчöкö ылöджык. Сылысь тэ юав». Лыбис төв, и кымөр лэбис ылöысь-ылö. Олюк юаліс төвлысь: «Кымөр шуис, мый тэ медъённас лоан. Сідзи?» Төв вочавидзис: «Ме ставсьыс ён! Вот öні пöльышта, да тэ кымөр моз жö лэбан ылö-ылö!» Öтчыд пöльыштіс төв, сэсся мöдысь, но нывка весиг места вывсьыс эз вöрзыйв. Скöрмис сэки тöлыд, сьöлыштіс да водзö муніс кымөръяс вöтлыны. А Олюкы сэки дум юрас воис: «Сідзкö, ме лоа медся ённас? Кыдзи нö сідзи?» Друг вöрын кутісны кывны гөлöсъяс: «Мортыд медся ён, сійö ставсö вермö венны». А сэтшöм шуда лои Олюк! Муніс бөр Вöрса дорад, а мöдыслы нинöм эз и коль, кыдзи кутны ассыйс кыв. Ыдждöдіс бөр нывкатö Вöрса, петкöдіс вöрысь, да и мырддьöм вотöссö бөр сетіс.

Владислава ПАШНИНА,
Кулöмдін район

Стёпа

Кор миянлы вайисны сиамскöй каньпи — дзоля кисульнымöс шуим нимтыны Стёпаөн. Морт нимтö пуктім да, дзик морт кодь кутіс лоны. Дзолядырсянныс нин эз мукöд каньяс моз көв йылö гартыштöм кабалаөн ворс, а небыд öблезяна чачаөн. Нуас пач сайö да качйöдлөмөн ворсö. А коркö гортö локтім да весиг чуймим: «Коді нö гортын карапужитчöма-олöма?» Джодждöратö дзугöма, дзоля воклысь став чачасö разöдöма-новлöма. Видзöдам да, каньыд ворсö. Мыйөн абу дзоля кага? Неважөн на Стёпаос ыръянитöмысь вöтлім ывлаö. Сійö дöзмис, няргиктырйи кайис лöскö, бытьö миянкöд пинясис, сэсся, видзöдам да, пакöститöма каньыд. Некымынысь мамö видіс дзоля вокöс лук разöдöмысь, ёгöсьтöмысь, а вöлөм луктö Степаныд паччöрысь первой лэдзалö джоджö, а сэсся лунтыр лук бöрсяыд вöтлысьö.

Коркö меным мамö тшöктіс пач ломтыны, пес куті сюявны да, пачыд кутіс нявзыны — Степаныд сэтысь петö. Кымын кань нин ми видзлім, но Стёпа кодь «дивöыс» эз на вöвлы. Кылас кө шкапысь чöскыд дук, оз улісянныс восьты, а каяс йирк бердын öшалысь шкап ылö да лапасö сюйöмөн надзöник восьтö, вегыльтчöмөн пырö шкапö да лэдзалö сэтысь, мый колö. Öтчыд тадзи шкап восьтігад шнөпкысис-усис помöй ведраö, дзоньнас лои брöд ва. Ачыс на медся ёна повзис.

А яйтö чулансьыд төвнас некытчö огö вермöй дзебны. Вевта ведратö восьтö, мешöкын кө — яй мешöктö йирö, дзоляджык кусöк кө — бокö кыскö, а заднас кө яйтö колям — лыöдзыс йирö. Сё майбырöй, оз бара тшыгъяв!

Сэсся кажитчö Степанлы мös вöра йöв. Рыт и асыв мам бөр-ся вöтлысьö. Пöдöнчаöн кö петö — гидöдзыс вöтчас. Терпенньöйс абу идрасьöмсö виччысьны. Идрасигчöжыс ниртчö да нявзö мам дорын, быттö шуалö: «Öдйöджык вай!» А мамö кö лöньöдас Степанös, инас öшйытöм каньыд пырö ыж вежösö да быд бакös-тöмысь найös чашйö-вачкалö лапанас.

Миян Степансьыд весиг вель ыджыд понъяс полöны. Локтас кö кильчö помö кутшöмкö пон — чеччыштö, гыжнас тшапкö — понйыд никсигтырйи мунö. Миян Стёпаным ещё зэв на вернöй кань. Мунам кö кытчöкö рытпукны, Степаныд колльöдö гösтьяс-öдзыд, а сэсся виччысьö пос помас миянлысь петöмнымös. Йöзлы миянös оз коль. Сёрнитам кö Степанкöд — сйö видзöдö синмад да нявзö, быттö мыйкö вочавидзö. Мукöддырйиыс кывтöм пемöсыд мортсьыд вежöраджык овлö. Степанным — семьяын олысь жö. Кытчö ми, сэтчö и сйö. И öнi сiдз жö.

Надежда РОНОЕВА,
Усогоorsk посёлок, Удора район

Вогöгöрся кад

Гожöмын ми купайтчамö,
Шондi улын буглясямö.
Гожöм — медся шоныд кад.
Сылы том и пöрысь рад.

Арыд урожайöн лышкыд,
Мудзлас кийыд, мудзлас мышкыд.
Вöрын вотам тшак и чöд,
Арся кадö быдöн пöt.

Тöвся кадыд кысьсьö дыр,
Кынмас пель и кынмас ныр.
Но ми ог тэрмасьö пырны,
Ислалам да ворсам дыр на.

Тулыс медся мича кад,
Быд пötкаыс сылы рад.
Сэки ловзяс гаг да гут,
Сйö медся на бур шуд.

Медводдза радейтчöм

Менам сьöлöмöй тэ вöсна висьö,
Некор аддзысьлöм миян оз вун.
Шудыс оз нин со енэжын киссьы,
Тайö козьнавліс гожся мен лун.

Ме вед радейтi зэв ёна тэнös,
Мыйла тэ сйös эн гөгöрво?

Кыдз тэ висьталін мен мелі кывъяс,
Кывзі, воча тэд нинөм эг шу.

Кутшөмөс радейті, ёна ме тэнө,
Некод сійөс пө вөлі оз төд,
Мыйла тэ нин эн аддзы жө сійөс.
Мыйла тэ нин эн гөгөр жө во.

Мыйла олөмсө вөчөма тадзи,
Тэ кө радейтан, сійө нин оз.
Матын тэ шуд дорын вөлін,
Сэсса казътивны кутан-ө он.

Вөрө ветлөм

Важъя воясө Енмыс вөлі зэв ёна повзёддө бур народсө. Быд-кутшөм лёкъяссө вөлі петкөддө налы туй кузя да көнкө ещө. Татшөм лоөмторъясыс зэв уна вөвлөмаось. Пөльысь да пөчлысь кө юалан, найө быдторсө висьталасны...

Өтчыд гождя шондіа лунө Маша да Миша лөсьөдчисны... ветлыны вөрө чөдла. Маша асывнас чеччис водз, сэсса чуксаліс воксө. Но вокыс чукөртчис дышпырысь. Босьтісны дозмукъяс да мөдөдчисны кузь туйті. Мишалөн отарө вомыс восьса, отарө очсалө, а Маша муніс чеччалігтырйи.

Пырисны ягө, а кок уланыс сы мында чөд, быттё вольсалөма, весиг ёрта-ёрт выланыс видзөдлыны некор, сэтшөма кутісны вотчины. Машук ылаліс гырысь тусь вылас да вунөдіс мамыс-лысь кывъяссө, коді тшөктыліс тэчны пасъяс вошөм-карөмысь, да вок йывсыйс вунөдіс жө. Юрсө эз лэптив. Вотчис, вотчис... Видзөдө да, дозйыс тырөма нин. Друг мыйкө кутіс кывны, кутшөмкө шы. Синсө лэптө вывлань, а гөгөр сулалө пемыд съод вөр, кутшөмөс сійө весиг вөтөн эз аддзыв. Сійө сэтшөма повзис, мый кутіс ыджыд гөрөкөн кисьтны синва. Сэки и уси төд вылас, мый локтіс татчө вокыскөд, а эз өтнас. Мыйта сэсса горзіс Мишалы, но мөдыс эз шыась.

Маша кутіс кевмысьны, медем кодкө сылы отсаліс татысь петны. Муныштис вөр кузя нөшта да петіс кутшөмкө туй вылө. Муныштис сы кузя да сылы воча веськаліс дзор тошка пөль. Первойсө Маша зэв ёна повзис, сэк жө дум вылас уси пөль-пөчлөн висьталөмъясыс, да нывка кутіс думайтны быдсяма лёктор йывсыйс. И збыльысь, мый пөльыс тані вөчө дозмуктөг и весь?

А пөльыд юаліс: «Мый нө, нылук, бөрдан?» Маша ставсө и висьталіс.

Нывка вөлі зэв тшыг, и пөльыс, коді быттё төдөма тайөс, сетіс няньтор. Маша бергөдчис да пернапас чөвтис. Видзөдө, да киас нянь местаын сылөн нйит тор, а пөльыс абу.

Маша сэтшөма бөрддзис, сы вөсна мый няньсө кө сөйис, кытчөдз эськө и шутёвіс сійөс лёк мутиыд. Нывка кутіс ёна горзыны, мед вокыс шыасяс. И друг воча кутіс кывны гөлөс, быттё кодкө корис сійөс. Медводз Маша чайтіс, мый тайө вокыс, да котөрөн уськөдчис шы вылас. Воис мыр дорө, а сэні жө дорся узьö

Миша. Некымын тусь сёмын вотёма да туй дорас и унмовсьёма. Машалы сэтшөм любё лоис, аддзысисны да, пондіс сійё сэтшөм ёна сывъявны воксё, мый мёдыс садьмис.

Сэсся Маша казяліс, мый воштёма ведрасё. Чоя-вока кутісны думайтны, мый шуас мамыс ведра вошөмысь. Пондісны корсьны. Сэсся Миша и шуис:

— Эн бөрд, Машук, со ведраыд, пуяс костас тыдалё.

Тайё лунсянь Маша некор эз ветлы вөрө өтнас да нэм чөж-ыс казтывліс тайё лунсё. Но и өнөдз оз гөгөрво, кутшөм гөлөс сійөс петкөдіс...

Анастасия ЕФРЕМОВА,
Помёсдін сикт, Кулөмдін район

Юсьяс

Кытчө ті лэбанныд, юсьяс,
Мыйсяма суёма мог?
Енэжын — лым еджыд тусьяс...
Горзөмныд нор да зэв шог.
Кевмыся йөзлы, эн лыйой!
Юсьыд өд — Ен сетөм лов.
Шуднытө асьныд эн кыйой,
Мичлунтө вины оз ков.
Жалита тіянёс, юсьяс...
Эбөсныд бырёма. Жуй...
Лэбөй вай, зөлөта тусьяс!
Воөдчөй! Сиа бур туй!

Льөм пу

Дзордзалё раминик льөм.
Быд во тадз, ас кадө стөча.
Сьөлөмөдз лым еджыд рөм
Йиджсьёма. Мый сэсся вөчан?
Гожөмнас чөскыдик тусь
Дзоридзсьыд петкөдан, сетан...
Эн жө вай слабмы, эн усь!
Төлыс мед кудритө летө!
Матыстчас верстяммөм кад...
Бара ме тэ дінө воа.
Сывйыштны тэнө сэк рад,
Тэ моз жө шудаөн лоа.

Мыйла пон пышйыліс?

Колян во гожөм вель дыр сулаліс жар поводя. Шонді азыма пөжис, весиг позьё шуны — согіс. Гажа вөлі гожөмыс. Кисьмөма нин вөлі чөд — вомад чөвтан, да юмола нин пычмунө кывнад

личкыштöмысь. Лунтыр вотчи. Уна воті! Песокöн сёйны да и компот выlö на лои. Мудзи да и жарысла, надейнö, думайта вöлі лэччыны муса Помöс юын киськасьыштны-купайтчыштны, мед көть көдзальыштны.

Мöдöдчыны куті да, мамöй шуис, мед ме понйöс тшöтш босьтлі, лунтыр пö кашкис жарысла. Понйöй Виола нима. Ми понкöд тэрыба лэччим гöра горув, весигтö öтчыд эг усьлы туйкостад. А понйыдлы нö, бöбкодъ на да, нинöм он шу. Чепöсйö кытчöкö, бергалö дурпоп моз. Радысла, навернö.

Помöс ю вылын коркö вöлöма электростанция. Öнi сиктсаяс сйö местасö шуöны ГЭС-өн. Кольöмаöсь сэнi ва дорас сöмын керъясыс, джуджтаыс вель джуджыд и.

Думысь вöлі көсья медводз понйöс купайтны. Кыкнанным вöлі кер вылас сулалам. Виола ме выlö видзöдліс зэв тешкодъ да кыдзи тай нетшыштчис, йöткыштiс менö тушанас, ме ва пиад көлуйöн и пом пыри. А пон дыр эз думайт, да гöра паныдтö бөр кытчöкö кайис.

Ме эськö купайтчи, сöмын неуна. Эз сідзи артмы, кыдзи колö вöлі.

Пон локтiс гортö куим лун мысти нин. Öнöдз на казьтывла тайö лунсö.

Мыйла пон асьсö тадзи кути́с? Ме ог тöд. Гашкö, тi тöданныд?

Квайт лун Сыктывкарын

Таво ме мöдöдысь локтi татчö. Мунтöдз мамöй пыр шуалис, мед ме ветлі. Ачым думайта да, мый кута майшасьны, а киöн ся шеныштi да — ветла, мися.

И вот ме туйын, вои карö. Мед, ог жалит. Öтчыд тай олам.

Тані миян дорö уна гижысь воліс. Быдöнкöд аддзысьлöм меным мыйкö содтiс, дерт. Ставныс найö висьталісны асланыс гижан удж да олöм-вылöм йылысь. Та бöрын, чайта да, менам ёна вежсис видзöдласöй гижан прöмысел выlö. Дерт, бурланьö. Ме гөгөрвои, мый гижан сямыс меным кыськö ачыс локтiс — друг. Но ме удитi сйöс кыйны, кватитны бöжöдыс. Менам думъясын — кывъясыс, йитöдъясыс — сйö пемöс, да он кө сйöс видз, вермас мунны лёк көзаяка дінысь.

Кажитчисны меным гижысьяскöд аддзысьлöмъясыс. Найö ас-нога шмонитісны, зілісны петкöдлыны миянлы поэзияын асьыным туй. Медъёна нин, ачым ог тöд мыйла, воис сьölöм выlö Михаил Елькин. Гашкö, сы вöсна, мый висьталіс ставсö лючкия, кокниа, шмонь сорөн. Чайтöмөн да, тайö мортыс веськыд. Сьölöм выlö воис и Нина Обрезкова. Гижö сйö рифматöм кывбуръяс, и меным тайö кажитчис зэв аслыспöлөсөн да выльторйөн. Ачым зіля гижны рифмаөн, да сйөн гашкö. А неуна водзджык воліс Александр Ульянов. Торъя сьölöм выlö воис сйö, мый мортыс зэв ёна пыдди пунктö чужан сиктсö. Öд тайö зэв бур, кор морт радейтö чужанінсö. Сэтчö öд став ичöтдырыд, томдырыд кольö...

Ёна сьölöм выlö воисны и миян велöдысьяс: Светлана Ивановна, Светлана Ювенальевна, Галина Александровна, Павел

Иванович, Владимир Васильевич. Татшом шань да мелі йёзыс этша Коми муын, и ме рад, мый накөд аддзысьлі. Уна жö нин и челядьлы найö отсалісны, нуöдісны сьölөм пырныс. Бур. Татшом бур уджсö, дерт жö, коркö лоö пасйöма. Кыдзи ме думайта — Енмыс öд ставсö аддзö, сійö эм и, дерт, бурсö да лёксö, кöнкö, гөгөрвоö. Мед и миян велöдысьяслөн лоö ставыс лючки-бур.

Коли гижыштны нывъёртыяс йылысь. Нывъяс лоины меным бур ёртъясөн. Лыддöдлышта: Валя (Усть-Немысь), Христина (Лебежнöйысь), Яна Васильченкова (Пожöгысь), Вика (Гамысь). Кык курснад удитім нин ми вель бура тöдмасьны, и водзö вылö, чайта, кутам ёртасьны на.

Вот öні гортö мöдöдча да мөвпала. Бур, мый ме тані велöдчи кык курс. Унатор тöдмалі, мыйöкö велалі. Окота на бөр бергöдлыны тайö кадсö, сöмын гортö аснога жö кыскö.

И Ен кö биысь-ваысь видзас, гашкö, и коркö лоа на гижысь-өн. Ме чайта да...

Валентина ИГНАТОВА,
Немдін сикт, Кулöмдін район

Ывла выв

Ывла талун асывсянь
Шогалö да бöрдö.
Ойдöдан öд ванас тадз
Видзьястö да вöртö.

Разаліс шог руыд мед,
Югыд ло да мича,
Шонді югөръяссö ме
Ас сьölөмын видза.

Нинöмла дзик асывсянь
Шогавны да бöрдны.
Ог сет ачымöс ме тадз
Жугыльлунлы йöртны.

Ас му

Кöн юковтö веж Парма
Миян паськыд Эжва ю,
Сэні зарниасьö арнас
Озыр быдтас сетö му.

Сэні тыдовтчö оль лыа,
Кöні гожъяла быд во,
Олан визьöс ачым кыа,
Артмö оз — ог гөгөрво.

Пыдди пукта тэнö ёна,
Менам муса ывла выв,

Меным вексянь лои дона
Коми му и коми кыв.

Ме өд абу марафон котралысь...

Кöсъя висътавны öти лоöмтор йылысь, кодi унаысь воывлö юрö. Вöли миян кань Кеша, зэв мичаник. Ачыс эськö съöд, но голя гөгöрыс мунö еджыд визь, дзик быттö бобув голя вылас пысалöма, да нöшта на и ветлöдлö кутшöмкö барин моз. А ещö эм миян пон, Джек нима.

И вот коркö Кеша кутiс йöйтöдлыны понтö. Мунас öтарö, пон уськöдчö, но оз судз, сы вöсна мый сийö дом вылын. Тадзи кыс-сис дыр, да мен окота лои помавны каньлысь ворсöмсö да мöдöдчи вöтлыны сийöс. И сэк костi Джекыд домсьыс мынiс. А кутшöм öдйö лэбовтiс Кеша! Ме сылысь бöжсö куш и аддзылi. Джек сэк костi котöртiс кань бöрся и дзик öд ме бокöд! Со чептыс и гартчис менам кокö. Кыдзи тайö артмис, ме ог тöд, мөв-пыштни весиг эг удит. Джек котöртiс водзö и менö кыскыштiс ас бöрсяыс. А мен усьны абу окота, и которта пон бöрся... Сiдз ми и котöртiм, кытчöдз Кеша эз кавшась кутшöмкö пу вылö да ме домсö эг разь.

Сы бöрын, кыдзи ме котöртi джын Немдiнсö, шуи аслым, мый кута бурджыка домавны понйöс да ог кут мездыны каньöс. Сийö öд абу йöй, пышгъяс, а ме абу на марафон котралысь, мед пон öдъя котравны да горзыны гөлöс быртöдз...



Шувгöны пожöмъяс*

РОМАН

МÖД ГЛАВА

Важыслөн колясяс

1

Свежовлысь чертёжсö видлалігөн Борис Хуторков, вöлөм, абу весь шензьöма налысь оланінсö сідз-тадз пасйыштöмысь: пöченок пукаліс збыль кыпыдінын. Джуджыд мыльк кажитчис моредорса гöра кодьöн, кысянь вöрсö, мореöс моз жö, позис ылö-ылö тывъявны синмөн. Асьсö мыльк йывсö да шонділань паныда пöкатлысь вылыс помсö вöлі гöрыштöма, куйлісны негырысь лöскутъясөн коськөм, сю öзим, ид да зөр, картупель, пыштор, капуста да галан. Муясысь улынджык — туруна боръяс. Но Йöра ёльöн увтасыс щöтясис гырысь козья вөрөн нин, а Вөръюлань лэччысь вöра пöкатыс помтöг ылымöдіс сідз нин ылыса Вөръюöс. Босьтны кө мылькысь войвывланьсö, то вөр матыстчис канаваяс дорöдз, кодьясöс койдöма ыбъяс помö, мед потшны вöрсянь воысь лишнöй васö.

Матігөгöрса вөр, дерт, эз вöv черөн сötлытöм. Öтилаын сійö лэптысис öтка дурк пожöмъясөн, и пашкыр йывъяс вылас тулыс и ар кургылісны таръяс; мöдлаын чурвидзисны тылаяс уджалöм бöрса гырысь кос пипуяс да козьяс, и ыджыд тövъяс дырйи найö дружнöя шутьявлісны; коймöдлаын пушкыртіс-быдмис зу кодь сук выль чаша.

И ещö, мый синмад шыбитчис стрöйбаяс ылö лючки видзöдытöдз на, сійö вöлі сизим потш судта потшöс, коді карта мышсянь важ тылаясланьö муніс кык бордйөн. Бордъяс-потшöсъяс, öта-мöд дінсьыс öтарö ылыстчитыр, пырисны посни вöраингясö, тыдалö, кык дорсянь кытшовтісны скöt йирсянінгяс.

Öтпом пуктылöм керка да карта сулалісны пöшти вөр дорас нин. Найöс стрöитлöма бур пожöм керйысь во кызь вит сайын, збыльвылас вöліны ёнöсь на, но видзöднысö кажитчисны важсяöсь — воймöдöма вöрса ва ру.

Керкалөн негырысь нель öшинь — кык öшиньөн водз стена-ясын. Эм ещö витöд — паччөр вывсянныс — видзöдіс керка мышлань, сарай звöз помö.

Öшинь улас моз куткырвидзис жытник, а сы бокин, быттö тури кокъяс вылын, тринвидзис вирич. Ылынджык, Йöра ёльлань лэччанінын нин, лясöма му бердас сьöд пывсян.

* Заводитчöмыс колян номерын. Гижанногö кольöма авторыслысь.

Вөлі ещö öти керка — джуджыд сигöра, кык жыръя. Сійö грымвидзис нöрыс кушлөн асыввыв пельöсас. Но сэнi сідзи некод и эз овлы. Тайö эновтöм керкаыс Хуторков Прокопий воклөн — вöвлöм матрос Миронлөн, кодi татысь мунліс германскöй войнаöдз на Уралö пес пилитны да сідзи и эз вайлы гортас ассьыс бур юрсö...

Талун лунбыд овтöмөн жö кажитчис и Прокопейлөн керкаыс: мудінсянь пыран кильчö öдзöсыс пöдса, тасалöма ыджыд роскөн. Россö пуктöма томан пыдди крещöнöй морт пырöмысь, а некрещöнöй вынъяслы эм мöд сикас кутöд — öдзöс шöрас дьöгöдъ сора сирөн мавтыштöм крест, порог улас — пöдков джын (дзонь пöдковыс, тыдалö, абу вöлöма).

Но картаын, кылö, тронькйöдліс джынъяна мöс, кылыштіс шыргун, кутшöмöс öшöдöны ыж сьыліö.

Прокопейлөн мöс-вöлыд вöвлi унджык öнiя дорысь, да кольöм кык воөн ёна чиніс. Öти вöв да кык мöс ош сёйис. Арöса кукань галанөн виньдіс. Чинісны и ыжъяс — кутшöмкö висьöм пыравліс гидас, колис сöмын ар джынъя баля да пöрысь меж, код вылö и шыргунсö кöрталöма.

Кык мöска-зильöпана да межа-баляа сулалісны картаын лунтыр. Найö талун и нырсö эз кöсйины петкöдлыны ывлаö, кöть эськö карта öдзöсыс ван восьса: ывлаын лэбалісны лöдзьяс.

Став гортпомсö вöлі кольöма Буско пон вылö, кодi öнi куйліс кильчö помын да, лöдзьяскöд тышкасигөн, летйöдліс доймылöм пельнас.

Хуторковъяслөн эськö эм ещö кык пон, да öтиыс на пöвстысь кöзйикаыскöд мунліс кыддза расö. Прокопей гöтыр сэнi корöсь вундалö. А мöдыс вöтчис кöзйиныс да сылөн ныв бöрся, кодъяс асья ыркыд кежлö на мунлісны тыла кöдзны.

Бöръя кадö тылаяссö Прокопей Хуторков кутіс вöдитны гусяджык местаясын, кытчö не сöмын лесник-объездчикъяс, но и кыйсьысьяс öдвакö вермасны веськавны. Татшöм виччысьöмыс ковмис сы бöрын, кор во-мöд сайын выль прöсек кералысьяс прöсекнас петісны веськыда Прокопей тыла вылö да ещö сійö кадö, кодыр сэнi ачыс буретш вундіс сю. Прöсекайтчысьяс пöвстын лöсялöма «лөк» морт, тыла йывсьыд удтöма вөр стражалы, стража составитлöма «нарушитель» вылö протокол, няньсö вузалöмаöсь тöргъясысь, а вөр «жугöдысьлы» ковмис мынтыны вель ыджыд штрап.

Тайö разö тыласö вöлі кералöма Йöра ёль йылö, кыті шорыс вожалö кык чаль вылö да кык костас артмö вель ыджыд вөр дi, кодöс мышсяньыс пыкö прöйдитны позьтöм нюр. Дерт, вöрыс тыла вылад тані вывтіджык гырысь, кералігөн да сотöм бöрас ректысигөн коліс видзны лишнöй уна вын, но та пыдди важ вөр местаад вермас быдмыны унджык сю дай омöльджыка колö повны аддзöмысь.

Со, кыланныд: шор чаль вуджтöдз на көнкö водзынджык таркöдчöны увъяс, несйылö вöв. Сэнi Прокопей Хуторков тыла кöдзö. Гашкö, водз на кöдзнысö? Абу нин, абу водз. Татшöм гырысь вöраинад, да ещö местаыс кö улын, тылатö век водзджык кöдзлöны, мед локтан вонас няньыс удитас воны. Тадзи вöчлісны батъяс, пöльяс дай пöльяслөн пöльяс. Налы-ö вöлі не тöдны, кыдзи колö тылатö уджавны! Тыла няньөн и вынавлісны тайö мес-

таясын, сійөн и вердчылісны ёнджыкасё. Оз ло ыджыд ёшыбка-
ён, висътавын кё, мый Коми муад ни ёти важ грезд, ни ёти
коркёся загун му абу, кодёс эськё пемыд вёрыдлысь эз мырд-
дывлыны буретш тайё тыла уджаломнас. Оз, та боксянь Проко-
пей ылавны некыдз оз вермы.

Нырад ёвтыштис нин регыдён на сотчём месталён тшын бус.
Пуяс костті кутіс тыдавны восьсаинлён югөр, а ещё звук мысти
петкөдчис и ачыс тылаыс. Сійё вёлёма вель паськыд, пуд нель-
вит кёйдыс көдзём вылө.

Му веркёсыс са съод. Сулавны кольём гырысь пуяс сотчёма-
ось йылөдыс. Чишкассёма и тыладорса вөр. Тыласё сотігөн
биыс вёлёма зэв ыджыд.

Век таркөдчисны увъяс, сёмын матынджык нин, гораджыка.
Тайё швачөдоны óta-мөд дінас, печикалоны мыръясё, шашарит-
чоны муо да мынласёны сэтысь тыла агаслөн вит весът кузъта
увъясыс.

Агассё вөчёма кушинъяс дорын быдмысь козъясысь, кодъяс-
лөн увъясыс отар бокасджыкось, ёнось да тшөкыдось. Коз дін-
сыс найос кыркөдоны пес кузъта кльөканён. Кльөкансё мичаа
лөсийоны, увъяссё дженьдөдоны колана мында. Тадзи өтиос, мө-
дос, коймөдос. Нель-вит кльөкан пуктёны орчён, топыда сюрк-
нялоны. Артмө ыджыд щөтка кодъ. Сылы вөчёны додь вожъяс,
додялоны вөлос, и вөв сійос кыскалө тыла кузя, небзьөдө мусö,
тыртө шыбитөм кёйдыссö.

Прокопейлөн вөчёма сы мында увъяса да сэтшөм съөкыд агас,
мый ёти местаод кыкысь-куимысь прөйдитөм бёрын тыла вер-
кёсыс артмө пашня му кодъ небыд. Коньөр Чалко муртса вермө
кыскавны татшөм агастө.

Шуны кё веськыда, гёныс серти Чалкоос өні позис шуны
Воронкоон: сэтшөма сійё удитөма съодасыны тыла бусөн. Пөся-
лөм яйсö отарө курччалёны лөдзьяс; көть эськё найö оз вермыны
дыртө овны тані, тыла бус пытшкад, но лөдзьяс унаён и курччы-
ны удитёны тшөкыда. Быть сэсса татшөм гораа корсийөдды да
несийв коньөр вөвлы — лөдзьясысь и бусысь.

Чалко вылын пукалө нывбаба. Сійё пач лыс кодъ жö гөгөр
сьод. Дзирдалёны сёмын йөвведжыд пиньясыс да синъеджыдъ-
ясыс. Сярвидзысь пиньясыс серти да синъяснас тэрыба лыйлө-
мыс серти первой делö и позис тöдны, мый вөв вылын пукалысь-
ыс том на.

Прокопейлөн важён нин көдзсьёма и сійё өні «агсасис» жö.
Агсалис сэтшөминъясті, кыті эз позь прөйдитны вөлөн. Ёнджы-
касö лөсьөдышталіс тыла доръяссö. Кытсюрö и паськөдышталіс.
Сылөн коскас чер, киас «агас» — вөчыштөма увъясысь жö.

Бокысянь видзөдігөн Хуторков өні кажитчис пöрысь вöрсаён.
Юрсиыс да паськыд тошкыс быттёö отувъяось. И сы вöсна,
мый найö дзутсьөмаось, эз позь тöдны, көні тош, а көні юрси. Ёнөн
вөвлөм тушасö вевттис кыз дөраысь вурөм не то кузь дөрөм,
не то пöлаястөм шабур, кодёс көнсюрö шуёны бугайөн. Но та-
йö вөлі ёна нин важся, уна пөв дөмлөм бугай: бур паськөмтö
тыла вөдитігөн оз пасътавлыны. Кокас көмалөма сэтшөм нинкөм,
кодёс киссьөмысла да унаысь дзоньталөмысла ещё шулоны ке-
дзовтана нимөн — өтөпөкөн. Мукөдторсö вөчис тыла бус. Сійö
вевттис са съөдөн ставсö, мый тыдаліс и мый эз тыдав. Колис

сöмын пардоръяс, усътöг кольöм некымын пинь да джуджыда пукалысь синъяслысь синъеджыдъяссö, и тайöн ещö на ёна тöд-чöдыштис не пыр овланасö, вöрсалöн кодъ мыгöрсö.

Прокопей друг сувтыштис уджалöмсьыс, кутис видзöдны нылыс выlö, кыдзи сийö кужöмön веськöдлö Чалконас, мед агаслөн увъясыс инмöдчыласны и мыръяс костö, и сулалысь пуяс бокö, и вужъяс дорö.

Зиль ныв быдмис Прокопей гозъялөн, вежöра. Да нылыд тай нылөн и кольö. А öтка пиыс со кöнкö бокын ветлö, то öтилаö, то мöдлаö, гортö омöля и волö. Кыдзи бара кутас ассьыс нэмсö овны гөгöрвотöмьд-а? Эк-эк-э!.. Пур вывсьыд, зон, ватö кöть век кой, пöльзаыс ичöt. Гортад жö мыйкö вöчыштан кö-а...

— Öдюк,— нылыс динö шыасис бать, кор выль кытш вöчöм бöрын Чалко бара шаргис-матыстчис сы динö,— оз-ö ков шойч-чöдыштны вöвтö? Мыйкö тай зэв ёна кутис пессыны? Дай ачыд луншöр кадöдз сөйтöм.— И водзö паськöдчытöг тшöктис:— Лэдз сийöс да нуöд шор чаль дорас. Сэни турун и ва тырмас. А мöдасны кö лöдзьяс öдöлитны, суқджык понöляинö сувтöд. Виччысьыштам рытъя ыркыдсö.

Öдюк тэрыба лэччис вöв вылысь да пыр жö кутис супонь разьны.

— А тэ нö, батьöй, кытчöкö ветлыны али мый кöсьян?— юалис Öдюк кысянькö морöс пытшыньыс петысь, но сöстöм гөлöсөн.

— Ветла бöра-водз. Сюмöд кульышта. Зэв нин мичаöс кыдз давсö кольöм разö аддзыли. Вежöй петö. Сюмöдтö öд öни и кульнысö... лöдзьяс дзизгигөн.

— Он и сөйышт?

— Локта да нуръясьышта. Тэ менö эн виччысь. Рыська йöв туисыд эстöни понöль улас.

Хуторков зудйөн лэчтыштис кöрт воропа пурт, кодöс позьö садитны кузь бедъ выlö, да вошис вöр пытшкö.

Öдюклы дас кöкъямыс ар. Нывъяслөн тайö сэтшöм арлыд, кодыр найö заводитöны яндысьны омöлик паськöмысь, сьöд чужöмысь либö мукöд мисьтöмторйысь не сöмын йöз син водзын, но и ас кежсьыныс. Öдюк, первой делö, ныв, а сэсся нин — пöчинокса олысь. Со и татчö воигөн сьöрсыйс босьтис вежсянтор, кöть и важиник, но сöстöм дубас, кодöс кöсийс пасьтавны удж помасьöм бöрас.

Вöвсö йирöдны сувтöдöм бöрын сийö матыстчис ёль дорö, шыбитис ас вывсьыс саöссьöм паськöмсö да кутис мыссьыны. Пиньтö ёнтымön кодзыд ва öзтыштис став яйсö. Лои сэтшöм кокни да долыд, быттьö пывсян бöрын.

Ёль дорысь жö Öдюк аддзис кузь туруна восьсаин, кытчö шоңдiлөн югöръясыс инмисны ставнас. Танi, гож водзас, позис сөйыштны и нежитчыштны.

Нежитчыны кывсö, дерт, колiс гөгöрвоны сы боксянь, мый луныс талун сэтшöм — югыд, шоныд да лөнъ. Югыд весиг вöра ёль дорын, шоныд сы выйöдз, мый, не кö öвад, позис овны пасьтöг, а лөнъ — черанъ везъяс öшйымön.

Дзор козъяс йылысь шулöны: вöтъяс пö вöталöны. Талун найö эз вöтавны ни эз вугравны, а шойччисны да быдмисны пöрысьö-нэмас.

Турун быдмис жö. Быдмис горзöмөн, пöсъямөн, и тайö пöсь руыс, шондi югöркöд öтув, чужöмад инмис довъялысь визувъ-ясөн.

Сейны заводитiгөн на Öдюклы син улас усис вöрса мазi. Сi-йö вöли ыджыд и кыз, пöперегыс еджыд визьяса, лэбалiс мургöмөн. И, тыдалö, зэв сьöкыд вöли: цветъяс выlö пуксьылигөн турун йывъяс улöдз копытчылисны. Но быдмис сэтшöм öти турун, кодi эз копрась мазi сьöктаысь. Öдюк первойысь на аддзис татшöм турунсö — муно юмов йыла йөнлань. Сылөн сэтшöм жö рöма цветъясыс, сöмын гырысьджыкöсь и мичаджыкöсь. Воссöма нин куим цвет. Быд виль кытшов вöчигөн мазi волiс тайö цветъяс вылас, тэрыба суйлис нырсö сэтчö, кытысь масö босьтлис нин. Мазi виччысис виль бутонъяслысь воссьöмсö, мең не прöзевайтны чöскыд малысь ичöтик клад.

«Часлы, воссяс али оз ме дырйи,— цвет йылысь друг думыш-тис том ныв.— Воссяс кö, лоас шуда во...»

Öдюк тэрыба восьтис рыська йöв туиссö, сийöс сувтöдiс паськыд коръяса турун вуджөр сайö да кутiс виччысьны цветлысь воссьöмсö.

Серпасыс артмис мойдын кодь: сьöд вөр шöрын пукалö мича ныв и виччысьö волшебнöй цветлысь воссьöм!

Русöй кöсаыс, кодöс мыссьöм бöрас нин Öдюк кыис виль пöв, сьöкыда öшалiс мыш вылас. Джуджыд кымöсыс, веськыд нырыс да ставнас лöсьыда тэчöм чужöмыс и паръясыс вöчисны Öдюклысь юрсö сэтшöмөн, код выlö видзöдiгөн он кöсий да сувтыштан. А синъяс йывсьыс Катьö тьоткаыс коркö шулис тадзи: «Тэнад, бобöанöй, зон пöрйöд синъяс».

Ти он тöдöй, кодi сэтшöм Катьö тьоткаыс? Да öд тайö ачыс сьылысь Катьö! Степан Михайлöлөн ичöтик гöтырыс.

Öдюк сэки, дас вит арöса нывпосни на, гöститiс на ордын арся видз чöж. Кудельөн волiс Важгортö печкыны. Некымынысь петавлис и войпукъясö. Зонъясыд сэнi мыйта колö вöлины, а вот некод на и видзöдлыны эз кöсий сылөн мича синъяс выlö.

— Да-а-а. Быдöнлөн эм аслас дзоридзалан кад. Куим во сайын и танi, этайö ёль дорас, колöкö, эз жö цветит татшöм мича цветыс. Öнi сийö öзйö асья кыа рöмөн.

Кутшöм нö шуда во виччысис Öдюк? Гашкö, бур гожöм, тшака-вотöса ар, пötöс тöv? Али мыйкö ещö? Öдюк и ачыс эз тöд. Сi-йö сöмын кылис, кыдзи цветъяс выlö видзöдöмысь том сьölöмыс мыйыськö тöждысис виль, некор на вöвлытöм ногөн. Воссяс-ö виль цветыс? Вашнитас-ö нывлы сийöс, мый корис сылөн лолыс?..

Öдюк видзöдiс пöльтчöм бутон выlö эз «зон пöрйöд», а кев-мысяна синъясөн.

Вермис-ö Öдюк помöдз виччысьны виль цветлысь воссьöмсö, некод эз аддзыв, оз тöд. Сöмын и вöли тöдса, мый Чалкоос мича ныв сувтöдiс сук понöль пийö пажун кадö нин.

Бать кутiс сёрмыны. Сийö, буракö, лишнöй жö ёна ылалис аслас сямöдөн.

Первойсö кöсийс кульны кык-куим трубаысь не унджык. Та мында сылы колiс жытник вевтсö виль пöв вевттьöм выlö. Но кулис нин нель труба — тадзи шуöны мортлы вöдитмөн сямöд тубрас,— а кызьясыс водзынджык быттьö нарошнö лоины мичаджыкöсь — кузьöсь, веськыдöсь, увъястöмöсь!

Беддъыс, код помö садитöма көрт воропа пуртсö, Прокопейлөн куим сыв кузъта. Да кыз тай татшöм беддя пуртнад пу сюрöс-öдыс чилс-кырыштас му дінсяныыс да кок чуныйыв судзöдчымөн, сямöдыс, кузь дöра моз, сідзи и шывк-лэччыштас кок улад — мукöдыс нель весътысь паськыдöсь.

Дзизгисны лöдзъяс (давъя вöрад найö ещö на унаөн), морт гөгөр бергалісны кумелькаөн. И кымын ышмис öвад, сымын кокниа торъяліс кыз пу дінысь сямöдыс — небыд кучик кодъ нюдз, выль тьöс кодъ мича. Он көсйы, да кулян.

Ставсö Прокопей удитіс кульны öкмыс труба. Öні сійö вöлі тырöма не сöмын тыла сьöдөн, но и еджыд кыз пу килльөн.

Сэк кості, кор трубаяссö чукöртіс нин öтилаö да төвся туйөн нуом вылö найöс тэчис чипасö, көнкö ылын-ылын кылыштіс нылыслөн гөлöсыс.

Бать шыасис воча да сэсся броткыштіс ныр улас:

— Доддясин эськö да агсасьны мöдін — бурджык вöлі горзöм дорсьыд.

Кöть мый эн шу, а тылаыс и сямöдыс налөн гусяöсь.

Тыла дінö вотöдз на Прокопей кыліс агаслысь таркöдчöм шы: сідзкö, ставыс лючки-ладнö, Öдюк заводитöма агсасьны. Но и мед öтнас помалыштас. Прокопей тайö кадö сьöрсъыс нуом вылö мыйкö вöчыштас. Öд кызди шулісны пöрысь йöз, царство налы небеснö: вöрсяныд тыртöм киөн оз воыны; «беддясьöмөн бедь ваян и сійö сгöдитчас — плеть пу вöчны».

Сійö недыр чатрасъыштіс пуяс вылö да заводитіс бергавны пöрысь кыз гөгөр. Первой делö сы дінысь чернас чашнитіс зэв ыджыд чага ёкмыль. Чагаыд артмывлö зараваысь, и Хуторковъяс сійöс юöны чай пыдди. Тайö кызлөн діныс коркö важөн нин доймылöма, дай кузялаыс быдмöма вель кузь верöд (рубеч) — войвывса вөр пулөн медся крепыдіныс, мыйысь вöчлöны чер пуяс, куран юръяс, карнанъяс. Прокопей кыркöдіс и тайö верöд-сö, кызсö лöсийштіс, вöчис мыйкö чер пу модааöс. Но тайö кызлөн доныс вöлöма ещö на ыджыдджык. Сылөн посни синма да öш кучик кодъ кыз сямöд. Шөр гөгöрсъыс позяс кульны көм да пестеръяс вылö шуля сямöд, а йывсьыс, кыті лым кодъ нин сöстөм да еджыд, кыркöдлыны туис кышъяс.

Недыр мысти пöрысь кыз, орчча пуясысь мездыситыр, сьöкыда водіс мудінса понöльяс пöвстö.

Ставыс артмис ыджыд кужöмлунөн. Сямöд шульяс петісны ки увсьыс помасьлытöм лентаөн. Сэсся найö гартчисны гырысь мөтöкъясö.

Пу дінсьыс туис кышъяс кыркöдлігөн пласта ньөр ветлöдліс ли слöйöд ва пыр моз... Ставсö тайöс тадз кокниа да мичаа вермис вöчны сöмын сэтшöм морт, кодлөн не сöмын батыс, но и батыслөн пöлыс вöліны мастеръясөн та кузя.

«Эк-эк-э!..— Прокопей талун мöдысь нин ышловзис аслас пи вöсна.— Кыз бара кутас овны батылысь велöдчытöгыс-а...»

Хуторков дзикöдз дугдіс гөгөрвоны ассьыс Бориссö. Детинаыс быттьö и удж вылö зіль, и кывзысьысь, и, нинöм шуны, абу путьтöм-проктöм, а вот гортса уджысь кутіс öддортчыны, сідзи и видзöдчö мунны бокö, нажöвитчыны. Дерт, шуам, сьöмторыд оз мешайт овмöсад, да öд и водзö олöм йылысь колö думыштыны. Гөтрасян кад воис... Вермисны öмöй Прокопей гозъя сьöд вөр

шөрө лөсьөдны дзонь овмөс, эз кө зільны төв и гожом, тулыс и ар. Мый ыджта куш вөчисны, кымын тысяча мыр бертисны... А дугдыв вөрыдкөд тышкасьны көть во-мөд, он и төдды — бөр ойдас.

Пөрысь мортөс дзикөдз ылөдісны думъясыс. Медбөръя туис кышгъяс дінысь кырсь весалігөн шонді матыстчис вөр дорө нин. Вошисны лөдзьяс, найөс вежис ном-геб. Дугдіс кывны Одюклөн агсасьомыс.

Бать видзөдліс аслас гырысь кияс ылө. Эз сы вөсна, мый найө өні вөліны сьөдөсь. Сьөдтө позьө мыськыны. Видзөдліс подошва-ассьом кипыдөсьяс ылө, крукыльтчөм чуньясыс ылө, кодъяс некор нин эз вермыны веськавны кыз колө. Код вөсна тадзисө? Эз өмөй пи-ныв вөснаыс?.. Тырмас сэсся, тырмас лоны небыд мортөн. Ковмас, тыдалө, кутны өтка писө чорыджык киясын.

Медбөръя кывъяссө Прокопей шуис гораа:

— Сэсся некытчө нин ог лэдз. Мед гортын уджалө.

Матын вөрзыштисны понөльяс.

— Тэ нө, батьөй, абу өтнад али мый сэні?— мудінса вөр питі уйигөн на юалис Одюк.

— Но,— шензыштис бать,— тэнад нө помасис нин?..— И во-дзө паськөдчытөг стөчмөдыштис:— Воктө пиняла... Давай чукөрт сямөд көлуйсө: гортө колө мөдөдчыны. Мамыд, көнкө, пывсьыны виччысьө.

Найө и думыштны эз сяммыны, мый пывсьысьяс талун рыт лооны унаөн.

2

Пөчинокө изыскательяс локтисны кузь вуджөра кадө нин.

Борислөн мамыс — чукрасьыштөм чужөма пөч кодь нин — вөлі буретш нянь көтө, кор понъяс лөкысь уськөдчисны кильчө помысь. Найө тадзи уськөдчылоны төдтөм йөз ылө либө вөтлывлөны матө сибөдчысь зверөс.

Повзыштөм көзьяка эз на удит пыркөдыштны пызьөссьөм кияссө да котөртны өшинь дорө, кызди понъяслөн грөз гөлөсь-ясыс пөрины радлөмө, а здук мысти кылыштис и пиыслөн рөднөй гөлөсыс.

Керкаө пырисны витөн.

— Примит, мамө, гөстьясөс!

— Локтін жө, муса пи?.. Волөй, волөй, дитяяс!..

Мамлы эськө вөлі окота кутыштыны Бориссө — өд сійө сэтшөма гажтөмтчис сыысь, да лөсьыд-ө төдтөм йөз дырйи кутчысьыны пызьөсь кияснад.

— Öтнад али мый, мамө?— кутіс пөрччыны нопсө Борис.

— Батьыд да чойыд талун...— Мам быттьө тшөкмунліс: он өд шу — тыла көдзөны.— Найө сэтчаньынөсь... Шор чаль дорынөсь...

Борислы мөдысь висьталөм эз ков, пыр и гөгөрвоис, мыйын делөыс.

— Давай, зонъяс, давай пөрччысьөй, личөдчөй,— тэрма-сьыштис вежны сёрнисө.— Лоөй гортын моз... Тайөяс, мамө, ставөн бур йөз.

Пөлать увсянь на шыасис Петра:

— Суседьястө, буди, төдас жө Любушкаыд-а?..

— Петрöван, тэ али мый?— шензгыштис Люба.— Видзöд жö, видзöд! Дзикöдз тай синтöммыссьöма... Олан-вылан инö, гось-тушко!

Тайö разö эз мешайт ни пызьöсь ки, ни кыз дöра дубас, кодöс эськö первой колис вежны лададжык дубасөн.

— Да öд и том мортыс тöдсакодь! Абу-ö Öльöксейлөн пи?

— Сылөн вöвлі,— кисö сетис жö Микит.

Некымын лун чöжөн Расов удитöма бурдны, не кö лыддыны бледöдыштöм чужöмсö, но доймылöм йылысь Люба эз тöд да сöмын думыштис аслыс: «Курас-карасыдды век нин мыйкö оз тырмы: öтияслы туша-рожа, мöдъяслы вир...»

Борис тöдмöдіс мамсö Свежовкöд да Кокановкöд, и кöзьяка вöлисти öдйöджык нин пырис пач сайö вежсьыны.

Керка пытшкöсыс Хуторковъяслөн быттьö ёнасö эз и торъяв сиктын олысьяслөн дорысь. Сёйысь жö песöм русскöй пач, кöтшас весьтын паськыд пöлать, стенъяс пöлөн лабичьяс, енув пельöсын пызан, кывтын нянь сёръяс, öшиньясысь вылынджык джаджъяс. Но тані эз вöв ни шкап, ни комод либö пу диван, эз вöвны весиг юра улöсьяс, не кö лыддыны öтиöс, коді, тыдалö, кранитчöма татчö локтан кадсянь на да вöлі муртса «ловья» нин. Эз сулав крöвать, эз öшавны занавескаяс, кодъясöс сэтшöма кутисны радейтны öнیا сиктъясын. Вöлі сöмын кывт стенö плакаясысь вöчöм кык судта джадж, кодöс шуисны залавкаөн. Тайö залавкаас сулалісны сёй гырничьяс, накöд орччөн куйлісны пуысь вöчöм тасьті-пань, бекаръяс, сов доз, дар. А выліас, туисьяскöд орччөн, красуйтчис кольк кодь гöгрöс пельпомьяса да вöсни коска ыргөн самöвар, коді Тула карысь петöм бöрас, колö чайтны, вöлöма вель уна киын нин да, медбöрын, веськалöма татчö.

Григорий Свежов некор на таöдз эз волю вöрö вошöм татшöм пöчинокад, кöні медся вöрзöддытöмөн кольöмаöсь крестьянскöй олöмын важыслөн колясьясыс, да став вылас видзöдіс паськöдöм синъясөн.

Тані и мичöданторъясыс вöліны аслыссямаöсь. Енув пельöс-дорса стенаяслөн кер потасьясö сюялöма кöяяс — сьöлалысь, тарлысь, дозмöрлысь. Налысь жö стенас тувьялöма паськыд бöжъяссö. И абу сідзи, кызди эськö вöчисны көнкö мöдлаын, и бара жö аслыс ногөн: гырысьджык кöяяс быттьö кыскисны ас бöрсяыс вочасөн посняммысьясöс, паськыдджык бöжъяс лэптысисны посныдджыкъяс весьтö,— татшöм пöрадокыс, тыдалö, лöсяліс кыйсьысьяслөн законъяслы.

Свежов петис посводзö. Боквыв куйлісны пу ведраяс, пельсаяс, гырысь туисьяс. Сулаліс сыв тыр кызта гыр. Сарайö каянінын нин кранитчис сэтшöм сьöкыд изки, мый сійөн позис не сöмын шыдöс вöчны, но и пызь изны.

А сараяс! И кыан станыд, и кучик небзьöданыд, и вотöс-тшак видзан тшанъяс, и звер ку пелилаяс, и дöра краситöм вылö лопу кырсь, и мыйыс ещö эз вöв...

Пöчинокö воигөн на инженер адзыліс бокинджык сулалысь джуджыд сигöра керка, кодлысь рамаястöм öшинь кöсякъяссö тасалöма пöвьясөн, и сарай звöз вылö петöм мысти кутіс видзöдны сы вылö.

— Тэ тані, Григорий Данилович?..— друг сійö кыліс Борис-

лысь гөлөссө.— Мамөлөн пывсян вөлөма дась. Лөдзьяс да ном-геб сөйөм бөрад пывсяныд первой лекарство.

— Спасибө, Борис. Ветлам, пывсям,— көсйысис Свежов, но сэк жө довкнитыштіс юрнас энөвтөм керкалань.— Кодлөн сійө?

— О!— радлыштіс Борис, мый сылөн начальникыс ачыс юалис та йылысь.— Пырам керкаө. Первой ме тэныд өтитор петкөдла.

Керкаын петкөдчөмаось выльторьяс: Люба удитөма тувьясө өшөдны лым кодь еджыд да мичаа вышивайтөм кык кичышкөд. А ачыс пасьталөма сера вель дубас, юрас чышъяналөма Борис-лысь гөснечсө, кодөс пиыс сылы сетіс нопсө разьөм бөрын.

— Мамө, тэ меным жытниксыд пыртлы Мирон дядьыдысь чеботансө.

Мам гөгөрвотөма видзөдліс Борис вылө.

— Мыйла нө сійө тэныд ковмис, пиө?

— Либөсь, ме ачым петала... Меным оз ачыс чеботаныс ков, а сэтысь өти ичөтиктор.

— Патретыс, гашкө?.. Да өд сійөс кольөм воясө нин нулісны. Районсянь нарошнө пошта воліс... Босьтлы, колөкө, уна морта патретсө. Сійө сэні жө.

Борис котөртіс жытникө. Петра кызөктіс: сылы лои окота вавровитыштны Свежовкөд.

— Öтилаын ми ськөд вөлім, Мирон Васильевичыдкөд,— заводитіс сійө.— Öти куреньын олім Уралад пестө пилитігөн... Сэсянь морттө и пуксьөдісны тюрьмаад да нулісны Сибирад. Жандармъяскөд тышкасьөмысь... Гөрач, шонъянөй, вөвлі, вывті гөрач. Дай ышөдысьясыс мыжаөсь жө... Не кө найө, дерт, петляө юрсө эз суй мортыд. Ме тай, наперво, кымын туй ветлі пестө пилитны...

Петраөс торкис өдзөсын петкөдчысь Борис.

— Со сійө көні служитлөма действительнөй дырйиыс!

«Уна морта патрет» петкөдліс миян нэмлөн дасөд воясся боевөй корабль да палуба вылас сулалысь параднөй формаа матросьясөс. Найөс чолөмаліс кутшөмкө гырысь начальство.

— Талапомсянныс дасөд мортыс. Воддза радас. Нечово өд мортыс вөлөма?! Жаль сөмын: сідзи и эг аддзыв ассьым дядьөс. Менам чужан воө Уралас мунлөма.

— Ме ставсө нин висьталі, кызди вөлі делөыс,— ошйысьыштіс Проня Петра да тэрмасьыштіс содтыны:— Гашкө, лэччылам, пывсьыштам?..

— Лэччы, лэччы, Петрөван. Ставөн лэччөй. Васө уна шонті: кык вор тыр дай дзонь пельса. Асланымлы ещө шонтыштам...

Фотокарточкасө Свежов чургөдіс Кокановлы, шензыштіс:

— Эг чайт татысь аддзыны татшөмторьяс.

Фотосө десятник босьтіс чөла. Сійө бергөдчис өшиньялань, мед не петкөддыны, кызди сылөн киясыс муртса тірзисны. Татшөм карточкаыс сы киын коркө вөвліс нин. Но тайө вөлі зэв важөн, сэки на, кор Коканов эз вөв Кокановөн.

— Колө шуны, Григорий Данилович,— карточкасө Свежовлы бөр сетігөн чөвтыштіс сійө,— Хуторков вөвлөма на пиысь өтиөн, кодьяс миянлысь поколениеөс дасьтывлісны Великой Октябрьскөй революция келө.

— Весиг татшөмөн вөлөма?..

— Но, дерт, тайöс колö гөгөрвоны сэтшöм ногөн, кызди висьталіс нин Сьökыдчигов,— небзьöдыштіс ассьыс кывъяссö Коканов.

Позьö öмöй вöвлöм Прохор Чукулевлы мыйкö босьтны ас вылас? Сійö кутас тöдны сöмын сійöс, мый висьталöны йöзыс. Таысь кындзи ни öтитор!

Лэччисны нин пывсьыны Петра да Микит. Выльысь тэрмöдыштіс Свежовöс Борис.

— Дзик пыр мөдöдчам... Ветлам, Прокор Фёдорович, пывсьыштам.

Но Коканов друг эз мöд лэччыны, кутіс ыстысьны юр висьöм былö. Пывсянö пыдди петіс ывлаö ыркöдчыштны.

Кильчö помын сы дінö пыр и матыстчисны сійö жö лётъялысь пель пöла Буско да сьöд сера пон. Найö мышъяс вылын гöныс скöрысь сулаліс. Понъяс исалісны тöдтöм мортöс ньöти эз омöльдзыка сыщик понъяс дорысь, кодъяс дінті коркö том дырйиыс Прохорлы эз öтчыд ковмыв прöйдитны...

«Эк, том ру, том ру. Мыйла тэ сэтшöм мывкыдтöм?»— важсьыс асьсö кöритыштіс Коканов.

Вöлі сэтшöм лёкиник чувство, мый Прохор куритіс чигарка бöрся чигарка. Куритіс и аддзис важөн кольöмасö сэтшöм ясöда, быттö ставыс тайö вöлöма зэв на регыд.

...Урал гöраяс бокын вөр кварталъяс. Батыслы — Фёдор Варламович Чукулевлы — уна во зимöгоритöм бöрын удайтчис пырны лесник удж былö.

Сьökыд вöлі уна челядя семьялы овны ичöтик жалöванье вылын. Водз ковмис отсасьны батыслы. А сэн ещö Прохорлы кутісны вöзйыны «кокньыдик» нажötка — кыйöдчыны заводъяслы пес вöчысь сезонникъяс бöрся... Да гөгөрвоис öмöй сійö сэки, коды «уджаліс»?

Миронлөн мыгöрыс вежöрас кольöма медся ясöда. Весиг абу вунöмаöсь кывъясыс, кодъясöс вöвлöм матрос шуис сылы демонстрация разöдöм бöрын, кор пукаліс нин кöрт решетка сайын: «А тэ, Прохор Чукилев, важөн нин сыщикалан?»

Та йылысь Прохор татшöм стöча помнитö сы вöсна, мый Мирон Хуторков сылы вöлі землякөн, мый Миронöс сійö лыддис большевик Филиппөн ылöдöм мортөн.

Первой мирövöй война, окопъясын кынмалöмъяс да тшыгъялöмъяс, олөм йылысь став сійö думъясыс, кодъяс чужлісны сьökыд воясö, отсалісны сэкся Чукулевлы гөгөрвоны ассьыс öшыбкасö, а Октябрьскöй революция, выль порядокъяс быттö мездісны сійöс важторъяссьыс. Коліс повны сöмын эрдöдöмысь. Но Прохор Чукулев вöлі царскöй охранкалөн ичöтик «единицаөн», код бöрысь некод эз и думайт вöтлысьны, а списокъясыс, кöні сійö лыддыссис «служба» вылын, тыдалö, ас кадö бырöдсьылісны либö вошлісны.

Прохор кöть и век полөмөн, а гражданскöй война дырйи тышкасис Краснöй Армия радъясын не омöльдзыка мукöдъясысь.

Война помасьöм бöрын Уралас овны бөр эз мун. Дай некод дінö вöлі муннысö: бать-мамыс эз нин вöвны, а чой-вокыс удитöмаöсь разöдчыны. Локтіс чужан муас бөр, кытысь коркö батыс сійöс нуліс ичöt кагаөн на. Сійö бөрйис вөр бердын удж. И мед дзикöдз вунöдны важ йывсьыс, гөтрасьтöдзыс на вежис ассьыс

фамилиесö: Чукулев пыдди лои Кокановөн. Быд ногыс зілис шедöдны аслыс авторитет, пырис партияö.

Быттьöкö ставыс вöлі лючки-ладнö. А вот лои паныдасыны и лöсьыдтöм важыскöд.

Коканов очмыштіс: восьлалö рудзöг пöлөн. Шуйга киас сълөн кусöм чигаркаа мунштук, веськыд кийс шыльдiс розъялысь шепъяс кузя.

Сю тарыт цветитіс сорсөн-сорсөн. Аски асыв, кор пöлыштас тöвру, Хуторковъяслөн тайö ыбыс кутас ставнас быттьö тшы-насьны,— тадзи мунлö нянь цветлөн опыление. Шептасьны заводітöма ид. Регыд мöдас цветитны и сійö... Быдторлы тырмис ласкөв шондi, лөнъ рыт чуксаліс шойччыны. Но водзынджык сулаліс тасалöм öшиньяса керка, и сійö быттьö чусмöдыштiс шондiсö, чорзёдіс воздухсö, зэвтöмөн видзис Кокановлысь виръяйсö. Кöзяинөн энöвтöм керка сылы эз сет вунöдчыны.

Дай вунöдчыліс-ö коркö аслас мыж йылысь Прохор Коканов? Эз-ö и гражданскöй война дырйи старайтчыв ёнджыкасö сы могысь, мед, эрдöдасын кö, вöліны сійöс дорйысьяс? Эз-ö и партияс пыр та могысь жö — саймовтны важсö партбилетөн? Вöлі кö мöд ногөн, сійö эськö эз сусьсы, эз дзеб партияысь сі-йöтор, мый коліс кыв шутöг висътавын.

Эз прöста лöгав Коканов вёлö и Петрöван. Петра Сьöкыд-чиговлы вöлі тöдса, мый сійöс кулакö гижны тшöктылöма буретш тайö Прохорыс. И не сöмын Петраöс — унаöс, кодъясöс бöрын-нас комиссия бөр вуджöдліс шөркодя олысь крестьяна лыдö. Тадзи Прохор вöчліс бара жö сы могысь, мед петкöдлыны асьсö «неммиритчытöмөн». Сійö лыддис бурджыкөн «кусынътыштны шуйгавыв», мед эз кутны шуны «кулакъясöс дорйысьён».

Ставсö тайöс Коканов öні лэдзис юр вежөр пырыс, мед ещö öтчыд донъялыштны, кутшöмөн сылы колö лоны водзö. Но сы вöсна, мый царскöй охранкаын служитлöм йылысь тöдліс татчöс йöз пиысь öтнас Мирон Хуторков, кодi важөн нин абу ловъя, Прохор Кокановлы повны вöлі дзик нинöмысь, и сійö весиг сьö-лыштiс ас вылас дöзмöмысь. Коліс öмöй сылы тадзи шоммывын нинöмабусыс?! Эз-ö вöв бурджык и пывсьыны лэччыны öтилаян и лоны важмоз варовөн? Пöлинö, сійö лэччылас на пывсьынытö, кöзяиныскöд.

Прохор Федорович сувтыштiс ыб дорö да спокойнöя кутіс гартны выль чигарка.

А тайö здукö пывсян дінын артмис татшöм дивö.

Йöра ёль йивсянъ вөр туй локтіс пывсян дорті. Тайö туйöдыс гортланьыс тэрыба восьлаліс Чалко. Сы вылын мыйыс сöмын эз вöв: сійöс пöрадни, сямöд шуль мöтöкъяс, туис кышъяс, бадь кырсь, кодöс дасьтылöмаöсь тыла ректігөн на, кучикъяс дубитны, весиг сьöдас лöсалöм чер пу да сю кöйдыс нуан мешöкъяс. А шöрас пукаліс Öдюк да вöв восьлалöм улö аслыс сьыліс. Сылы вöлі долыд не сöмын сыысь, мый талун лои эштöдöма ыджыд удж — кöдзöма тыла, но и том ныв аддзыліс мыйкö сэтшöмöс, мый петкöдчывлö оз пыр и оз быдöнлы. Öдюк аддзыліс шоча овлысь цветлысь воссьöмсö. Аддзыліс сы бöрын, кор кöсйис тöдны, шуда-ö лоас тавося воыс. И тайö, асья кыа рöма цветыс, öні сы питшöгын!

Чалко вуджис нин Йöра ёль, тэрыба кайыштiс звöз кодь крут

чой, мед регыдджык воны кильчö помö, көнi сийöс сэсся мездасны ставсыс да лэдзасны йирсыны. Туй дорын сулалысь пывсян сылы öнi быттьö эз и вöв. И друг пывсян дiнтi прöйдитiгөн пывсян водзсянныс вöвлы веськыда кокъяс улас тювкнитчис на-кöд тшöтш ветлысь Соболю пон, кодi татчö пыралöма исавны тöдтöм йöзлысь паськöмсö. Чалко чеччыштiс бокыв сэтшöм вынысь, мый сы вылын эськö эз вермы кутчысьны вужъясөн кутчысьöмтор.

Öдюк недыр жежлö жаявлiс. Кор сийö восьтiс синъяссö, первой көсйис горöдны, но гөлöсыс сибдöма, и сийö, век сiдзи куй-лöмөн, кутiс видзöдны...

— Тэ, буракö, ёна доймин? Верман он чеччынытö? Гашкö отсавны?

Но шемöсö воём ныв эз дугды видзöдöмысь...

Дöрöмсö кизялигтырйи пывсян водзысь петiс мöд том морт — Микит. Сы бöрын уськöдчис Борис.

Свежов копытчыштлис муланьö да туплясысь сямöд мөтöкъяс костысь киас босьтiс гöрд цвет.

— Тыдалö, тэнад татшöм мичаыс?— юалис сийö да сэк жö цветсö чургöдiс нывлы. А ачыс думыштлис: «Но и синъяс талөн!..»

Воксö да Микитöс аддзöм бöрын Öдюк дзикöдз гөгөрвоис, мый сийö ловъя, мый гимнастёркаа том мортыс збыльнöй жö. Сiдзкö, ставыс ладнö.

— Босьт, бур нылö, босьт!— нюмунiс Свежов.— И лыдды, мый тайö цветсö быттьökö тэныд нетшыштли ме.

Да вермас öмöй ныв морт овны нюммунтöг, гөгөр кө сулалöны том зонъяс да, сэтчö жö, сылы сетöны ловъя цвет! Öдюк нюмунiс жö, сэсся сувтiс кок йылас да, көть и яндысьöмпырысь, но цветсö босьтiс. Ызнитiс сэтшöм кыпыд серам, кутшöм овлö сöмын том кадö, кодыр и вöв вывсян усьöм — теш, и öта-мöд-кöд тöдмасигөн «пуд сов» оз ков сёйны.

Котöртiс Коканов. Талань жö öвтчис-вартчис повзьöм мам. А том йöз чукöртiсны нин вöв вылысь усьöм көлуй да век сiдзи семдытöдзныс готъялисны-сералисны.

И сöмын Проня Петра нинöм тайöс эз кыв ни эз аддзыв: зонъяс петöм бöрын сийö ещö öтчыд вöчис сы мында жар, мый корöсьнас асьсö швачöдiгөн сöмын и акйöдлiс.

Эз вöв танi и Прокопей! Бөръя воясас сийö öдйö кутiс мудзны, и талун гортас воигөн ковмис некымынысь пуксьывны шойч-чыштны.

Горт дорас старик матыстчис сийö кадö, кор ньöти виччысьтöг кылыштлис уна йöзлөн серам шы. Хуторков эз көсйи, мед сы вылысь аддзылисны тылавывса сьöд бус да гөгөрвоисны, кутшöм удж сийö талун вöчис. Та могысь Прокопей жежавлiс Йöра ёль дорö, сэтчö пöрччис öтöпöк-кöмъяссö, мыськис ас вывсыс кыз сьöдсö да сöмын та бöрын локтiс гортас.

Но көть кыдзи сийö эз видзчысь, а Свежов кындзи, кодi не-кор на эз аддзыв тыла уджалöмтö, ставөн тöдiсны, кысян воисны ая-ныла: Петра да Микит асьныс вöдитлисны тылатö, а Коканов öтилаын пывсис көзяинкöд да сьöдасьöм яйыс серти эз жö вермы не гөгөрвоны та йылысь...

Коми крестьяна важысян нимавлисны лышкыд көзяеваөн, кор на ордö воывлисны гөстяс. Торъя нин бурöсь пöчинокъясын

олысыяс, кытчö гöстясыд воывлöны сöмын сура праздникяс дырйи либö кутшöмкö могыасөн.

Мужичöйяс пывсиг-керигкості Люба удитöма ломтыштны пач, пыртлыны жытниксыс кос яй, выйтор, йöв криньчаяс вылысь чукöртыштны нöк, перйыны лым көзöд вылысь солалöм комъяс, кольöм वोся тшак-ягöд, сола капуста...

Комиын важысянь жö вöлі мода — сёйöм водзвылын юны чай. Чай юигөн вайлісны либö ньöбöмторъяс, шуам, еджыд нянь да көлач-преник, либö, сійö кө абу,— пöсь блин, косьтöм яй, капуста...

Любалөн көлач-преник, дерт, эз вöв. И сійö, мед не кажитчыны скуп мортөн, вайис ыджыд тасьті тыр пöсь блин, пож тыр косьтöм пöтка яй, сувтöдіс паськыд вома сёй кашникын сывдöм мös вый, но нарошнö эз вай ни öти кусöк нянь — сійöс ваяс ужнайтігөн.

Гöстяс водзын эз коль уджйöзаён и ачыс көзяин: кыськö пыртіс аскур тыра туис — пиыс воигкежлö войтöдöмаöсь гозъя.

— Давай нö, бур йöз, пуксьöй. Нуръясыштам няньөн-солөн. Борис, тэ öд талун гöст жö. А тэ, Öдюк, тэрмасьышт. Чай кисьтавны.

Пывсян бöрад Прокопей быттö томмыштöма — еджыд дöрöма, сыналыштöм юр-тошка.

Румка пыдди — лöз рöма лампадка, дорыс неуна жуталыштöма, дерт, тöдтöм йöз дырйиыд быттöкö абу и лöсьыд, да мый вöчан, бурджыкыс кө абу.

— Тэ нö, көзяйка, эштан он нин?.. Волы татчö. Пиыдысь бурөн лючки воöмсö пасйышт. Öти сайысь гöснечсö пожйышт и...

Пöдароксö Борис эз сöмын мамыслы вай. Батыслы сетіс югъялысь көзырöка картуз, чойыслы — шöлкөвöй ковта.

Та вöсна и мамыс, кор киас босьтіс вина румка, чöвтыштіс пернапас да шуис:

— Инö, усканöй, эн пöръяс. А тэныд, пиöй, водзö бурджыка нажöвитны да миянös, ай-мамös, румка винаён не ордыны да пöдаркиясөн козыналöмысь не вунöдны.— Юыштіс и бөр муніс пач вом дорö. Но туйсö лои петкөдлöма...

Самöварлөн краныс ёна вияліс. Свежовлөн батыс вöвліс Кардорса öти заводын слесарён и, кор Гриша вöлі ичöt на, гортас вайлывліс кутшöмсюрö удж. Дзоньтавліс и самöваръяс.

«Колö видлыны чай юöm бöрас, гашкö позяс лöсьöдыштны»,— кран йылысь думыштіс инженер.

Видзöдіс кран вылö, а аддзис Öдюкысь кияссö — не том нывлөн кодъ гырысь да кос гаддя кияс. Борислөн найö гырысьöсь жö. А батыслөн — дзонь лапаяс, пыр кежлö крукыльтчöм чуньясаöсь, небзьывтöм вылö пöдöшваассöм кучикаöсь.

Некутшöма эз вун кыа рöма дзоридз. Öдюклөн көть и гырысь кияс, а, тыдалö, нежнöй сьölöм. Мöд ногөн эськö вöрысь эз вай гортöдзыс цвет. Нежнöй сьölöм и шоча овлысь мича синъяс. Пывсян бöрад тайö синъясыс кажитчисны ещö на гырысьджыкөн да сöстöмөн. Найö сöдзöдісны аслыссикас югөр, сэтшöмös, кутшöм овлö тöлысьтöм сэзь войö асывлөн югдöм.

Микит видзöдлывліс Öдюк вылö гусьөн моз, синкым увсяньыс. Аттö кутшöм мурыш характера зон тайö Микитыс! Вот эсь-

кö татшöм кодъясыдлы и колö меліджык гöтырыд. А то öтувтчасны кык сукар и нэмсö кутасны дойдавыны öта-мöдсö...

Тадзи думайтис Свежов. Но сійö эз тöд, мый Микита Расов кужис радейтчынытö, радейтис сідзи, мый весиг ёрис асьсö олöмсö, коді торкис сылысь тайö радейтчöмсö.

— Мамö,— шыасис Борис.— Тэ миянлы няньтö вунöдöмьд вайны.

— Эг эськö вунöд, дитя...

— Эн кö вунöд, мый он вай,— стрöга чöвтыштис Прокопей, и сылön татшöм стрöглуныс кызкö зэв эз лöсъяв ни таöдз вина румка гöтырыслы сетöмкöд, ни рытлön öтувъя нимкодълункöд. Но нинöм он кер: Прокопей абу велавлöма лоны мелінад. Дай Люба эз пыдди пукты верöсыслысь сы вылö горöктöмсö. Сійö вайис рудзöг нянь тупöсыас да мыччис верöсыслы:

— Шöралышт инöсь, Прокопей. Толькö öд няньыд миян, бобöяс, абу паськыд кушъясын быдмöм кодъ...

— Сёйсяс,— льöм пызысь кодъ сьöд да зэв кыза шöралöм кусöкъяс дінö судзöдчыштис Петра.— Медтыкö вöлі-а. Каръясын пö и татшöмыс оз ёна быглась. Век нормаөн няньтö сетöны.

— Сійöтö мый,— тэрмасыштис Петраöс торкны Коканов.— Интереснöйторйыс, колö шуны, вайдöрлун вöлі, Прокопей Васильевич... Гашкö, адзылінныд Вөръю кывтыдсьыс сьöд кымöрсö? Войнас.

— Адзылі. Ёна чардаліс. Тасянь öд му джынйыс тыдалö... Чайті, миянöд зэрас жö — войбыд сойяс мучитісны.

— Дак вот, колö шуны, не кö Григорий Данилович, миянлысь Микитаöс эськö свертöкö ковмис гижны.

— Чöv-чöv,— век на блинъяс дзожгиг-пöжалігмозыс шензъыштис Люба.— Мый нö нин сэтшöмыс лоліс?

Коканов торкис Проня Петралысь висьталöмсö эз сы вöсна, мый быттьöкö эз позъ казътыштны нянь норма йылысь — öд тайöторйыс збыль вöлі — Прохор Федорович бара жö тöждысис ас вöснаыс. Сійö көсйис лоны Свежов водзын и лабутнöйөн, и выдержаннöйөн.

— А вöлі, бур көзяюшка, со мый, колö шуны...

Войся бушков йылысь, Микитöс чардөн лыйöм йылысь и кызди сійöс спаситис Свежов, десятник висьталіс стöча, не кö лыддыны кутшöмсюрö посниторяс, кодъяс йылысь окотапырысь содтышталіс Борис.

Ставыс тайö лои ещö на интереснöйөн сэки, кор Свежов тöд-мöдіс кывзысьясöс, мыйла артмывлöны татшöм бушковъясыс, мый сэтшöм чардыс да гымалöмыс.

Дерт, сылön висьталöмысь быд морт тані гөгөрвоис сы мында, мыйта вермис. Прокопей, например, пыр на чайтліс, мый бушковъясыд, чардъясыд да гымъясыд — енлön делö, и том мортлы эскис омöля.

Любалөн вежöртöмыс бергаліс ёнджыкасö Микит гөгөр. Первой кö, сылön чужöмыс бледөн вöлöма доймöмысла. Мöд-кö, Микит — кык нэма. Мöд ногөн эськö Свежов эз лöсъяв сэні да эз ловзёд чардөн вилöмаöс. А сы вöсна, мый Микит — жöникзон, сідзкö, невеста-ныв мамы колö лоны и ласкөвджыкөн, и лышкыдджыкөн.

Аслыс ногөн инженерöс гөгөрвоис Петра. Сы серти, та-

тшөмъясыд сы вылө и велөдчөны, мед кажитчыны төлкаджыкөн прөстөй йөз дорысь, но збыль-ө төлкаөсь, колө на видзөддыны.

Коканов — мөдарө. Первой лунъясас кө Свежовөс сійө пук-тис пыдди сөмын ыджыдджык чиныс вөсна, то өнi удитис нин ка-завны том инженерлысь и паськыд төдөмлунъяс, и вына харак-тер, сідзкө, эз мешайт кутчысьны Свежов дінө пиньөн и гыжйөн.

Микитлы кажитчис, мый бөръя лунъясас сы пытшкын муно кык полөс бурдөм: өти бурдөмыс доймылөм вир-яйлөн, мөдыс — чорзылөм сьолөмлөн. Но мый лоө водзө, и ачыс на эз төд.

И сөмын Борис Хуторковлы первой лунсянныс нинөм эз мешайт гөгөрвоны Свежовөс сідзи, кыдзи эм да мый сійө вись-таліс. Борис мыйөнсюрө кутіс подражайтны Григорий Дани-ловичлы: юрсисө сыныштывліс шуйга ки чуныяснас эз мисьтөм-джыка сыысь.

А мый шуны Одюк йылысь? Сійө олөмын талунъя луныс ка-житчис мича вөтөн. Од збыль: вөвліс өмөй коркө да вермас өмөй лоны мөдысь, мед сылы, сійө көсйөм серти, сьод вөр шө-рын воссис цвет. И тайө цветсө сэсся веськыда сійө киясө сетіс төдтөм том зон. Абу өмөй гөгөрвоана, мый и вөв вывсьыс эз прөста усь... Коді нө, коді сылы лоө тайө зонмыс: шуд вайысь али шог да печаль туналысь?

Чеччисны нин чай юанінысь. Борис пыртис жытниксьыс ва-жиник гудөк.

— О! — шензыштис Свежов. — И тэ, Борис, өнөдз на чөв олан?

— Мый нө меным — ошйысьны али мый тайөн? Ме таво Котласысь адззылі дукрадкаяс да эг лысьт босьтнысө батлысь юасьтөг... Нолтө, спробуйтлы, туйө оз.

Гудөк пошкис и киргис, но ворсны мыйсюрө позис на.

— Ме бөрынджык ещө видла, — Борислы гудөксө бөр сетіс Свежов да матыстчис Прокопей дінө. — Тіян зэв ёна виялө са-мөварыд. Позьө виддыны?

— Кынтисны восьса вомаясыд, — гөгөрвоөдыштис көзяин. — Төв шөрын петкөдөмаөсь пузьөдны посводзө, а сюрсө кепысяв-ны вунөдөмаөсь. Прөстудитчөма, буракө...

— Төчила тіян эм? — крансө видлөм бөрын юаліс Свежов.

— Төчила нө кыдзи абу крестьянинлөн.

— А төчила няйтыс сюрас?

— Тэныд уна-ө колө?

— Пань-мөд.

Прокопей ачыс пыртис бекар тыр төчила няйт. Свежов сійөс неуна пуктис кран позйө.

— «Прөстудитчөм» кранъястө мян батыө лечитліс со тадзи, — висьталіс сійө да кутіс бергөддыны краныслысь ручкасө — нирт-ны позсө и асьсө ручкасө төчила няйтөн.

«Лечитысь» гөгөр чукөртчисны ставөн.

— Мастерөвөй морт, сідзкө, тэнад батыд? — юаліс Люба.

— Вөвліс мастерөвөйөн. Да белөйяс лыйлісны гражданскөй война воясө.

— Господи-господи... Мыйысь нө?

— Тэ быттьөкө эн и кывлы белөйяс йывсьыд? — гөтырсө дивытштіс Прокопей. — Мыйысь нө найө и коми йөзсө йи улө ловйөннас сюявлісны?.. Сы вылө и белөйяс.

Гражданскöй война кад йылысь сёрнитигөн Свежовлы отсасис Коканов. Вöвлöм красноармеец, сийö ачыс аддзывлöма белöйясыдлысь зверствояссö.

Интереснöй висът кывзигөн кадыс колис сэтшöм öдйö, мый мастер удитис «бурдöдны» самöвар кран.

— Ой, спасибö жö нин тэныд, сё спасибö!— Свежовöс аттьöалис Люба.— А ми, пемыд йöзыд, и думыштны ог сяммö, кыдзи колö сийöс лöсьöдыштны... Тi, том йöз, эн на петö ывлаас, эн на. Ужнайтыштам да сэки...

— Ещö али мый сёйны, бур көзяюшка? Ми тырвыйö пöтöсь,— та вылö вочавидзис Свежов.

Здук мысти ывлаын кылыштіс виль песнялөн мелодия, кодöс гудöкөн ворсіс Григорий Свежов.

Гöстъяс пöвстысь ужнайтны кольччис öтнас Петра. Тайö, гашкö, и бурджык: Прокопей гозъя öнi вермасны юасыны сиктын выльторъяс йылысь мыйта окотитасны.

Да уна-ö вермас висътавны Проня Петра, кор сийö öнöдз на лючки оз вермы воны ас шöрас — сэтшöма повзылыс кулакавлігас.

Петра серти, сиктын öнi сы выйöдз ставыс гудыртчис, мый тайö гудырас асьтö он тöд, кодi тэ эм и мый тэкöд лоас аски.

Непöштö Петра Съöкыдчигов — весиг сэтшöм олысьяс, кодъяслөн асылын пач ломтöмыс мукöдъяслы вöлі чеччан кадөн, а рытын би кусöмыс — узьны водан пöраөн, весиг найö пöвстысь кодсюрöяс шöйöвошöмаöсь.

Öти татшöм шöйöвошöм мортнас Важгорт сиктын лои Чугун Öльöш — Расов Микитлөн батыс. Нэмсö ас наукөн олысь, збыль чугун кодъ чорыд характера, Öльöш друг и шогö усис, и воштіс ассьыс унсö.

Сийö некымын лун нин некытчö эз петав чöвусьöм керка жыръясысь. То паччöрас куйлыштас, то видзöдыштас öшиньясöд, кодъяс сярвидзисны и мир туйлань, и паськыда шеныштчöм рудзöг йöрлань, то бара пöрöдчылас шöр жырас шкап да занавес сайын сулалысь пу крöвать вылö. Көть нин эськö шырпи ли мый ли көнкö дзивöстас... Но вöлі юрвемтö дойдмөн лөнъ и морöс йöрыш поткöдмөн гажтöм. Лөнъ сэні, көні некымын дас во чöж мазі позйын моз мургис олөм, көні первойсö батъ, а сэсся батюшко да ыджыд ай, Öльöш лыддис асьсö тырвыйö көзяинөн.

Эз вöв кокни быдтыны ас гөрб помысь вит пиös, ещö съöкыджыкөн кажитчис лöсьöдны налы тыр овмöсьяс. Нэмсö эз тöдлы шойччөг, эз убöлиты вурöдны бурджык паськөм, сёйны чöскыджыкторъяс, лоны лышкыдөн йöз водзын, а торйöдліс ас дінсьыс тыр семьяа пиянсö «ыжөн и пыжөн», кольча кодъ стрöйтöм керка-картаясö. Мыйтакö кокньöдыштіс Опоньыс — Васька да Сергей бöрын коймöд пиыс. Сийö овмöдчис ыджыд карын, сылы вылö стрöитлөм керкаö петавліс овны нельöд пиыс — Митрей, öнiя сиктсöветса председатель. Лои буретш сийöтор, мыйысь коркö важөн на повліс Чугун Öльöш,— пöрысьö-нэмас öтнасөн кольöмысь.

Микитыс эськö лыддысьсö ськөд на олысьөн, да мый бурыс сысысь. Ни гöтрасьны некод вылö оз ышты, ни олөм дінас прамöя кутчысьны оз көйы. Мöд во нин сьöдас олö...

Али правöсь пöрысьджык пияныс: колö пырны колхозö? Либö

овмөдчыны на ордын, Микитыс кө и водзё кутас пыксыны колхозё пырөмысь?

Но өд тайөс шуныгё кокныд, да вөчнысё сьёкыд. Расов Ольөксей абу велалөма ни йөз мывкыдөн овны, ни төдтөм джодж кузя ветлөддыны.

Да вермас өмөй сійө эновтны ассъыс радейтана писё, кодөс быдтыны да воштыны мортөдз көсийліс кулысь гөтыр вольпась дінын, кор Микитыс вөлі нёньпом кагаөн на.

Куим лун сайын Ольөш діно ещё өтчыд воліс Митрей пиыс. Сійө көсийс сёрнитыштны батыскөд Микит ветлігкості.

Дмитрий Расовлы — сиктын советскөй властьюн веськөдлысьлы — вөлі юръяндзим сыысь, мый сылөн батыс да томджык вокыс сиктын лоины медся бөрө кольөм йөз лыдын. Водзё терпитны сэсса эз нин позь, и сійө сэки первой кывъяссияныс шыасис старик діно дөзмөмпырысь.

— Тэ, батьё, пароход трюмын олысь кодъ жё: муна, а он төд кытчө.

Ольөш быдөн синъяссө сувтөдліс пиыс вылө.

— Мый тэ сэтшөмсө висьталан, ме мыйкө ог гөгөрво?..

— Гөгөрвонысө эськө гөгөрвоан, да асныралөмыд тэнад унджык. Олөм олін — йөз доддьё эн пуксьыв, нэмтө кесйөдлін, а мөд мортлысь кывзыны эн көсийыв.

— Сё пасибө татшөм кывъяссыд, муса пиёй, сё пасибө... Мися жё, коньөръяс, быдминныд көмтөг да пасьтөг, нуръясинныд корысь нянь кусөкөн, овмөдчинныд асланыд семьясөн бобыляс моз — сигөр пөла пывсянъясын...

Ставсө тайөс Ольөш шуис сэтшөм ногөн, кытысь кыліс өтпырйө и писё лөга сералөм, и сы вылө ыджыд өбида. Митрей быдөн гөрдөдыштис яндзимысла да тэрмасьыштис шуны:

— Ог норасьёй тэ вылө вок котыр. Тэ моз зія уджалысь да аслас пиян вөсна төждысьысь батыд шоча овлө...— Митрей тшөкмуніс: эз татшөм сёрни ков өні. Сійө лючкиджык видзөдліс батыс вылө. Сы водзын сулаліс важ дорысь ёнджыка мышкыртчөм джуджыд старик, кодлөн быд лы и сөн висьталісны сьёкыд уджын коллялөм нэм йылысь. Кизьөриник тошкыс, коді бөръя кадө лоөма дзик нин руд, а сідзжө стрөг чужөм вылын гырсяммөм син гуранъясыс вөчисны сійөс ещё на ёнджыка мурышөн.

— Батьёй, гашкө, пуксьылам да сідзи варовитыштам?

— Прөста воштан кадсө,— водзвыв быттё керыштис Ольөш.— Колхозё пырөм йылысь ме тэныд висьтавлі нин. Кыдзи велалөма овны, мед сідзи и кольө. Тэ менө сэсса эн нин дөзмөд та бөрын.

— Но өд тіянөн, ая-пияөн, ми вокөс синмө тойлөны,— эз сяммы кутчысьны Митрей.

Старик быттё выльысь дрөгнитис да кызкө ставнас йөжгылтчыштіс.

— И таысь пасибө...— усьөм гөлөсөн чөвтыштис сійө и сьёкыд воськовъясөн пырис жырйө.

Да. Лэчыд кывйыд абу жель: сатшкысис — емөн он перйы. Сатшкысис веськыда пөрысь бать сьөлөмө. Ёнтө дугдывтөг, терпитны позьтөма. Вермас өмөй лоны бать-мамлы ёнджыка өбиднө сыысь, быттёкө пө найө асланыс олөмөн заводитөны мешайтны

пи-нылыслы? И тайö став сійö бурсьыс, кодöс бать-мам вöчлöны ассьыныс дрöчкаяссö быдтігөн!

Öльöш ас ногыс вöлі гөгөрвоысь мортөн. Сійö эз вермы не вежöртны, мый Митрейыс, кодöс бать пыр на лыддьыліс тölка мортөн, татшöм кывъяссö шуис прамöя думышттöг.

Но весиг татшöм гөгөрвоöмыс эз вермы небзьöдны сылысь дойсö.

Кутшöмтор сöмын эз артышт бөръя лун-войнас Алексей Ра-сов. Думсьыс удитліс пыравлыны колхозö да аддзыны серпас, кызди сійö аслас кокъясөн нуис öтувъя картаö вöв-мөссö, аслас киясөн сетіс кык көльöсаа «Сакко» плугсö да «Зигзаг» агассö, кодъясöс ньöбліс кык во сайын на, «пöдаритіс» некутшöм дон босьттöг, весиг пасибö эз шуны... Аддзыліс татшöм серпассö и войбыд вöталіс мисьтöм вöтьяс.

Думсьыс жö ышöдліс Микитöс пырны колхозö. Гашкö, сэнi, йö-зыскöд öтув, озджык ло öнiя кодъ жутыль. А ачыс старик кутас овны сы дінын колхозö пыртöг. Либö овмöдчас пöрысьджык пи-ян ордас: öти ордын öти во, мöд ордын мöд во...

Но артмас-ö татшöм ногөнсö? Оз-ö ло сідзи, мый öнi кө сы вöсна «тойлöны» синъясас öти пиы, то сэки, «трюмын мунысь» асныра бать вöсна, кутасны дöзмöдны витнан писö. М-м-м!.. Тадзинад нин бурджык помавны ассьыд олöмтö, не мешайтчыны йöзыслы.

А... пышйыны кө татысь?

Первойсö татшöм мөвпыс Öльöшлы кажитчис дзик шогмытö-мөн. Но чöв-лөнъ керкаын вöлі сэтшöм гажтöм, а Митрейөн шуöм лэчыд кывъяс сідз дойдісны сылысь чорыд сьölöмсö, мый пыш-йöм йылысь дум, висьысь пинь моз, дугдіс сетны овны.

Но кытчö, дыр-ö кежлö, кутшöм ногөн эновтны гортсö? Öт-наслы али пиыскöд?

Пöлинö, Микитыс сьлөн көсйис ветлыны Вөрью кузя вежон-мöд. Сыкöд жö, буракö, лöсялöма гортланьыс мунны пöчинокса Прокопелён пиыс. Öльöшлөн Проня другыс ордö, дерт нин, волосны... Со көнi шуда йöзыс — тайö Хуторковъясыс. Некод нин оз шу — пырöй пö колхозö, некод оз öтувт сы ыласьыд ни му, ни видз. Ов да ов вөр-ва—матушка шöрын, кызди ай-мам-лөн шоньд борд улын.

Старик тадзи думайтис Митрей волöм бöрын нельöд лунас нин. А витöднас водз чеччысь көзйакаяс аддзылісны, кызди Чу-гун Öльöш — шабура да лазъя — беддясис-муніс коськöм ыбъ-яс вомөн Вөрью йылö кайысь туйлань.

Ковмис кайны лунтыр, уна колода вылын шойччыны, уна шор-ысь ва юны. Лунтыр жö ёна дöзмöдчисны лöдзьяс.

Вөрью дорö петöм бöрын нин ньöти виччысьтöг паньд сю-рисны милиционер Пальö Ванько да тöдтöм морт. Найö кыкнан-ныс вöліны гражданскöй паськöмаöсь, но Öльöш пыр жö казяліс пинджак пöлаяс улас öшалысь наганъяснысö.

Торъя шензьыны, дерт, нинöмла: кольöм воясö Комиö быд-ладорсянь вайлісны переселитöм вылö раскулачитöм йöзöс, и на пöвстысь кодсюрö вöлі пышйöны бөр. Вöліны и гырысь мыжъяс вöчöм бöрын пышйысьяс, кодъясöс, тöдöмысь, корсисны да ку-талісны.

— Шойччыштам, Ёльоксей дядь,— старикос сингяснас шобигтырйи шыасис Ванько.— Ылөдз мөдөдчөмьд, буракө?..

— Мөдөдчи тай... пальөдчыштны,— розъялысь пувйөн тыр вутш вылө пөрөдчыштіс Ёльөш да сэк жө думыштіс:— «Со и ме, тыдалө, шыш кодьөн кажитча».

Ванькоос Ёльөш төдіс ичөтысянныс. Тайө Палө нима пөрысь нывлөн пи. А сы вөсна, мый мамыс өткажитчөма висътавны кага батылысь нимсө, Иванөс вичалөмаөсь Павловичөн, а овсө сетлөмаөсь Павелов.

Быдмис Иван Павелов корөм сорөн, зонпосни кадсянныс кутіс казакавны, кьдзи сэки шулісны батрачитөмтө. Первой уджаліс Ручпиян грездса бурджыка олысь крестьяна ордын, зонмалан кадас вуджис Важгорт сиктө, Власий Сирвойтов овмөсө, мед матынджык лоны өти визув ныв дінө, кодөс радейтіс. Но гөтрассны — бурджык шуны, пырны зятё — эз удит: первойсө пыксис пыртны гортас нывлөн батыс, сэсся пансис мирөвөй война.

Германскөй вылысь Павелов воис куим орддытөг. Визув Дарья оліс батытөгыс нин, и салдат пырис сы ордө гортө моз.

Революция бөрын Важгорт сиктын друг казялісны, мый Палө Ванько гөгөр кутісны котыртчыны гөля олысьяс, сійөс бөрийсны беднота комитетө юралысьөн.

Сэсся кутіс кывсьыны: Палө Ванько пө милиционер нин, и өні томджык йөзлы кажитчис, мый сійө милиционерөн и чужлөма.

Павеловлөн ёртыс зепсьыс перйис папирос пачка.

— Куритчан он, дедө?— пачкасө Ёльөшлань чургөдіс сійө.

— Ог тшынась, бур мортө,— вочавидзис Ёльөш.— Томысянь эг кутлы вомын татшөм пакөсьтө.

— Ачыс оз курит дай пияныслы эз тшөктив,— папирос босьтігөн татчө содтыштіс Ванько да висъталіс ёртыслы, мый тайө лоө Митрей Расовлөн бать. Төдгөм морт та вылө довкнитіс сук юрсиа шапкатөм юрнас: гөгөрвоана пө. А Ёльөш бара думыштіс: «Навернө татшөмгьясыс и «тойлөны синмас» председательлы аслас өтка олысь батыөн».

Сійө ещө пасйыштіс аслыс, мый налөн гожъялөм чужөмгьясыс лун-мөд нин бритлытөмөсь, сідзкө, сиктссянь найө петавлөмаөсь абу нин талун асыв.

Пансис тэрмасьтөм сёрни, код дырйи Ёльөшлы ас йывсьыс лои висътавны стөчджыка: мунө Проньө другыс ордө гөститны. Казытыштіс и Вөрью кузя ветлысь изыскательскөй партия йылысь, көні уджалө Микитыс.

Полө-ө «кык кока ошгьясысь»? Мөд ногөн кө, пышгьялысь йөзысь да быдсяма шышгьясысь? О-о-оз, Чугун Ёльөш наысь оз пов. Сійө өд абу мича ныв. Дай мый морсө пышгьялысьясыд мөдасны вөчны тані, мир туйсянь да сиктгьяссянь ылі вөр-ваын?

Ёльөшлы кажитчис, мый сыкөд варовитысьяс думайтөны тадзи жө, и шойччыштөм бөрас найө бурөн-лючки торйөдчисны: старик — отарө, а милиционер да сылөн ёртыс — мөдарө.

Пөчинокө Чугун Ёльөш воис рытгья вылыс нин. Прокопей гөзья сійөс примитісны вольтөм гөстьөс моз. Сэк жө налы эз терпитсьы төдны Ёльөшлысь могсө — мыйла воис татчө. Гашкө кывліс Микитсө гимнөлөн лыйлөм йылысь? Но мыйла оз юась та йылысь? Али со воис... корасьны? Но өд татшөм могнад волөны бурджык паськөмөн дай оз өткөн...

Ковмис чöвтавны тöняяссö былсяньджык.

— Сэссия нö, Öльöксей Петрович, кутшöма нин оланныд-выланныд сиктас?— ласкöва юалис Люба.— Мыйкö тай Проня Петра зэв норасьö. Воддза войсö найö, Микитъясыдкöд, тані узисны.

— Вошис тöлкыс сиктад,— Петралысь висьталöмсö вынсьö-дыштис Öльöш.— Став важыс, мый лöсьöдлöма нэмъясөн, пракөн кутис мунны. Овны эз кут поэны.

— Сё дивö тай, сё дивö!— шензис Люба.— Ми, Прокопейкöд, вöли омöля и эскам Петрованлы. Шуам, эз жö сы выйöдз воштыны юрсö йöзыс...

Прокопей стрöга видзöдліс гöтырыс вылö: эн-ö пö лишной уна кут тöдны, бабйö мывкыд? А кывнас шуис:

— Дурасны-дурасны да коркö воасны жö садяс...

— Гашкö и воасны. Толькö тай виччысьнысö сьöкыд,— ышловзис Öльöш.

— Öдюк,— посводзлань горöдіс Прокопей,— тэнад нö сэнi дыр на оз пузы самöварыд?

Дзурк-воссыйштис öдзöс.

— Регыд нин, батйöй.

Ныв мыйкö виччысис жö. Виччысис и поліс мыйыськö. Öд тайö — Микитлөн батй. Прöста сійö эз лок на ордö да ещö сэтшöм лун-войö, кор сылөн пиыс тані. Талун ли аски Микит бара вермас воны пöчинокö...

Нылыс дінö петыштіс мамыс. Видзöдлісны öта-мöд вылас, быттö öтув жö шуисны: «Курöглысь кольк вайöмсö котсöмыс серти тöдан, а мортыдлысь думъяссö и сёрни-басьниысь он велав».

Öльöш висьталіс милиционеръяслөн сылы паныд сюрлөм йылысь. Сійö көсйис тöдны, волісны эз татчö.

— Эг аддзылö,— явö повзыштіс Прокопей.— Эз волыны.

— О, господйöй, налы нин мый ковмöма миян вөр-ваысь?..

Прокопей гозъя медся водз повзисны асланыс тыла ради. Эз-ö нин тöдлыны? Оз-ö нин корсьысьны? Но öд тылаяс корсьöмыд абу милициялөн удж.

— Кольöм войö понъяс, эськö, увтчисны и эм,— казтыштіс Прокопей.— Раз-мöд сувті вольпась вылысь... Ог тöд, ог тöд... Эз жö öд понъясысь повзыны?.. Таланьö волысьясыд быттöкö век на пыравлісны миянö-а...

— Шышгясöс, тыдалö, корсьöны,— стöчмöдыштіс Öльöш, көть эськö милиционеръяскöд сёрнитигөн эз тадзи думайт.— Оз балуйтны тіян гөгөр... шышгясыс?

— Ен видзис на öнöдз,— чöвтыштіс көзяйка.

— Эз на сулы татшöм грекыд,— содтіс көзяин.

И көть лои гөгөрвоана, мый Öльöшлы паныд сюрлысьяс ветлöны асланыс могъясөн да, сідзкö, нинöмла повны тыла аддзöмысь, тöждысьöмыс век жö эз чин. Код тöдас: кольöм войö гашкö шышгяс и матыстчылісны пöчинокныс дорö, да повзисны понъясысь...

Кутшöм нин сэтшöм кадъяс лоины, кор колö пышйыны рöднöй сиктысь, мед дзёбны йöз синмысь ассьыд важъя олöмсертö. Мыйся нин пöра пуксьö, кор весиг ылі вöрса пöчинокъясын колö повны...

Да өд со и Вөръюто кутисны видлавны гөгөрбок. Эскины кө сійө жө Проня Петралы, и та боксянь нинөм бурыс оз тыдав...

Олом-вылом йылысь сёрни да басни пансис вель вынөн.

Өдюк пыртис самовар. Ольош, вөлом, сёрсыс вайома гөснеч — бутылка вина да черинянь. Чай сайын лои гажаджык. Вочасөн вежсис и сёрни сям.

— Эскины кө менам Митрейлы,— варовитис Ольоксей Петрович,— оломад став тайө вежсьомъясыс быттёкө лад выло мунёны... Сылы, сикт вылын медся ыджыд начальниклы, дерт, унджык тыдалө,— аслас председатель-пиён ошйысьыштіс бать.— Но таысь ми воклы рөд абу кокныдджык. Пёрысь пу кодьось ми вокыд. Сійөс тай кутан кусыньтны, да пыр и чегө.

— Чегө пёрысь пуыд, нинөм шуны, чегө. Төрмөмаджык, видзөдтө...— өти кывйөн сёрнитис Прокопей.

— Сирөд мырьяс кодьось найө, пёрысясыд,— содтыштіс Ольош.— Кутшөм пөтшваысь босьтлісны сирсө, сэтчө и бөр сетасны.

— Чорыдось сирөд мырьясыд, чорыдось.— Прокопей төдлытөг видзөдліс аслас кияс выло.— Вель уна ковмис бертны найөс татчө воөм бөрын...

— Та выло и муніс став вын-эбөсыс коньөрүшкалөн,— верөссө жалытыштіс Люба.

Прокопей дөвөлена серөктіс:

— Тэ тай, көзайка, томмин... Сө өтиөд чукур на и оз тырмы.

— Да мый нин ме йылысь баитан...— ышмыштіс Люба.— Сідзи енлөн шуөма: мырсыны да пессыны... Мукөд дырйи, Ольоксеюшко, этадз пуксян да думайтан-думайтан и некыз он гөгөрво, кутшөм олом овсьөма, мый бурсө аддзывсьөма.

— Тэ, Любушка, прөста норасян,— меліджыкөн кутіс кажитчыны Чугун Ольош.— Енмыс тіянөс, гозьяөс, абу на вунөдома. Мырсинныд кө, и спокой лоө пёрысьө-нэмад. Некод нин татшөм ылі вөръяссыд тіянөс оз кут вөрөдны. Кургы да ов важ ногөн.

Тайө кывъясьяныс, буракө, и заводитчис сёрниыс мунны колана визьөдыс. Ольош бара норасыштіс аслас олом выло. Быттё ненарошнө чөвтыштіс, мый сійө эськө радпырысь овмөд-час ылі вөръясад, дерт, оз өтнас, а жөник пиыскөд.

Пөлинө, вунөдісны висьтавыны гөстыслы: сылысь Микитсө гымнөлөн лыйлөма.

— Ак, сө трасича,— повзыштіс бать,— пу улө, сідзкө, сувт-лөма гымалігас.— И кутіс юасыны паськыдджыка.

Прокопей гозья висьталісны Микит йылысь ставсө, мый төдісны, да бөрыннас содтісны:

— Ыджыд лөкъясысь, буракө, ен видзөма том мортөс, но сідзсө мыйкө абу варов...

— Менам кок пөв,— татчө чөвтыштіс Расов.— Юмов преник выло оз ышты. А сідзсө лада детинаыс, лада, нинөм он шу. Уджссыд оз пов и. Да вот өтитор лөк — моньсө меным мыйкө дыр оз аддзы...

Люба өдйө видзөдліс верөсыс выло: шулі эг пө — корасыны локтөма. Дерт, Люба эз кывйөн тайөс шу, а думсыс, но гөтырыд да верөсыд тай син гоз кодьось: мый аддзө өтиыс, сійөс и мөдыс.

— Моньпутө корсыны ноп сукар оз на ков косытны,— Ольошы и гөтырыслы өтпырйө вочавидзис Прокопей.— Тайө добраыд абу тшак: төлын и гожөмын чужө да быдмө.

— Сідзсö эськö сідз, да öд абу öткодь тшак вотысьыс,— во-
дзöссö не стöч кывъясөн кутіс сёрнитны жöниклөн батыс.—
Тшакыд уна, а кузовыс öти.

— Чöв-чöв, Öльöксей Петрöвич,— ёнджыка варовмис Лю-
ба,— оз на быд кузовö и тшакыд öшйы...

Но тайö нин заводитчис донъясьöм. Öдюк сэсся эз нин вермы
пукавны пызан сайын да кисьтавны чай. Сійö уськöдчис öдзöсö.

И друг ставөн гөгөрвоисны, мый тшак да кузов йылысь пыдди,
вöлöмкö, сёрнитöны жöника-невестаа йылысь. Татшöм öдйö?..
Ойя да ойя! Кыдзи нö Любаыс кутас овны öтка нывтöгыс, тор-
йöдас кö сійöс ас дінсьыс? Кодкöд горöдчас воча кыв, кодлы
норасьыштас аслас сьöкыд олöм-вылöм йылысь? Да öд нылыс
сылөн колип-пöтка кодь: кывтö шуас — быттö сьылыштас. Да
öд донаыссылөн асья шондi кодь: пырас керкаад — ставыс юг-
дыштас...

«Эн шогсьы, кöзйяка,— гöтырыс вылö чöвтыштлис синъяссö
Прокопей.— Нывтö кымын öдйö иналан, сымын бур».

«Да и ме сэтшöм жö пöрысь выжив,— асьсö кöритыштіс
Микитлөн батыс.— Пилы кыв ни джын эг шулы татчö локтöм
йылысь, а корасьны заводитi».

Но сöмын öмöй пиыс вöсна тöждысис Чугун Öльöш? Эз öмöй
сійö первой делö ас вöснаыс лок татчö?

Да и Прокопейлы эз мешайт паськыдджыка артыштни. Öтка
пиыд, зон, батылөн öти ки кодь: стрöймис сійö — мöд кийд абу,
оз отсав. Эз öмöй кык лун сайын на Прокопей скöрмыв Борис
вылас. Бать сійöс некытчö нин эз кöсйы лэдзны гортсьыс, а
пиыс век жö муніс. Дай шуис на: тэ пö, батыöй, ачыд он тöд, мый
сёрнитан... Тöдтöм кывъясөн шыбласис: быттöкö пö сотсиализ
кутшöмкö кутас кайны Вөрью кузя... Чөртыс тöдö найöс. Мили-
ционеръяс прöста оз ветлыны ылі вөръясöд. Понъяс нинöмабу-
ысь оз увтчыны войбыд. И Öльöш бурысь оз кöсйы пышйыны
сиктысь. Шуис тай: ме пö эськö радпырысь овмöдча вöрын, пи-
ыскöд тшöтш. Гашкö кайтыштни сылы, кöсйö кö лоны сватөн,
мед овмöдчасны татчö. Керкаыс Миронлөн дась. Ас йöзыдкöд век
нин гажаджык лоö.

Прокопей та йылысь думайтіс на, а Любалөн вомыс воссис
нин:

— Сэсся нö пиныд, Петрöвич, збыль оз кöсйы пырны колхозас?
Öльöш видзöдліс Люба вылö.

— Öні кежлö тай öткажитчис на...— вочавидзис сійö и сэк
жö думыштіс: «Ладмас, тыдалö, делöыс. Öні ставыс лоö Микит
сайын. Ковмас виччысьлыны Вөрью йылысь бөр воöмсö». И
юалис:— Дыр-ö кöсйисны ветлыны вывланьыс?

— Талун-аски локтасны бөр.

— Бур, сідзкö...— чöвтыштіс Öльöш да чеччис пызан сай-
ысь.— Сё пасибö, Прокопей, Любушка! Ёна и юим чайтö.

— Аслыд пасибö, Öльöксеюшко: гөститöдін. А ваыдтö миян
тані зэв чöскыд.

— Шор ва, тыдалö.

— Ва вылö ог норасьö...— Прокопейлы öні вöлі окота öти
сайысь ошкыштни и пöчиноклысь джуджыд мыльксö, и сылысь
бур мусинсö да туруна пöкатъяссö, мед ышöдны лоана сватсö

овмөдчыны пиыскөд татчө. Но став тайөтор йылысь, дерт, бурджык сёрнитны Микит воём бёрын. Варовитны кутісны мыйсюрө йылысь.

А Öдюк кызди шыбитчыліс сараяс турун ылө, сідзи и куйліс өнөдз на. Первой сійө пөттөдзыс бөрдыштіс. Бөрдіс эз сы вөсна, мый сылы ковмас петны верөс сайө,— нылөс повзёдліс мөдтор: лоас-ө мусаөн Микит. Öд сылөн батыслөн кодъ жө стрөг чужөм и йөз дінө сибавтөм характер — тайөс Öдюк аддзыліс войдөр лунө. Рыт чөжөн Микит весиг дас кыв эз горөдчыв. Öшинь улын койтігөн вомсө эз восьтив сьывны песняяс...

Ас думсьыс Öдюк көсйис аддзыны Микитлысь нюммунөм, кывны гажа серам, шмонькыв. Но сөмын на куняс синъяссө да кутас зільны аддзыны сылысь татшөм гажа чужөмсө, сідзи и петкөдчө мөд мортлөн чужөм — кыпыд и мелі, быттё важөн нин төдса. А киас тайө зонмыслөн кыа рөма ыджыд цвет. «Тыдалө, тэнад татшөм мичаыс?.. Босьт, бур нылө, босьт!..»

Тадзи вөлі некымынысь, и Öдюк кутіс повны. Сійө өдйө петіс сарай звөзөд ывла ылө да мөдөдчис ыбъяс дорөд медея выынінө, кысянь бура тыдаліс Вөрьюланьсянь воысь пода туй...

Помыс локтан номерын.



Александр ПАНИЮКОВ

Джуджыд керöсын, гажа нöрысын

О Ч Е Р К

*Джуджыд керöсын, гажга нöрысын,
Отнас важ керка сулалö дыр...*

П.Шеболкин

Макар-Керöс важся кадö

Макар-Керöс — Макаровскöй ним улын — медводдзаысь казътывсьö Григорий Вахромеевлöн 1707 вося дозорнöй книга-ын. Овлывлöма сэки бöбыль Макар Павлов Козлов, керкасö лэптылöма Ичöт вад нöрысö. Сэки вадйыс да Эжваыс йитчы-лöмаöсь на 130—150 сыв кузъта вискөн. Козлов Макар Эжва-сянныс вадйöдыс, тыдалö, и пырöма пыжнас да кайöма лунвыв-сянь кыпалысь джуджыд керöс вылöдзыс.

Выльлаö овмöдчöмыс, колö чайтны, йитчöма няньтöм вояс-кöд. А сэтшöм воясыс вöвлöма унаысь. Нянь абу воöма 1678 воын. 1686 вося гожöм шöрнас кöдзяссö чорыда жö кынтöма. 1690 воö кöдзыд тулысыс зэв кузя нюжалöма, а гожöмыс вö-лöма кос. 1695 воын гожöм шöрнас нянь бара жö кынмöма. Буракö, сэки Эжва горувса Зеленеч сиктысь и катöма пыжнас Павел Макар Козлов да овмöдчöма Пöддельнöйлы воча сулалысь нöрыс йылас.

1785 во. Макар-Керöс уна йöза нин. Сиктас волöмаöсь Вöлöг-даысь землемеръяс, лесникъяс, салдатъяс да офицеръяс. Аскöд-ныс вайöмаöсь астролябия да экер — некор на аддзывлытöм астрономо-геодезическöй приборъяс. Налöн локтигкежлö сиктас дасьтöмаöсь оланінъяс, пывсянъяс, вöвъяс, вуж додъяс, нöсил-каяс, пила-черъяс, зыръяс... Локтысьяс макар-керöссалы торйö-дöмны видз-му, пес да стрöйтчöм вылö вундалöмны вöр участок, пасъялöмны сиктдорса тыяс, нюръяс, ёльяс, сикт пöлөнтйыс ви-зувтысь Эжвалысь юкөн. Торйöдöминсö кытшалöмны стол-буйтöм прöсекъясөн, канаваысөн. Став уджсö, землемеръяслөн да лесникъяслөн индöд серти, вöчöмны макар-керöссаяс. Сикт-саяс нимсянь землемеръяскöд сёрнитöмны скод вылын бöрийöм добросовестнöйяс: Евстафий Паниюков, Педот да Петыр Нечаевъя-с. Тадзи Макар-Керöсын торйöдiсны шогмана муяс, видзъяс

дас вит десятинаон быд айлов вылө, и нөшта пес да стрөйба вылө вөр — ставсө морт вылө комын десятина гөгөр.

Му юклөм-торйөдөм бөрын сизим во мысти, 1793 воө, Макар-Керөсын олөмаось дас нель керкаын 59 ай да 57 эньюлов. Пөддельнойса Трөича вичколөн исповедальной ведомостьяс серти керкаясас көзяеванас вөлөмаось: Егор Петров Козлов, Еремей Емельянов Козлов, дөва Наталья Степановна Козлова, дөва Матрёна Иванова Козлова, Филипп Петров Нечаев, Василий Фёдоров Попов, Фёдор Иванов Панюков, Герасим Иванов Панюков, Евсей Потапов Чапурин, Филипп Иванов Семуков, Матвей Семёнов Микушев, Егор Миронов Микушев, Трофим Яковлев Королёв, дөва Дарья Антонова Королёва бобыль Мирон Иванов Савельевкөд. (НА РК, ф. 230, оп. 1, ед. хр. 388). Козловьяс, Поповьяс да Нечаевьяс овмөдчөмаось Нюр вылө, Панюковьяс — Джуджыд шор шуйгала нөрысас, шор мөдарас — Микушевьяс...

Сарлөн манифест серти макар-керөссаяс быд во сетөны рекрутө том зоньясөс. 1811 воын рекрутынөсь Епифан Семёнов Козлов, Яков Семёнов Чапурин, Антон Егоров Микушев. Ставныс найө усьөмаось 1812 вося война вылын. 1812 воө ополчениеө мунлөма и Архип Евстафьев Панюков. Гөтырыс, Дане Ирина, Пөддельнойса вичкоын висьтасигас-кайтчигас шуөма асьсө дөваон нин. Но 1815 воө Архип Евстафьев Панюков бөр воөма гор-тас. 1812 воын Макар-Керөсын 23 овмөс, 149 олысь.

1829—31 воясө — морөвөй поветрие (чума). Медым дугөдны висьөмсө, уналаын лэптөны часовняяс. Макар-Керөсө, Джуджыд шор нөрысө, 1831 воө кыпөдөны да вежөдөны Архистратиг Михаиллысь часовня. 1834 вося тулысө мунө көкъямысөд ревизия — вот мынтысьясөс гижалөм. Ревизскөй сказкасө Яренскө нуө Пөддельной вөлөсьтса старшина Архип Евстафьев Панюков (менама пра-пра-прадед — А.П.). Тайө воас Макар-Керөсын 185 олысь. 1842 воө, Вөлөгдасянь индөд серти, Макар-Керөсө Шөр-Керөсысь вуджөдөны священник Максим Сава Ветошкинөс.

Архангел Михаиллысь часовня лэптөмсянь макар-керөссаяс быд во сентябрь 6 лунө (өні сентябрь 19 лунө — А.П.) пасйөны Чудө лун. (Чудо Архистратига Михаила). И Чудө лун кежлө вөчөны самөкур. Сэкися законьяс серти самөкур вөчны эз позь. Самөкур вөчысьөс мыждылісны, самөкур вөчан дозмуксө мырддывлісны. Праздник водзвылас сиктас воливлісны Усть-Сы-солякска акцизно-откупной кантораын служитысьяс да вөлөсьтса начальникьяскөд ветлөдлісны керкаысь керкаө, шобсисны, корсисны самөкур да сійөс вөчан дозмук. 1856 вося сентябрь витөд лунө Макар-Керөсө да Шөр-Керөсө шобсьыны воисны акцизно-откупной кантораысь корчемной поверенной-комиссионер Павел Самарин да сәні жө служитысь Тикөн Михайлов. Первой шобсисны Шөр-Керөсын. Но макар-керөссаяс шобсьыны эз лэдзны. Павел Самаринөс паныдалісны Архангел Михаил часовня дорын да нөйтісны. А кор Самарин дзебсис Öреп Вась Козловлөн гөбөчө, кыскисны юрсиөдыс да бара на нөйтісны. Самаринлы коммис пышйыны Пөддельнойө и сәсянь ыстыны нора-сьөм Кулөмдіно станөвөй Румянцевлы. Следствие дырйиыс (нуөдіс земскөй суд) макар-керөссаяс ставсө соссисны, көть Ен öбраз водзын Пөддельнойса вичкоын окалісны крест да көсйысисны висьтавны ставсө кызди вөлі. (НА РК, ф. 99).

1902 вося сентябрын Козлов Ёньо Гурейлөн керкаын воссьо ёти класса начальнõй народнõй училище. Земство училищесõ восьтны сетõма 636 шайт, сы лыдын велõдысьлы удждон вылõ 300 и сылы жõ патера медавны 36 шайт. Медводдза велõдысьнас вõлõма Мария Андреевна Колмакова. Велõдчыны пырõмны 24 зонка да сизим нывка. 1904 воõ училище бердас воссьõма библиотека. 1905—1906 воясõ велõдõ училищеас Мария Нагих. Но 1906 вося апрель ётиõд лунõ сийõс удж вывсьыс мездõны, оз пõ туй велõднысõ да. Сэсся велõдõ Антонина Кремская. Велõдигас сийõ петõ верõс сайõ, и инспектор М.П.Успасский вõтлõ сийõс удж вывсьыс «как не соответствующую занимаемой должности из-за выхода замуж». (НА РК, ф. 180). Водзõ велõдõ Валентина Александровна Суханова.

1907 воõ макар-керõссяс — 36 лов — лыддьõмаõсь 180 книга. 1906—1909 воясõ училищеыслы лэптõны керка. Сәни куим ыджыд класснõй комната, учительлы оланін. (Меным удайтчыліс жõ велõдчыны тайõ школаас — А.П.). 1910 восянь велõдõны нель во. Тайõ жõ стрõйбаас велõдчылõма и менам батъ Александр Андреевич Панюков. Сийõ казътыліс:

«Валентина Суханова, Пõддельнõйса больничайсь пельшер Иван Александровичлõн чойыс да Иван Александровичлõн гõтырыс, Нõвикса училищеын велõдысь Агния Андреевна Суханова (Данъщикова) вõліны эсер партияса членъясõн, тшõкыда сывывлїсны революционнõй сыланкывъяс, видїсны сарõс, кулакъясõс».

1912 вося тулысыс зэв ыджыд ытваа. Эжва вожõдõ визувтан выль туй, кутїс визувтны веськыда, дїсõ, кõнї сулалїсны Навõлõк да Быкты сиктъяс, поткõдїс шõри, кежис Макар-Керõс да Пõддельнõй дорысь.

Тайõ жõ воас Макар-Керõсын панõны вичко.

«1912 вося тулысõ ме помалї куим класс. Батъõ шуõ, тэ пõ, пиõ, дугды велõдчынытõ. Каям Эжва йылõ, вичко лэптыны чукõртам сьõм. Кайим Керчомъяõдз, кежалїм Донõ, Жежимõ. Ёктысим Кулõмдїнын, Дереваннõйын, Ручын, Аныбын, Пõддельнõйын, Вомынын. Став чукõртõм сьõмсõ сетїм Матвей Як Микушевлы, вичко стрõитан комиссияса членлы (казначейлы — А.П.). Сэсся локтїсны каменщикъяс. Вичко подулас дас кык весът судта, метр пасьта кодїõминõ суйисны из, киськалісны ёль дорын ыджыд пõртъясын кусõдõм извесътõн, кытчõ клей пыдди, крепыд вылõ, тшõтш жуглісны чипан колькъяс».

1785 воõ сиктсалы торїõдлõм муяс йõз лыд содõм вõсна эз нин вермыны вердны няньõн. 1912 во кежлõ быд олысь вылõ шогмана муыс кольлõма 400—600 сыв мында. Уна дас во корõм-дзайгõм бõрын 1912 вося апрель 13 лунõ сар Николай Второй вынсьõдїс «Устьсысольскõй, Яренскõй, Сольвычегодскõй уездъясын содтõд му юклõм-шõрыштõм йылысь» индõд. Но сõмын 1914 воõ Макар-Керõсõ воисны му мерайтысьяс: кулõмдїнса земскõй начальник А.Михайлов, землемер Протопопов, сылы отсасьысьяс Батиев да Смирнов. Му торїõдõмыс мунїс сїдзи жõ, кыдзи и 1785 воõ. Макар-керõссалы вõлі торїõдõма-шõрыштõма видз-му уджавны шогмана муяссõ 3230,56 десятина — быд лов вылõ 11,96 десятина мындаõн. Пес да стрõйтчõм вылõ вõр, нюраинъяс, Дзоля вад, Кузь вад, Борган, Шõрõсдїн тыяс, Важ

Эжвалысь юкөн — 3369,18 десятина мында. И став муыс-вид-дзыс да вöрыс быд лов вылö лоис 24 гөгөр десятинаөн (десятинаын 1,09 гектар).

Макар-Керöс 1917—1929 воясö

*Уджалысь йöзлөн гөрö знамя öзйö;
Важ олöм пуккыльтчö, пөрö,
Лёк олöм вежсьö.*

В.Савин, 1920 во.

Совет власът пуксьöм йылысь юöрыс воö телеграф пыр Пöддельнöйö, а сэсянь нин и Макар-Керöсö. 1918 во. Мөдöд кöдзаын нин нянь оз во. Войтыр тшыгъялöны, висьöны, кулöны. Гöль-яслөн комитетъяс (комбедъяс) корсьöны няньсö озыра олысь-яслысь. Пöддельнöйса волисполком макар-керöсса озыръяслы тшöктö мынтыны 150 шайтөн. Перйöны контрибуция Яков Матвеевич Микушевлысь, Андрей Фёдорович Панюковлысь (менапöль — А.П.), Степан Козловлысь, Роман Королёвлысь, Феофан Александрович Панюковлысь.

Пансьö гражданскöй война. Пöддельнöй да Макар-Керöс пыр кайöны Эжва йылö, а сэся Изьва да Печора пöлөнса сиктъясö красноармейскöй отрядъяс. Пöддельнöйса телеграф пыр воöны и воöны Устьсысольск уездса военнöй комиссариатысь индöдъяс:

«29 декабря 1918 года. Подъельскому волисполкому. Испеките пять пудов хлеба, подготовьте полтора пуда мяса для роты в 200 человек, следующего на Печору к Мандельбауму. За мясо будут уплачены деньги, командир роты возвратит муку за испеченный хлеб. Приготовьте один пуд картошки для борща и фураж для ротного обоза. Стрелков разместите по квартирам. О прибытии роты сообщите по телеграфу. Уездвоенком Юркин, военрук Петров» (НА РК, ф. Р-62).

Сиктъясö локтöны и пленын вöлöмаяс. Макар-Керöсö германечьяслөн пленысь воöны Михей Фёдорович Королёв, Öсип Ларионович Королёв, Дмитрий Феоктистович Климов.

1919 во. Январь 11 лун. Макар-Керöсса первой ступеня школаö чукöртчöмаöсь макар-керöссаяс, шöр-керöссаяс, эжолсаяс, лаборомсаяс, кармыльксаяс, илля-эжъессаяс. Найö кывкöрталöны:

«Торйöдчыны Пöддельнöйысь. Макар-Керöсын котыртны сиктсöвет. Сиктсöветса юралысьнас индыны Андрей Гурьевич Козловöс, секретарнас — Лаборомысь Алексей Илларионович Моторинöс».

Февраль 20 лунö Андрей Козловлы отсöг вылö, сийöс вежысь-öн, собрание бöрйö Степан Архипович Панюковöс. Сэк кeжлö буретш воöма Устьсысольск уездса велöдчан юкöнысь индöд, медым сиктсöветыс петас школасыс мöдлаö. Собрание кывкöрталö:

«Сиктсöветыс и водзö лоас школалөн класснöй комнатаын. Школаыслы нöшта эм кык ыджыд комната, пусянiн, и зэв ыджыд калидор» (НА РК, ф. 62, оп. 1, ед. хр. 18).

1919 вося март 9 лунö Пöддельнöйö чукöртчöмаöсь 180 морт.

На лыдын и макар-керёссаяс: Ефим Архипович, Афанасий Андреевич, Андрей Фёдорович, Яков Фёдорович, Герасим Фёдорович Панюковъяс, Феофан Тимофеевич Микушев, Емельян Петрович Попов. Чукёртчöмаяс корöны мездыны Усть-Сысольска уездной тюрьмаыс Пöддельнойса Трöича вичкоыс вежа ай Александр Николаевич Шумковöс, кодöс арестуйтöма Усть-Сысольска ЧК (председательыс Виктор Савин). Арестуйтöма сыыс, мый Шумков сулалö Совет власьтлы паныд, паськодö татшöм сёрнисö и вичкоö волысыс пöвстын. Йöзлыс корöмсö оз могмöдны, Шумковлыс керкасö и эмбурсö мырддьöны.

Март 16 лунö Макар-Керöсса школаö чукёртчöмаöсь кыксё морт. Öтувъя кывкёртöдөн найö нöшта öтчид корöны уездса начальствоöс, медым Макар-Керöс сиктсöвет улö пырыс грездъяссö да сиктъяссö мездасны Пöддельной вöлöсьт улыс. А.Г.Козлов пыдди бöрийöны сиктсöветөн юралысынас Николай Романович Козловöс. Сиктсöветын юралöмыс А.Г.Козловлы мынтылöмны 885 шайт 66 ур, Н.Р.Козловлы — 616 шайт 17 ур.

Май 5 лунсян сиктсöветнас сэсся веськöдлö Ефим Фёдорович Климов.

Нянъ абутöм вöсна торйөн сьöкыд 1919 воö. Тшыгъялöны и челядь. Школаыс тупкыссян выйын. Уездса велöдан юкөнсян воö индöд: 8—13 арöса ныв-зонмöс ыстыны Украина му вылö челядьлөн колонияö. Макар-Керöсса школаөн веськöдлыс В.А.Суханова юöртö УОНО-ö, мый Макар-Керöсыс колонияö кöсийöны мунны кызь öти нывка да зонка. На пиын: Степан Микушев (13 арöса), Агния Микушева (12), Мария Микушева (12). Евдокия Козлова (12), Татьяна Панюкова (12), Ульяния Панюкова (9), Николай Попов (8), Лидия Нечаева (9), Лариса Ветошкина (11). Шöр-Керöсыс кöсийöны мунны дас öкмысөн. Украина му вылö найöс нуны индöмаöсь Ларион Васильевич Ветошкинöс. Туяс петны шуöмаöсь 1919 вося май 25 лунö.

Макар-Керöсса сиктсöветö бара на воöма уездса велöдан юкөн-ыс (УОНО-ыс) корöм (кырымалöма Иона Чисталёв), медым сиктсöветыс петас школалөн жырсьыс мöд керкаö. И 1919 вося апрель 2 лунö сиктсöветса собрание вылö чукёртчöмаяс шуöны петны Пётр Андреевич Поповлөн школаыскöд орччөн сулалыс керкаö.

Воис нин тулыс, а муяс вылö кöдзны кöйдысыс абу. Сиктсöвет апрель 22 лунö ыстö Усть-Сысольскö Егор Романович Козловöс корсьны кöйдыс. Вöвъяс медавны сетöны 80 шайт и быд лун кежлö кызь шайтөн.

Сьöкыд кадö Макар-Керöсса сиктсöвет 1919 вося июнь 22 лунö пыртö чорыд индöдъяс: «Штрапуйтны 50—100 шайтөн найöс, кодъяс нетшкасны сёркни, а гусясысыслы кö дас квайт арöсыс абу на, кыскыны кывкутöмö ай-мамсö».

Август 10 лунö Макар-Керöсын мунö собрание. Чукёртчысыс кывкёрталöны: «Сизим час рытссян квайт час асылöдз, быд вой, вит мортлы кытшлавны сиктса муяс гөгөр. Кутасны кö гусясысысöс, колö нуöдны милиционер дырйи дознание да мыждыны военной кадся законъяс серти».

1919 вося август 25 лунö П.А.Попов ассьыс керкасö сетö школа улö. Сиктсöветыс сэки жö петö Николай Самойлович Панюковлөн керкаö. Школаас сэки ветлисны 76 нывка да зонка. Велöдисны найöс В.Суханова да В.Югов.

1920 воӧ нуӧдӧны видз-му гижалӧм. Макар-Керӧсын сӧк вӧ-
ли 96 овмӧс, 427 олысь. 1922 воӧ Виль экономическӧй поли-
тика (НЭП) пыртӧмкӧд йитӧдын ВЦИК да Народнӧй Комис-
саръяслӧн Сӧвет сетӧны кокнӧдӧмъяс налы, кодъяс овмӧдчас-
ны виль муяс вылӧ. Тайӧ индӧд вылас мыджсьӧмӧн макар-ке-
рӧссаяс, лаборомсаяс, эжолсаяс овмӧдчӧны Лӧкчим юӧ усьысь
Певк ю бокӧ. Овмӧдчысьяс лыдас: Макар-Керӧсысь Афанасий
Фёдорович да Александр Андреевич Панюковъяс, Эжолысь Сте-
пан Прокопьевич Панюков. Макар-Керӧссянь куим верст сайӧ,
Эжтӧсӧ каян туйвежӧ, овмӧдчӧны Макар-Керӧсысь Иван Ёгор
Нечаев, Пеклис Митрей Климов. Пеклис Митрей пленас олигӧн
велавлӧма дорччыны да выльлаӧ вуджӧм бӧрын лӧсьӧдӧ куз-
неча, сир да дьӧгӧдъ вийӧдан пач. Иван Ёгор босътчӧ примитны
йӧзлысь тшак-вотӧс, зверь-пӧтка.

НЭП пыртан воас жӧ Макар-Керӧсса вичкосӧ вежӧдӧны Воз-
несение Христова нимӧн. 1923 восянь вичкоыс уджалӧ. Медвод-
дзаяс лыдын танӧ пыртӧны Ӧньӧ Тима Петырӧс, Педӧр Ӧньӧ
Ӧльӧксан Татьянаӧс. Танӧ жӧ венеч улӧ сувтӧны менам бать,
Александр Андреевич Панюков (21 арӧса), да Шӧр-Керӧсысь Пет-
ров Як Наста — Анастасия Яковлевна Ветошкина. Медводдза
вежа айнас вичкоас вӧлӧма Ардальӧн Евлампиевич Попов. Овлӧ-
ма Макар-Керӧсын жӧ, сылы вылӧ лӧптӧм керкаын.

1926 воӧ нуӧдӧны виль гижалӧм. Макар-Керӧсын сӧки вӧлӧ-
ма 443 олысь, на пиысь 81 морт Из дорса заводъяслы кералӧны
пес.

1927 вося июль 3 лунӧ Макар-Керӧсса сиктсӧветлӧн уджӧн
тӧдмасьӧ Кулӧмдӧн уездса исполкомысь инструктор Елфимов.
Актас сийӧ пасйӧ:

«Сиктсӧвет улас пырӧны Макар-Керӧс, Шӧр-Керӧс, Лабором
да Эжол сиктъяс, Кармыльк, Илля Эжтӧс, Певк пӧчинокъяс.
Ставас — 274 овмӧс, 1360 лов. Муясыс оз могмӧдны тырвыйӧ
няньӧн, и зӧв унаӧн корсьӧны нажӧткасӧ Из дорса заводъясын.
Ид кӧдзаяс кынмӧмаӧсь тувсовъя пужъясысь, мӧсьяс поснъйдӧсь,
лысьтӧны этшаник. Эм сир пач, нӧль мельнича. Эм сельпо, ӧтув-
тӧ 266 шленӧс. Лавкаясӧ оз тырмымӧн вайны сов, сакар, пызь,
карасин, кӧрта кӧлуй. Донъясыс, ӧти килограммысь, уръясӧн:
рудзӧг пызь — 12, кӧнтусь вый — 19,5, сов — 6,5, сакар — 77,
кӧрт тув — 36, майтӧг — 57,5, ситеч метр — 37, стеклӧ лист —
74, 50 грамм табак — 7 ур... Эм кредитнӧй тӧварищество.
Йӧзыслы скӧт, видз-му уджаланторъяс ньӧбны сетӧма ссуда —
13157 шайт.

Сиктсӧвет бердас 1926 восянь уджалӧ загс. 1926 воӧ чужӧма
87 кага, на лыдын 46 детинка, кулӧма 31 морт, на лыдысь кызь
кыкыс айловъяс. Войтыр вӧчӧны Лаборомсянь Шойнатӧй туй
(помалӧмны 1927 воӧ). Сиктас милиционер абу, эм сизим морта
дружина. Висьысьяс бурдӧдчӧны Пӧддельнӧйса больничаян.
Врачыс, Кулик, сӧрнитӧ собраниеяс вылын, висьталӧ вина
юӧмысь, куритчӧмысь лӧклун йылысь».

Сиктсӧветса юралысьнас тайӧ кадас вӧлӧма Ефим Федосеевич
Ветошкин, секретарнас — Фёдор Герасимович Панюков.

Мунӧны вояс. Вежсьӧ олӧм. 1929 воӧ НЭП бырӧдӧма. Январь
14 лунсянь котыртӧма Северный край, кытчӧ пырис и Коми
обласът. Обласътсӧ юкӧма ӧкмыс район вылӧ. Макар-Керӧсса

сиктсöвет пырö Шойнаты район улö. Шойнаты район панöма уджсö 1929 вося июль 20 лунсянь. Председательнас бöрйöмаöсь Илья Дмитриевич Каракчиевöс. Котыртчö выль сиктсöвет. Керöсса сиктсöвет лои нельöд разряда Сöветөн. Сиктсöвет улас олö 1500 морт. Председательлөн удждоныс 50 шайтөн тöлысь. Вöлисти Макар-Керös и мукöд сиктыс мездмисны Пöддельнöй улысь. Сиктсöветыс Николай Самойлович Панюковлөн керкаын. Тайö жö воас сэтчö сувтöдöны телефон. Председательнас вöлöма Григорий Григорьевич Ветошкин (Сава Гриша Гриша).

Тайö воас Макар-Керöсын 112 овмös, на лыдысь кыкын — озыра олысьяс, 46 — шöркöдя олысьяс, 64 гöль овмös. Керöсса сиктсöвет улö некыдзи оз кöсйыны пырны эжолсаяс. Ми пö пырам Пöддельнöй сиктсöвет улö. Керöссаяс пö мянлы вичмöдасны медся омöль видзьяссö. И аныбсаяс пö керöсса кодьöсь жö. Эжолын помся мунöны собраниеяс. И быд собрание вылын öт-сöгласөн кöсйöны мездьсыны Керös улысь. Но вылысянь индöд серти эжолсалы бытöн ковмöма пырны Керöсса сиктсöвет улö.

Макар-Керös колхозьяс кадö

*Колхоз войтыр котыртчис,
Вундö зарни сю.*

В.Савин, 1930 во.

Вылiсянь индöдөн 1929 восянь сиктса олысьяслы тшöктöмны öтувтчыны колхозьясö. Макар-Керöсын öтувья овмöсыс котыртчö 1930 вося апрель дасöд лунö. Овмössö нимтöны «Гöрд Керös» колхозөн. Медводдза веськöдлысьнас вöлöма Никита Андреевич Панюков. Медводдза колхозникьясөн — Д.Ф.Климов, Д.Козлов, Т.Я.Микушев. Колхозö пырысьяс öтувья овмösö нуöмаöсь вöv, мös, ыжъяс, гөр-агас, телега, пу додь, а сiдзжö мынтöмаöсь пырöм вылö вступительнöй взнос. Со мыйта взнос мынтöмаöсь 1931 вося январь 25 лунся шуöм серти: «7 шайт 50 ур — Н.А.Панюков, 10 шайт — С.А.Козлов, 15 шайт — М.П.Климова, 20 шайт — В.Я.Панюков, 25 шайтөн — Д.К.Козлов, П.И.Панюков, С.А.Панюков» (НА РК, ф. 1043).

1931 вося январь 1 лун кежлö «Гöрд Керös» овмöсын лыдыссис 128 морт, 31 овмös, 22,4 гектар гöран му, 123 гектар видз, кык ытшкан, öти кöдзан машинаяс, 18 вöv, 14 ыж, 34 мös да кукань. Öткымынөн колхозникьяс пиысь вежлалöны ассьыныс овъяссö-нимъяссö. Пансьöма татшöм вежлалöмыс Народнöй Комисарьяс Сöветлөн 601 нумера постановлениесянь, мый вöли йöзöдöма 1924 вося август 25 лунö 61 нумера индöдьяс сборникын.

Педöр Тима Панюковлөн Микей пиыс лоис Ленөн, мöд пиыс, Пиля, — Гусөн, а Артип Епим Панюковлөн пиыс, Порфирий, лоис Ген Юрийөн. Раиса Дмитриевна Козлова лои Дина Дмитриевна Донцоваөн. Ов-нимсö вежысьяс мынтылöма сиктсöветö вит шайт, сэнi гижлöмаöсь акт да сетлöмаöсь справка. Ов-ним вежысьяс йывсьяс юöрсö йöзöдлiсны газетьясын и медбöрын вынсьöдлiс ВЦИК.

«Гöрд Керös» овмöслөн медводдза статотчётас пасйöма, мый

овмөсыс промыслово-животноводческөй. Прөмыселтяс пиын вөлөма: вөр лэдзөм, вөр кыскөм, пурйөн да молльөн юяс кузя кер кылөдөм, дьөгөдь-сир вөчөм, чери кыйөм, дорччөм, гез кыөм, сийөс-завод вөчөм, тшак-вотөс чукөртөм. Став пөвстас медводзын, дерт, вөлөма вөр лэдзөм-кылөдөм. 1932 вося тулыс-гожөмө вөр-сө кылөдөмаөсь кык бригада: Александр Андреевич Панюковлөн көкъямыс морта бригадаыс — Эжъес ю кузя, Василий Максимович Козловлөн өкмыс морта бригадаыс — Чов ю кузя.

И со «Гөрд Керөс» колхоз котыртөмсянь коли вит да джын во. 1935 воө став пөлөс уджсө вөчөма 30129 трудодень дон. Овмөсас вөлөма 124,8 га гөран му, 671 га видз, куим — вөлөн вартан, кык — көдзан, куим — куртан, өти — вундан машина-яс, 60 гөр, өти культиватор. Видзлөмаөсь 58 мөс, 88 вөв, 47 ыж. Государстволы сдایتөма 24 юр лыд скөт, вузалөма 279,3 центнер йөв. Став животноводческөй продукциясө вөчөма 13462 шайт дон. Овмөслы доходсө вайөмаөсь мельничаяс, сир пачьяс, кирпич вөчөм, вөр лэдзөм-кылөдөм, вый вөчөм, мазі видзөм, ма вузалөм...

Тайө воас волөма бур урожай, чукөртөмаөсь уна турун. Во помын быд трудодень-уджлун вылө юкөмаөсь: нянь — 3,373 килограммөн, картопель — 6 килограммөн, град выв пуктас — 0,550 килограммөн, турун — 5,530 килограммөн, идзас — 2,510 килограммөн, вый — 3 граммөн. Емель Петыр Поповлөн семьяыс 674 уджлун вылө босьтөма (килограммъясөн): рудзөг — 1175, ид — 1433, зөр — 154, картопель — 3445, турун — 2871, идзас — 2324. Содтөд нөшта — вый да сьөм. Колхозникъясөс вердөмаөсь колхознөй столөвөйын, петкөдлывлөмаөсь кинофильмъяс, колхознөй яслиын видзөмаөсь комын челядьөс. Колхоз тшөт весьтө видзөмаөсь вермытөмъясөс, пөрысъясөс.

Комынөд воясө унатор первойыс, медводдзаыс вөлі. Макар-Керөсын «чужисны» медводдза ударникъяс. 1935 вося февральө колхозник-ударникъяслөн съезд вылө ветліс «Гөрд Керөс» колхозыс Иван Андреевич Панюков. 1937 воө Шойнаты МТС-сянь воисны медводдза тракторъяс. «ХТЗ-7» көлеснөй трактор руль сайын пукалісны Макар-Керөсыс Микита Павел Микушев, Петыр Наста Климова.

1939 воө Макар-Керөсын медводдзаыс петкөдлісны звукөвөй кино. Со кызди та йылыс казътивліс Павел Як Епим Сергей Панюков, коді 1939 воө помавлөма Горький карын киномеханикъяслыс курсъяс.

«Киносө сэки петкөдлім «Гөрд Керөс» колхозса правлениеын. Макар-Керөсын өшөдім объявление: кутам петкөдлыны «Мы из Кронштадта» кино. Гижим ыджыд шыпасъясөн: «Звукөвөй». Луннас верстьөяс ставныс мунөмаөсь му-видзъяс вылө. Унджык челядьыс сэнөсь жө либө вөрын тшак-вотөс чукөртөны. Шуим луннас киносө ас кежыс, йөзтөг видлыны экран вылын. И со моторист Илля Ольбөксан Попов (Вомыныс) заведитіс моторсө. Ме пысалі лентасө аппаратө. Сэк кості правлениелөн жырйө казавтөг локтөмаөсь гортаныс кольөм посныд войтыр. Лички «пуск» вылө. Ловзис экран, сыкөд тшөтш юрөбтіс матрослөн гораа горөдөм. И лои виччысьтөмтор: пукалысъяс — коді өдзөс пыр, коді өшинь пыр — повзьөмысла пышйисны. Здук мысти жырйын некод эз коль. Удж вылыс локтөм бать-мам гортсы-

ныс эз аддзыны быдтасъяссё. Ковмис миянлы на водзын кывкутны да отсавны корсьны ичот ныв-писё. Вёлөмкё, повзьём челядь дзебсьёмаось турун зорөдъясё, сарайясё, пывсянъясё, гөбөчъясё да весиг матысса вөрө. Сөмын вой шөрланьыс нин ми петкөдлім кинофильмсё. «Гөрд Керөс» правлениелөн жырйыс вөлі дзик тыр, некытчö сувтны».

Но зумыда кок йыв сувтысь сиктлысь олөмсö гудыртіс война: 300 гөгөр бать, верөс, пи мунісны дорйыны Рөдина. 188-ыс на пиысь бөрсö эз нин волены. Öнi на йылысь казтылö сикт шөрö сувтөдөм памятник-обелиск.

Фронт вылö мунөмаясöс вежисны нывбабаяс, челядь. Став сьöкыд уджыс водіс налөн нэриник пельпомъяс вылö. Трактор руль сайö пуксисны Анна Алексеевна Микушева, Анна Андреевна Ветошкина...

Нывбабаяс жö кутчысьёмаось и гөр воропö:

— Вöлыд мудзöма, ачыд сэтшöм жö. Вöвтö вежан да ачыд водзö гөран. Лунтырнад гектарөдз му бергөдан,— казтывліс менам мам Анастасия Яковлевна Панюкова.

И со нин пасьвартöма врагöс! Ме бура помнита 1945 вося Победа лунсö. Кумач гөрд флагъяс шпорөдчöны сиктсöвет, нардом, колхоз правление вевтъяс вылын. «Гөрд Керөс» правление тырöма йөзөн. Кылö гудөкөн мыла ворсöм. Войтыр сьылöны-йөктöны. Унаөн бөрдöны усьöм верөс, пьян, батыяс вöсна. Унаөн эскöны, мый верөсьясыс воасны. Пызанъяс вылын бура ловзьём рудзөг нянь тупөсьяс, яя шыд тыра тасьтіяс. Öтисянь мөдö вуджö быгъя сура ыджыд яндöва. Первойысь пөттөдз сөйи рудзөг няньөн чөскыд яя шыд.

Колис мыйтакö кад, и кутісны воавны фронтовикъяс. 1945 вося июлын воис и менам бать Александр Андреевич Панюков. Кузь сьöкыд война туйясöд, Карелиясянь Эльба дорөдз косьяс пыр мунöмыс пöрысьмөдöма Ерем Öстап Артип Вась Педөр Öньö Öльөксан Панюковöс. Бать, төдчö, неуна чотыштö: вөссьöма фронтвывса ранаыс. А мамö, Анастасия Яковлевна Панюкова — Петров Як Наста, — томмыштöма, чужöм вылас ворсö нюм. Пызан вылö вайö став эмсö, медчөскыдсö. Бать локтан рытас жö миян керканым тырис йөзөн. Локтысьяс юасисны, кыдзи Педөр Öньö Öльөксан воуйтіс, эз-ö аддзыв кодөскö ас сиктысь. Лов шынымöс кутөмөн кывзім Берлин штурмуйтöм йылысь висьтасьöм, Эльба ю вылын американецъяскөд паныдасьöмсö.

Боевöй наградаясөн жö воисны Кирö Митрей Никöнор Козлов, Александр Егорьевич Козлов, Сергей Епимович Панюков. Фронтовикъяс пыр жö кутчысисны уджö: лэптисны-стрөитисны скöt картаяс, лэбувъяс, гумлаяс, конюшняяс, дзоньталісны олан керкаяс, паськөдісны-вөчисны выль муяс да видзьяс. Сэки медся ёна төждысисны му вöсна. Бура помнита, Эжъес юбокса видз вылын зорөд дорö кыскалам турун юръяс. Зорөд чөвтысь Емель Гриша Попов зорөд пинь ёсьтігөн чернас бергөдіс му эжасö. Таясь ёна и дивитісны сэнi турун куртысьяс.

Сэки жö эз вөв став олөмыс пыльыд. Колхозникъяслысь, кыдзи и водзын, перйисны быдсяма вотъяс. Эз кө вермыны мынтыны, гортөдзыс волісны налогөвöй агентъяс да вөчлісны керкаö кольöм эмбурлысь опись. Помнита, миян Көджыв грездысь гижалисны Пома Елисалысь эмбурсö. А сылөн гортас, ас вөчөм ла-

бич, пызан да гоз-мөд сьод чугунысь кындзи, нинөм эз вөв. Помнита, көть порсьясөс эз видзны, ковмыліс сдайтны порсь кучик джын, а йөв поставка пыдди — мөс вый. Ньоблісны лавкаысь да нулісны йөв заводö. Сиктса клубын тшөкыда мунліс суд. Судитісны 1932 вося август сизимөд лунся закон серти колхоз му вылысь шеп өктөмысь, видз вылысь вайөм мездор турунысь... Судитлісны чорыда, дыр кезлө пуксьөдлісны лагерö.

Но йөз олісны, уджалісны. Некодлы эз сетчыв уджын том ныв Павел Татьян — Татьяна Павловна Панюкова. Нималіс Пеклис Митрей Климов — колхозса дорччысь. Сійö сяммыліс дзоньтавны быд пөлөс машина. Но регыд Климовөс суис ыджыд неминуча. Миян керкасянь сыв нельсө сайын сулалісны рынышъяс, гумла, көні вөлөн бергөдлан машинаөн вартісны нянь. Вөлі лун шөр бөр. Ми, зонкаяс, пукалім кильчö вылын, и друг гумла дорсьыс кылім зэв гораа ойзөм-горзөм. Ми котөртім сэтчö и аддзим сьөлөм нюкыртысь шуштөм серпас. Вартан машинасянь матын куйліс вирөн тырөм дорччысь Пеклис Митрей Климов.

А лоöма со мый: пажын бөрас жугалöма вартан машиналөн приводыс. Вöчнысö локтöма Пеклис Митрей Климов. Вöчөм бөрас сійö тшөктöма вөтлыны вөвъяссö, ачыс кольччöма дышлөясөн бергөдлан ыджыд шестерня вылас видзөдлыны, кызди кутас уджавны приводыс. Ямщикъяс вөтлөны вөвъяссö. Öддзöны и шестерняяс. Абу төдлöма Пеклис Митрей, кызди шестерня пиньяс костас веськалас гач кокыс. Регыдөн сэтчö кыскöма и асьсö. Пеклис Митрей гораа ойөстöма, тырöма вирөн. Отсавны корисны пельшер Даша Латкинаөс. (Öні на олö Пöддельнойын — А.П.). Но ранаыс вывті ыджыд. Корисны самолёт, но сійö пуксьынысö эз вермы. Пуксис Эжва сайö, Нөвик сиктса лыа вылö. Доймөм мортөс лэччөдісны пу доддьөн. Пеклис Митрейлы вöчисны операция, но колис инвалидөн.

1947 воö вежсис деньга. 1948 воö бырөдісны нянь вылö карточкаяс. Лавкаын няньсö сетлісны öти килограммөн, но зэв уналы эз тырмыв. Унаөн нопъясьлісны да лэччылісны Сыктывкарö вöльнöй няньла. Война кадö изгармөм муяс сетісны ичөтик урожайяс. Куйөдөн вөлі тырөмаөсь скөт картаяс. Куйөдсö петкөдны эз тырмыны вөвъяс и йөз. Тшыгъяліс скөт. Скотомогильникö, коді вөлі Көджыв грездянь верст джын сайын, быд лун нуисны гуавны кулөм мөс-вөвъясөс. «Гөрд Керөс» колхозлөн муяс вылын картофель мудйылісны-небзьөдлісны коканъясөн. На лыдын гырысьяскөд уджавлім и ми, челядь. Ассьыныс град йөрнысö йөз гөрисны гезйö домасьомөн-доддясөмөн. Квайт-сизим нывбаба, челядь гезьясөн домасьомаөсь гөр юр крукö да кыскöны визь бөрся визь: талун öтилысь, аски рытпом мөдлысь градсö гөрасны... Колхозъяс и колхозникъяс вöйисны уджйөзö. Менам чой-вок гожөмбыд пуктісны турун Эжъес ю пөлөнын, а бөрсö локлісны нинөм нажөвиттөг: ставсö сөйөм вылö бергөдöмабсь. Уналы көвъясьліс висьөм, пельпомъяс вылас и мукөдлаө петлісны мыльяс. Сьökыд олөм, сьökыд удж вөтліс йөзсö корсьны нажөтка. Но сиктысь некытчö мунны эз лэдзлыны. Медым мунны кытчөкö бокö, коліс пашпорт. Но пашпортсö колхозникъяслы эз сетлыны. Ми, школаын велөдчысьяс, ветлім школаö дөмаса көм-паськөмөн и пыр тшыгөсь.

Школаын велөдчигөн, 1949 вося декабрын, гижлывлім Сталинлы письмөяс. Вождылы сэки тырис сизимдас арөс. Ыджыд перемена бёрын быд классөс пуксьөдісны гижны письмө. Ми гижим Иосиф Виссарионовичлы, мый олам да велөдчам бура, миян ставыс эм: и сёян-юан, и паськөм, и школаным, и сикт-ным бурсыс-бур! Ставсыс пөся аттьоалім Сталин ёртөс. Мудрөй учительлы, вождылы, генералиссимуслы сиим күзь нэм да бур шуд. Гижөм письмөнымөс лыддылім общөй школьной линейка вылын, и школаса директор (сэки вөлі А.А.Изъюрова — А.П.) чукөртліс өтлаө да нуліс пошта вылө. Лыддым письмөнымөс линейка вылын, асьным дзик тшыгөсь, өдва сулалам. Ог төд, лыддывліс-ө письмөяснымөс Иосиф Виссарионович, но гижлім сёлөмсянь, да и мөд ног мөвпавнысө эг лысьтлөй.

1950 воё Макар-Керөсса «Гөрд Керөс», Лаборомса «Том вын» да Шөр-Керөсса «Веж луг» колхозъяс өтүвтчисны Сталин нима колхозө. Пыралісны сэтчө и эжолсаяс, но регыд бөр петісны. Асланыс лоис Чапаев нима колхоз. Сталин нима колхозон веськөд-лысьнас индісны Никонор Дмитриевич Панюковөс.

1953 вося март 5 лунө муніс олөмсьыс И.В.Сталин. Куим лун чөж Макар-Керөсын өшалісны траура флагъяс, куим лун чөж йөз шогсисны. Ми весиг бөрдім. И регыд мысти олөм кутіс веж-сьыны: чинтісны налогъяс, бырөдісны поставкаяс. Макар-керөсса муяс вылө воис кукуруза. Медводдза воас сійө быдмис зэв бура: гожөмыс вөлі бур, шоньд. Гыма-чарда кымөръяс вай-лісны шоньд зэръяс. Кукуруза быдмис-туис бура. Быд гектар сетіс сюрсыс унджык центнер веж масса. Мөд онас кукурузасө көдзисны ёна унджык. Но гожөмыс вөлі ыркыд. И урожай-ыс эз во. Лоис сөмын ыджыд воштөм. Неуна дорйис сійө, мый 1957 восянь колхозъясөс мездісны турун поставкаыс. 1958 воё бырөдісны и Шойнатыса МТС. Сы местаө лои ремонтно-технической станция. МТС-лыс техникасө вузалісны колхозъяслы. 1960 вося апрель кежлө Чапаев да Сталин нима колхозъяслөн вөлі куим сюрс гөгөр гектар видз, витсө гөгөр гектар гөран му. Колхозса медбөръя председателынас вөлі вөвлөм танкист Арсень Иван Попов, Макар-Керөсса Нюрыв грездын олыс.

Макар-Керөс бөръя воясө

1960 вося апрель 1 лунсянь Керөсса колхозъяс пыдди лои «Сторожевской» совхозлөн Керөсса юкөн. Вөвлөм колхозникъяс лоины совхозса уджалысьясөн. Трудодень пыдди мөдісны мынтысьны сёмөн. Но медводдза воясас йөзыс кутчысисны на аспом му бердө, видзисны гортса скөт. 1962 восянь ме заводиті велөдны история да география восьмилетнөй школаын. Школаыс сулаліс Макар-Керөсын, ёль нөрысас. Кык судта ыджыд школа кыпөдлісны 1956—1959 воясө, а велөдчыны сэтчө челядз вуджисны 1960 воё. 1964 восянь, а сэки Макар-Керөс пырис Кулөмдін районө, ме веськөдлі школа уджнас. Пөрыс ай-мамкөд видзим мөс, кукань, ыжъясөс. Ачым жө и ветлывлі мөс видзны-пастукавны. Отчыд роноса юралыс Н.В.Ульныров корис телефон дорө:

«Мый нө, тэ абу нин өмөй школаса директор: кывсьө — мөс

видзан, пастукалан? Ассыд и школаыдлысь авторитетсö талялан? Учебно-воспитательнöй уджөн, челядькөд колö занимайтчыны, а оз скöт бöрся вöтлысьны!» — янöдiс крапöдöмөн.

Августовскöй сöвещание вылын скöт видзöмысь бöрдтöдзыс пинявлiсны и мукöд велöдысьöс. И ковмис керöсса учителяслы лэдзчысьны мöскысь, порсьысь, ыжъясысь. Надзöникөн кöдзалисны му бердын удж дорö и сиктсаяс. Уджалисны час серти. Нель часын локылисны нин видзяс вылысь. Унаөн лэдзчысисны скöт видзöмысь. Лавкаысь пö мöдам йöвсö и яйсö ньöбны. 1982 во кeжлö Керöсса отделениеын лыддыссис 2053 гектар видз, 442 гектар гöран му. 1988 воын Макар-Керöсын олісны 213, Шöр-Керöсын — 359, Лаборомын — 163, Эжолын — 113 морт. 1986 восянь йöз лыдыс чинöма 113 морт вылö, либö сы мында, мыйта 1988 воö олісны Эжолын. Позьö шуны, 1986—87 воясö бырис дзоньнас Эжол сикт. 1935 восянь йöз лыдыс, ставнас босьтöмөн, чиніс 1035 морт вылö (буретш та мында овлöмаöсь 1897 воын — А.П.).

Йöзыс вочасөн дышмисны, сетчисны юöm вылö. Эндісны муяс-видзяс. Дзикöдз вöрсялісны Эжъес юпöлөнса видзяс, кытысь быд во заптылісны 500—600 тонна турун.

1983 восянь Макар-Керöс пырис «Пöддельнöй» совхозö. 1988—89 воясö олöмыс мöдліс бурмыны. Унаөн босьтчылісны тшöгöдны куканьясöс, сдайтiсны йöв. Гашкö, олöмыс и водзö на сöвмис, эз кö лоны татшöм вежсьöмъяс. Öкмысдасöд воясö киссис «Пöддельнöй» совхоз. Макар-Керöсын, Шöр-Керöсын, Лаборомын, Эжолын тыртöммисны скöт картаяс. Дзикöдз эндісны видзяс да муяс. Тыртöммис и Макар-Керöс сикт. 1957 воын, кор ме вуджи овны Кöрткерöсö, миян Кöджвыв грездын вöлі на 20 овмöс. Öні кeжлö абу нин и дасыс. Унджык керкаас некод оз ов, а олöны кö — локтöмъяс, кодъяс некөн оз уджавны. Тадзи кö и водзö лоас, регыд Кöджвыв грезд пыдди лоас тыртöмин. Грездыс тырö вöрөн, эндас, а сэсса регыдөн бырас и Макар-Керöс сикт, да вöвлöм ыджыд сикт йылысь колясны сöмын казътылöмъяс.



Командировкаын

В И С Ъ Т

Дежуритігад войясыс кузьӧсь. Кыссьӧ да, кыссьӧ да, чайтсьӧ: некор нин югыд шондіыс оз мыччысьлы. Дерт, мыйкӧ кӧ лоӧ, кӧнкӧ лёк войтыр мыж вӧчасны, ковмас опергруппа чукӧртны, мӧдӧдны, юӧртны та йылысь вылыс начальстволы. Сэтысянь сэсса дугдывтӧг дӧсадитчыны кутасны, звӧнитны да юасьны, стӧчмӧдны, кызди да мый да, мый опергруппаыс вӧчӧ да. Вот сэки кадыс зэв ӧдйӧ лэбӧ, он и тӧдлы войсӧ. Но мед нин, бурджык нин, нинӧм кӧ оз ло, а кузяӧн кызкӧ ӧд эштылас жӧ войыс, мыччас нюмъялысь чужӧмсӧ асыв, воас выль смена да вежас важсӧ.

Дежурнӧй Семён Васьлы отсасысь Сергей Попов, том на, гӧтыртӧм, помтӧг гежмаліс дежурка джодж, а сэсса шыасис оперативнӧй дежурнӧй дорӧ:

— Василий Семёнович, талун войыс лӧньӧн кӧсйӧ лоны. Середа, вежон шӧр. Огӧ лэччӧдлӧй видиксӧ?

— Мый нӧ,— вом тырнас вашмуніс Семён Вась,— эротика вылӧ кыскыны кутіс?

— Вӧчнысӧ нинӧм жӧ-а, кӧть нин кадыс ӧдйӧджык коляс.

— Уджтӧ верма аддзыны. То, колӧ кильчӧ вывсьыс йисӧ жутлыштны, мед йӧзыс оз кутны вильсьявны,— Семён Вась кыскыштіс увлань форменнӧй дӧрӧм бӧжсӧ. Бур вердаса мортыдлӧн дӧрӧм бӧжыс пыр вывлань кайны видзӧдчӧ, мыччӧдӧ гӧгсӧ.

— Сы вылӧ асылыс на лоас,— чукиртчыліс Сергей.— Удита.

— Но, удитан кӧ, дерт. Сідзкӧ, позьӧ и видик лэччӧдлыны. Сӧмын вайдӧр ме сводка МВД-ӧ мӧдӧда телетайпнас, а сы бӧрын нин любуйтчышт, том морт, гачтӧм нывъяснас. На ключсӧ, лӧсьыда кабинетсӧ восьт да нинӧм эн жутӧд сэтысь, а то юрнад он вештысь. Эксперт кабинетас пыравлін нин коркӧ?

— Пыравлі, дерт.

— Но, сідзкӧ, наперво чуткыв розеткаас чайниксӧ, кинотӧ видзӧдігмоз пӧсь тшайсӧ ырситам. А ме сводка бердӧ кутчысьла.

Семён Вась пуксис телетайп водзӧ, шлӧчйӧдліс-печатайтіс сӧмын сылы да МВД-са дежурнӧйлы гӧгӧрвоана шифра сводка да мӧдӧдіс колана номер кузя.

Семён Васьлӧн ноксигкості Сергей кайлӧма нин мӧдӧд судтаас да сувтӧдӧма дежуркаын телевизор да видеоманитофон.

— Менам ставыс дась!— радлан гӧлӧсӧн юӧртіс сійӧ.

— Он тай, другӧ, узь, кор аслыд колӧ,— серӧктіс Вась.— Колӧкӧ, и кассетатӧ водзвыв лӧсьӧдлін дежуритігкежлад?

— А кыдзи нө?— нюмъяліс мөдыс.— Бур төдсалысь водзөсали. Пуксям да видзөдам, ме включита?

— Чуткыв, мый сэсса.

Сергей тойыштіс кассетасө видиклөн паськыд вомас, магнитофон пыр жө нбылыштіс сійөс, и дежурной смена: оперативной дежурной Семён Вась, дежурной водитель Николай да Сергей тшай стөканъясөн пуксисны видзөдны эротической кино.

Экран вылын петкөдчисны медводдза кадръяс, и тайö кадö биыс кусі.

— Но. Вот и ставыс. Адзылін, Сергей, пасьтөм бабаястө?— гылыда-гылыда серөктіс Вась.— Оз пö позь вывті ышмыны, Енмыс шулөма, со и кусі биыс.

— Дыр-ө бара-й сэсса оз сетны бисө?— майшасьмөн дзуртыштіс улөснас Сергей.

— Асывнас лоö, эн шогсьы, пиö, шондіыс петас да,— сьölөм сетіс том мортлы Семён Вась.

Ачыс истөг тувъясөн кок увсө югдөдігтырйи пыраліс кытчөкө пыді жыръяс да петкөдіс сэтысь карасин лампа, ломзөдіс сійөс, и дежурной юкөныс югзыштіс чусыдіник би улын.

— Вот тіянлы и электричество, верманныд войбыд эротиканад любуйтчыны.

Сергейлы да Николайлы татшөм эротикаыд эз кажитчы. Медсянин Сергейлы, коді водзвыв ставсө дасьтіс, но этадзи ставыс дзугсис-пасьмуніс.

А Семён Васьлы веськодь.

— Тайö би кусөмыд сөмын бур вылө. Эз кө мойви видзөдны эротической киной, ме, час, висьтала тіянлы öти эротической лоөмтор йылысь, кывзанныд кө быттө?

— Кывзам, мый сэсса вөчан,— ышловзис Попов.— Татшөм бинад сөмын и мойдчыны.

— Коркө öтчыд командировкаын вөлім куимөн, куимнанным Васьяс. Та йылысь и көсья мойдыштны тіянлы, шань пиянө. Тшөктисны вайөдны öти жуликөс Кировысь, вот и мөдөдісны сэтчө куим Васьос: менө, Шахов Васьос да Нестеров Васьос. Ті найөс онө төдөй, важөн нин вуджлісны мөдлаө. Мунім зэв лөсьыда, майбыр, некод эз дөсадитчы. Купеын куимөн, куш асьным. Воим Кировө рытладорыс нин да, көнешной делө, пыр жө гостиницаө журкнитім. Овмөдтөм номер кокниа и сюри (абу öд кутшөмкө шоныд саридзбердса курортной кар), нель морт вылө, но нельөдыс некод эз лок, крөватъыс шойччө. Майбыр! Пөрччысим-керим да мый да, мыссьыштім, быттө ставыс бур, сөмын кынөмъяс гурьялөны. Колө мыйөнкө тыртыштны. Улі судтаас, адзылім пыригөн, нейджыд ресторан. Колө лэчывны да пукалыштны прамой йөз моз, нурьясьыштны да ичөтикаөн позьö и... Öд гөтырьяслөн дөзьөр улысь да начальство син улысь мынім.

Но и лэчим. Пуксим да заводитім надзөникөн трайгыны. Водзвыв сёрнитчим: «Огө кутөй вывтіасьны. Сідз, гаж вылө юыштам, и шабаш! Аски öд удж вылө, юрид кө кутас висьны, дзик нин абу бур. Музыкасө кывзыштам да мый да».

Вот и пукалам, надзөникөн юыштам да сөйыштам, варовитам. Век öд тай мужикъясыдлөн удж йылысь сёрниыс мунө, а мыйөн стопкаяс тыра пызан сайö пуксясны, сэки нывбабаяс йылысь сёрнитсьө. Но и миян сідз жө. А Шаховлөн сьылідзирйыс, быт-

тё солидолён мавтёма, швырыллан бергалё, синмыс сідзи и кодз-
лалё отарё-модарё, нывъясёс корсьё. Сійё и ачыс веськыда
висьталё, кор кодарё уджалё юр вежорыс:

«Меным сёйигён — мед выаджык нянь, а гажёдчигён — яя-
джык ань».

И сёрниыс Шаховлён быдлаын пыр та йылысь гартчё. Век ош-
йысьё, кызди сійё ылөдлөма то оти нылөс, то мөдөс. Аньяс, кодъ-
яс дорё Шахов эз на топөдчыв би кодъ пось сёлөмнас, ставныс
оти нимаось: Кандидатура. Со и сэнi, гостиницаса ресторанас
надзёникөн трайгигад, бур ныриса кыйсян пон моз өдйё и туяліс
миянсянь кык пызан костөн бокинджык пукалысь Кандидату-
раөс. Ме казялі Шаховлысь сэтчань сатшкысьём видзөдлассө да
аслым көсйытөг көбовтлі жö синъясёс сыланьё. Пызан сайын,
надзёникөн сёрнитігтыр, ужнайтісны кык ныв. Отиыс, позьё шу-
ны, шогмытөм: рыжой юрсиа, беринось кузьмөс чужөма, паськыд
вома, кузь ныра. Но сылөн нывьёртыс сэтшөм мича, збыль сёл-
лөмтө желлялас. Шаховлөн вежыс петіс ныв вылас, быттё кыткө
зөлитны кутіс. Юсь моз кузя сылісө нюжөдөмөн и тадзи, и
этадзи видзөдлас.— Семён Вась висьталігмозыс петкөдліс Шахов-
лысь дзирнясьёмсө.— А мыйөн йөктан шылад лэдзисны, пыр
жө котөртіс мича нывсө корны танго йөктыны. Ме олөмаджык
нин вөлі да веськодя видзөді Шахов Васьлөн Кандидатура вылө.
Менам өд эм гөтыр, меным вылө тырмас. Гөтрасьём бөрын не-
кор эг сибөдчыв бөкөвөй аньяс дорё, нинөмла, мися, төдөмөн ас-
лым сьөкыдлунъяс корсьны.

Нестеров Вась эз жö ёнасө чеччав, мортис лабутнөй. Юыш-
тім ськөд да вилкаөн тасьтіын гудрасим надзёникөн. А Шахов
Вась, видзөдам да, пыр отарё өзйө. Мөдысь дай коймөдысь нин,
топыда кутчысьёмөн, зал шөрас бергалісны мича нылыскөд. А сэс-
ся и матыстчис миян дорё да шуө:

«Эн дивитөй, вуджа нывъяслөн пызан сайё».

Ме, көнешнөй делө, сылы вочавидзи, мед оз ёна ышмы, мед
оз вөч миянлы корсян удж, век жö йөз карын, абу гортын. Но
кысь нө Шахов менсьым кывзас, сөмын кинас өвтыштіс:

«Аслам юр та вылө эм. Татшөм Кандидатура эновтны оз позь».

Он өд сэсся көртавлы мортсө, сідзи и торйөдчис, муніс нывъ-
яс дорас. Нестеровкөд пукалыштім нөшта недыр, сёрнитыштім,
а сэсся и кайим асланым номерө шойччыны, нюжөдчим лөсьыда
да кутім виччысьны Шаховлысь пырөм. Кыдзкө сёлөм вылын эз
вөв лөсьыд, отлаын мунім командировкаө да эз эськө ков йөз ка-
рад торйөдчынысө. Быдторйыс өд вермас лоны, сэсся миянлы Нес-
теровкөд кывкутны ковмас, юаласны өд, мыйла пө эновтінныд
мортсө?

«Часлы, волан, войын шөйтысь кань, танготө и тані ковмас
йөктыштны!»— скөрала ас кежысь.

А Шахов дыр эз лок. Мудзвывсьыд туй бөрад юыштөмыд
лоис да, ме и унмовси. Нестеров Вась, тшук, сідз жö. Но кыла
унйылысь, кодкө тотшкөдыштіс өдзөсө, отчыд дай мөдысь. Сэсся
и шыасис Шахов:

«Восьтөй, тайө ме».

Быдсөн сёлөм вылын кокныдджык лои, слабөг, мися, ас кок-
нас воис, нинөм, буди, абу лоөма ськөд, чеччи да лэдзи морттө.
Пырис, быттё бордъяс вылын лэбыштіс. Видзөдөмпырысь, абу

вывті код, буретша, тыдалö, юöма, а вомыс пельсьыс пельöдзыс. Ыджыд шуд чужöм вылас поздысьöма, тайкö менö тшöтш оз уськöдчы кутлыны. Уна-ö мортыдлы, вöлöмкö, и колö?

«Но, кызди Кандидатураыд? Кажитчис?»

«Во!— певсö вывлань лэптылöмөн вашъялö Шахов.— Но и ныв, дзик биа öгыр кодь! Инмöдчан да ыпнитан».

«Гашкö, сэсса гöтрасян да татчö и кольччан?»

«Сэн тыдавны кутас».

Нестеров Вась тшöтш садьмис, мыччöдiс нырсö шебрас увсьыс, очсалö да синъяссö лапйöдлö, видзöдö шудысла дзулькйөн пуысь Шахов вылö. А мöдыс и кöсйö кутчысьны веськодяджык, петкöдлыны миянлы, мый сылөн быд лун татшöм шудаыс, но ас кöсйытöгыс бара на вомыс жеркмунас. И менам да Нестеров-лөн тшöтш нюмным петö сы вылö видзöдiгөн.

Водi. Шахов би кусöдiс да тшöтш, кылö нюжöдчис, крöвать пружинаясыс дзуркнитiсны сы улын. Недыр куйлыштiм, и ме заводитi надзöникөн сунис трубича гартны. Шахов мыйкö не-тшыштчис, пуксис вольпась вылас. Ме нинöм ог шу, быттö ог кыв. Пукалыштiс, кывзысьыштiс. Гөгöр чöv-лөнь. Бөр водiс. Мый-кö дыра мысти бара чеччыштiс, котөрөн ветлiс выключатель дорö, öзтiс би, бөр локтiс крöвать дорас, павтыртiс шебрассö, гөгöр бура видзöдалiс.

Ме, быттö унйылысь моз да дöзмöмпырысь, юалi:

«Мый нö котралан, он узь?»

«Час, вода»,— кутшöмкö усьöм гөлöсөн нурбыльтiс мортыд. Кусöдiс бисö да бөр водiс. Куйлыштiс, бара чепöсйис биасьны: «Кодъяскö котралöны вольпась вывтi».

«Лудiкъяс али мый?»— очсыштöмөн веськодя юалi.

«Лудiктö ме, муртса на стен кузяыс кутас лэччыны, кыла нин. Тайö абу лудiкъяс. Ог тöд, кодъяс».

«Кодкö кö öд эм, аддзан. Колöкö, төрöканъяс усьяснас тэнö гильöдöны?»

«Мун сэтысь! Кутшöм төрöканъяс? Некод тай оз тыдав-а».

«Но, сiдзкö, вод. Он öд войбыд сэн кут койтны крöвать бокад».

Шахов недыр сюся видзöдалiс на вольпасьсö, бура гөгöрбок тапкöдiс кияснас, некодöс эз аддзы, ыджыда ышловзис, кусöдiс бисö да водiс. Но выльысь чеччыштiс, бара биасис.

«Мый нö тайö, кодъяс менам вольпасьын котралöны? Тi не-кодöс онö кылöй? Онö? Хм-м? Вай бисö огö кусöдöй, сiдзи куй-лышта, гашкö, слöйма казаявны югыднад, кутшöм сэтшöм гагъяс крöватяс кайöмаöсь».

Бинад вöлi лөнь, но ме, а сэсса и Нестеров Вась заводитiм шуасьны:

«Кусöд бисö, узыны он сет. Көнкö кыскасян, быдсяма заразасö көвъялан, а ми тэ понда шойччыны огö вермöй! Кусöд!»

Шахов мыйкö вомгорулас броткигтырйи чеччис да шлочкис-кусöдiс лампасö, водiс. Но эз дыр куйлы, бара чеччыштiс, зэв зiля крöвать увсьыс судзöдiс портпельсö, кыскис сэтысь выль трусик да вежсис. Важсö гартыштiс полиэтилен пакетö да шы-битiс форточка пырыс.

«Вот тадзи! Öнi сэсса, тшук, спокой лоас. Ог нин кут тiянлы дöсадитчыны».

Водiс, и пыр жö шкоркнитiс-унмовсис. Но бара на эз дыр кеж-лö, чеччыштiс, быттö сiйöс шылаөн вольпась пырыс бытшкисны.

«У-ук, сюрлас кӧ меным тайӧ Кандидатураыс мӧдысь, ныр-вомсӧ дзик стӧч кисьта, мед тӧдны кутас, кыдзи быдсяма гадьяс-сӧ разӧдны! А видзӧднысӧ ӧд быттьӧ сэтшӧм мича да сӧстӧм вӧлі! «Фа-фа-фа! Ля-ля-ля! Я не такая!» Вот тэныд и не такая! Зэв, буракӧ, посныдӧсь, бус кодьӧсь, а котралӧны, быттьӧ ко-дзувкотьяс. Вай огӧ бисӧ кусӧдӧй, найӧ пемыднас котралӧны, югыдсьыс, буракӧ, полӧны».

Бара куйлыштӧс биӧн, недыр мысти шкоркнитӧс нин. Несте-ров Вась чеччис да кусӧдӧс лампасӧ:

«Узьны оз сет, би сылы ковмӧма!»

И бара Шахов садьмис, чеччыштӧс вольпасьсьыс.

«Но мый тайӧ татшӧмыс, Господьӧй-Енмӧй? Муртса унмовси, и бара нин жӧдзӧны вольпась тыр».

«Мый нӧ, сӧйӧмысь полан али мый?»— бара паськыда оч-сыштӧ ме.

«Сӧйӧмысь эськӧ ог да. Прӧстӧ терпитны ог вермы татшӧм суседьяссьӧ. Час, прӧстыня увсьыс видзӧдла, сэтчӧ, колӧкӧ, дзебсьӧны?»

Шахов павтыртӧс прӧстынясӧ, аддзис сэтись лӧсьыда пась-кӧдлӧм гӧрӧда сунисьяс. Ӑти сюрӧсӧ гӧрддзасьӧм помыс мунӧ менам юрлӧс улӧ да джынвийӧ гартчӧма нин трубичаӧ. Мортыд весьӧпӧрліс, чуймӧмӧн видзӧдӧ менам киӧн вӧчӧмтор былӧ, а чужӧмыс сідзи и пӧртмасьӧ лӧзӧн да гӧрдӧн. Чуймӧмыс чужӧм вылас пыр жӧ вежсис скӧрмӧм былӧ. Киыс кабыртӧс улӧс, лӧп-тыштӧс сійӧс да ӧвтыштчис ме былӧ. Но и повзъылі жӧ сэки! Чайтӧ: дзик збыль кӧрт улӧснас юрӧ швачкӧбтас. Но кыдзкӧ ӧд эз жӧ варт, берговтӧс улӧссӧ джоджӧ, сувтӧс менам крӧвать дорӧ да чуньсӧ чужӧм водзын визйӧдлӧмӧн шуалӧ:

«Тайӧ тэ?! Тайӧ тэ ме вылын тешитчан? И кыдз тэныд абу яндзим?! Ӑтлаын уджалам, другӧн лыддьыссян! Сӧ! Талунсянь тэ меным абу друг! Сідзи и тӧд! А ме? Честнӧй мича аньӧс тэ понда тайкӧ бӧръя кывъясӧн нимта».

Но вочасӧн век жӧ лӧнис, шыблалӧс суниссӧ ме былӧ да ню-жӧдчис-водӧс.

Семён Вась ланьтӧс, ырситӧс кӧдзалӧм тшайсӧ да ышловзис:
— Мыжмылі ёрт водзын.

— А водзӧ?— юалӧс Сергей Попов.— Кыдзи ставыс помассис?

— Водзӧ? То би ӧзйис, видзӧд ассъыд эротическӧй кинотӧ.



Виль небөг



В 89 Вурдов А.И. Сир войт.— Сыктывкар: ГУ Редакция журнала «Арт», 2007. — 144 с.

Регыд типографияысь петас «Войвыв кодзув» журнал лыддысьяслы бура тӧдса гижысь Алексей Вурдовлӧн небӧг.

«Сир войт» — татшӧм ним сетіс аслас виль книгалы удораса гижысь. Гижӧд чукӧрыс зэв аслыспӧлӧс: и кыв боксяныс, и татчӧс олысь-вылысьлысь этшӧ петкӧдлӧм серти. Лыддян книгасӧ да ловнад кылан сэтчӧс вӧр-валысь шувгӧмсӧ, пуяслысь ас костаныс шӧпкӧдчӧмсӧ, сӧс-

тӧм ёллысь тӧльгӧмсӧ... Быттьӧ бергӧдчылан уна-уна во сайӧ да ас синнад видзӧдлан, кызди овлісны-вывлісны коркӧ удораса войтыр, вӧравлісны, чери кыйлісны, видзисны чужан кыв, ассыныс традицияс, радейтлісны да пыдди пуктылісны ӧтамӧднысӧ...

Обложкасӧ серпасалис Юрий Лисовский.



Номерсӧ печатьӧ кырымалис Евгений Козлов.

ПЫДДИ ПУКТАНА АВТОРЪЯС!

Редакцияӧ гижӧдъяснытӧ ыстігӧн быть колӧ юӧртны:

1. Ассыныд ним, вич, ов; кор да кӧні чужлӧмныд (лун, тӧлысь, во).
2. Паспорт юӧръяс: номер, серия, кор да кӧні сетісны, гортса адрес (прописка серти).
3. Индивидуальной налогӧвӧй номер — ИНН (кодлӧн эм).
4. Страховӧй свидетельство номер.

Тайӧс юӧрттӧг редакция гонорар оз вешты.

*Журналын йӧзӧдтӧм гижӧдъяс
редакция оз рецензируют и авторыслы найӧс оз мӧдӧд.
Редакция оз век во ӧти кывйӧ авторгяскӧд.*

Комп. набор и верстка **Н.Кузнецова.** Корректор **Н.Габова.**

Адрес редакции: 167982. ГСП-2, г. Сыктывкар, Дом печати, каб. 202.
Телефоны редакции: 24-47-52 (гл. редактор), 24-51-52 (общ. отд./факс).
E-mail: kodzuv@mail.ru

Подписано к печати 07.09.2007. Формат 70x108¹/₁₆. Печать офсетная. Усл. печ. л. 7; усл. кр.-отт. 8,4; учетно-изд. л. 7,54. Тираж 1000. Заказ № . Регистр. ПИ № ФС 3 - 0226.
ОАО «Кировская областная типография», 610000, г. Киров, проезд Динамо, 4.